

## תהלים

### 1

1 אשרי האיש אשר לא הלך בעצת רשעים ובדרך חטאים לא עמד ובמושב לצים לא ישב: 2 כי אם בתורת יהוה חפצו ובתורתו יהגה יומם ולילה: 3 והיה כעץ שתול על פלגי מים אשר פריו יתן בעתו ועלהו לא יבול וכל אשר יעשה יצליח: 4 לא כן הרשעים כי אם כמץ אשר תדפנו רוח: 5 על כן לא יקמו רשעים במשפט וחטאים בעדת צדיקים: 6 כי יודע יהוה דרך צדיקים ודרך רשעים תאבד:

### 2

1 למה רגשו גוים ולאמים יהגו ריק: 2 יתיצבו מלכי ארץ ורוזנים נוסדו יחד על יהוה ועל משיחו: 3 ננתקה את מוסרותימו ונשליכה ממנו עבתימו: 4 יושב בשמים ישחק אדני ילעג למו: 5 אז ידבר אלימו באפו ובחרונו יבהלמו: 6 ואני נסכתי מלכי על ציון הר קדשי: 7 אספרה אל חק יהוה אמר אלי בני אתה אני היום ילדתיך: 8 שאל ממני ואתנה גוים נחלתך ואחזתך אפסי ארץ: 9 תרעם בשבט ברזל ככלי יוצר תנפצם: 10 ועתה מלכים השכילו הוסרו שפטי ארץ: 11 עבדו את יהוה ביראה וגילו ברעדה: 12 נשקו בר פן יאנף ותאבדו דרך כי יבער כמעט אפו אשרי כל חוסי בו:

## 3

1 מזמור לדוד בברחו מפני אבשלום בנו יהוה מה רבו צרי רבים קמים עלי: 2 רבים אמרים לנפשי אין ישועתה לו באלהים סלה: 3 ואתה יהוה מגן בעדי כבודי ומרים ראשי: 4 קולי אל יהוה אקרא ויענני מהר קדשו סלה: 5 אני שכבתי ואישנה הקיצותי כי יהוה יסמכני: 6 לא אירא מרבבות עם אשר סביב שתו עלי: 7 קומה יהוה הושיעני אלהי כי הכית את כל איבי לחי שני רשעים שברת: 8 ליהוה הישועה על עמך ברכתך סלה:

## 4

1 למנצח בנינות מזמור לדוד בקראי ענני אלהי צדקי בצר הרחבת לי חנני ושמע תפלת: 2 בני איש עד מה כבודי לכלמה תאהבון ריק תבקשו כזב סלה: 3 ודעו כי הפלה יהוה חסיד לו יהוה ישמע בקראי אליו: 4 רגזו ואל תחטאו אמרו בלבבכם על משכבכם ודמו סלה: 5 זבחו זבחי צדק ובטחו אל יהוה: 6 רבים אמרים מי יראנו טוב נסה עלינו אור פניך יהוה: 7 נתתה שמחה בלבי מעת דגנם ותירושם רבו: 8 בשלום יחדו אשכבה ואישן כי אתה יהוה לבדד לבטח תושיבני:

## 5

1 למנצח אל הנחילות מזמור לדוד אמרי האזינה יהוה בינה הגיגי: 2 הקשיבה לקול שועי מלכי ואלהי כי אליך אתפלל: 3 יהוה בקר תשמע קולי בקר אערך לך ואצפה: 4 כי לא אל חפץ רשע אתה לא יגרך רע: 5 לא יתיצבו הוללים לנגד עיניך שנאת כל פעלי און: 6 תאבד

דברי כזב איש דמים ומרמה יתעב יהוה: <sup>7</sup> ואני ברב חסדך אבוא ביתך אשתחווה אל היכל קדשך ביראתך: <sup>8</sup> יהוה נחני בצדקתך למען שוררי הושר לפני דרכך: <sup>9</sup> כי אין בפיהו נכונה קרבם הוות קבר פתוח גרונם לשונם יחליקון: <sup>10</sup> האשימם אלהים יפלו ממעצותיהם ברב פשעיהם הדיחמו כי מרו בך: <sup>11</sup> וישמחו כל חוסי בך לעולם ירננו ותסך עלימו ויעלצו בך אהבי שמך: <sup>12</sup> כי אתה תברך צדיק יהוה כצנה רצון תעטרנו:

## 6

<sup>1</sup> למנצח בנגינות על השמינית מזמור לדוד יהוה אל באפך תוכיחני ואל בחמתך תיסרני: <sup>2</sup> חנני יהוה כי אמלל אני רפאני יהוה כי נבהלו עצמי: <sup>3</sup> ונפשי נבהלה מאד ואת יהוה עד מתי: <sup>4</sup> שובה יהוה חלצה נפשי הושיעני למען חסדך: <sup>5</sup> כי אין במות זכרך בשאול מי יודה לך: <sup>6</sup> יגעתי באנחתי אשחה בכל לילה מטתי בדמעתי ערשי אמסה: <sup>7</sup> עששה מכעס עיני עתקה בכל צוררי: <sup>8</sup> סורו ממני כל פעלי און כי שמע יהוה קול בכיי: <sup>9</sup> שמע יהוה תחנתי יהוה תפלת יקח: <sup>10</sup> יבשו ויבהלו מאד כל איבי ישבו יבשו רגע:

## 7

<sup>1</sup> שגיון לדוד אשר שר ליהוה על דברי כוש בן ימיני יהוה אלהי בך חסיתי הושיעני מכל רדפי והצילני: <sup>2</sup> פן יטרף כאריה נפשי פרק ואין מציל: <sup>3</sup> יהוה אלהי אם עשיתי זאת אם יש עול בכפי: <sup>4</sup> אם גמלתי שולמי רע ואחלצה צוררי ריקם: <sup>5</sup> ירדף אויב נפשי וישג וירמס

לארץ חיי וכבודי לעפר ישכן סלה: 6 קומה יהוה באפך  
הנשא בעברות צוררי ועורה אלי משפט צוית: 7 ועדת  
לאמים תסובבך ועליה למרום שובה: 8 יהוה ידין עמים  
שפטני יהוה כצדקי וכתמי עלי: 9 יגמר נא רע רשעים  
ותכונן צדיק ובחן לבות וכליות אלהים צדיק: 10 מגני  
על אלהים מושיע ישרי לב: 11 אלהים שופט צדיק ואל  
זעם בכל יום: 12 אם לא ישוב חרבו ילטוש קשתו דרך  
ויכוננה: 13 ולו הכין כלי מות חציו לדלקים יפעל:  
14 הגה יחבל און והרה עמל וילד שקר: 15 בור כרה  
ויחפרהו ויפל בשחת יפעל: 16 ישוב עמלו בראשו ועל  
קדקדו חמסו ירד: 17 אודה יהוה כצדקו ואזמרה שם  
יהוה עליון:

## 8

1 למנצח על הגתית מזמור לדוד יהוה אדנינו מה  
אדיר שמך בכל הארץ אשר תנה הודך על השמים:  
2 מפי עוללים וינקים יסדת עז למען צורריך להשבית  
אויב ומתנקם: 3 כי אראה שמך מעשי אצבעתיך ירח  
וכוכבים אשר כוננתה: 4 מה אנוש כי תזכרנו ובן אדם  
כי תפקדנו: 5 ותחסרהו מעט מאלהים וכבוד והדר  
תעטרהו: 6 תמשילהו במעשי ידיך כל שתה תחת רגליו:  
7 צנה ואלפים כלם וגם בהמות שדי: 8 צפור שמים ודגי  
הים עבר ארחות ימים: 9 יהוה אדנינו מה אדיר שמך  
בכל הארץ:

## 9

1 למנצח עלמות לבן מזמור לדוד אודה יהוה בכל

לבי אספרה כל נפלאותיך: <sup>2</sup> אשמחה ואעלצה בך  
 אזמרה שמך עליון: <sup>3</sup> בשוב אויבי אהור יכשלו ויאבדו  
 מפניך: <sup>4</sup> כי עשית משפטי ודיני ישבת לכסא שופט  
 צדק: <sup>5</sup> גערת גוים אבדת רשע שמם מחית לעולם ועד:  
<sup>6</sup> האויב תמו חרבות לנצח וערים נתשת אבד זכרם  
 המה: <sup>7</sup> ויהוה לעולם ישב כונן למשפט כסאו: <sup>8</sup> והוא  
 ישפט תבל בצדק ידין לאמים במישרים: <sup>9</sup> ויהי יהוה  
 משגב לדרך משגב לעתות בצרה: <sup>10</sup> ויבטחו בך יודעי  
 שמך כי לא עזבת דרשיך יהוה: <sup>11</sup> זמרו ליהוה ישב ציון  
 הגידו בעמים עלילותיו: <sup>12</sup> כי דרש דמים אותם זכר  
 לא שכח צעקת עניים: <sup>13</sup> חננני יהוה ראה עניי משנאי  
 מרוממי משערי מות: <sup>14</sup> למען אספרה כל תהלתך  
 בשערי בת ציון אגילה בישועתך: <sup>15</sup> טבעו גוים בשחת  
 עשו ברשת זו טמנו נלכדה רגלים: <sup>16</sup> נודע יהוה משפט  
 עשה בפעל כפיו נוקש רשע הגיון סלה: <sup>17</sup> ישובו רשעים  
 לשאולה כל גוים שכחי אלהים: <sup>18</sup> כי לא לנצח ישכח  
 אביון תקות ענוים תאבד לעד: <sup>19</sup> קומה יהוה אל יעז  
 אנוש ישפטו גוים על פניך: <sup>20</sup> שיתה יהוה מורה להם  
 ידעו גוים אנוש המה סלה:

## 10

<sup>1</sup> למה יהוה תעמד ברחוק תעלים לעתות בצרה:  
<sup>2</sup> בגאות רשע ידלק עני יתפשו במזמות זו חשבו: <sup>3</sup> כי  
 הלל רשע על תאות נפשו ובצע ברך נאץ יהוה: <sup>4</sup> רשע  
 כגבה אפו בל ידרש אין אלהים כל מזמותיו: <sup>5</sup> יחילו  
 דרכו בכל עת מרום משפטיך מנגדו כל צורריו יפיה

בהם: <sup>6</sup> אמר בלבו בל אמוש לדר ודר אשר לא ברע:  
<sup>7</sup> אלה פיהו מלא ומרמות ותך תחת לשונו עמל ואון:  
<sup>8</sup> ישב במארב חצרים במסתרים יהרג נקי עיניו לחלכה  
 יצפנו: <sup>9</sup> יארב במסתר כאריה בסכה יארב לחטוף עני  
 יחטף עני במשכו ברשתו: <sup>10</sup> ודכה ישח ונפל בעצומו  
 חלכאים: <sup>11</sup> אמר בלבו שכח אל הסתיר פניו בל ראה  
 לנצח: <sup>12</sup> קומה יהוה אל נשא ירך אל תשכח עניים:  
<sup>13</sup> על מה נאץ רשע אלהים אמר בלבו לא תדרש:  
<sup>14</sup> ראתה כי אתה עמל וכעס תביט לתת בידך עליך  
 יעזב חלכה יתום אתה היית עוזר: <sup>15</sup> שבר זרוע רשע  
 ורע תדרוש רשעו בל תמצא: <sup>16</sup> יהוה מלך עולם ועד  
 אבדו גוים מארצו: <sup>17</sup> תאות ענוים שמעת יהוה תכין לבם  
 תקשיב אזנך: <sup>18</sup> לשפט יתום ורך בל יוסיף עוד לערץ  
 אנוש מן הארץ:

## 11

<sup>1</sup> למנצח לדוד ביהוה חסיתי איך תאמרו לנפשי נודו  
 הרכם צפור: <sup>2</sup> כי הנה הרשעים ידרכון קשת כוננו חצם  
 על יתר לירות במו אפל לישרי לב: <sup>3</sup> כי השתות יהרסון  
 צדיק מה פעל: <sup>4</sup> יהוה בהיכל קדשו יהוה בשמים כסאו  
 עיניו יחזו עפעפיו יבחנו בני אדם: <sup>5</sup> יהוה צדיק יבחן  
 ורשע ואהב חמס שנאה נפשו: <sup>6</sup> ימטר על רשעים פחים  
 אש וגפרית ורוח זלעפות מגת כוסם: <sup>7</sup> כי צדיק יהוה  
 צדקות אהב ישר יחזו פנימו:

## 12

<sup>1</sup> למנצח על השמינית מזמור לדוד הושיעה יהוה כי

גמר חסיד כי פסו אמונים מבני אדם: <sup>2</sup> שוא ידברו איש את רעהו שפת חלקות בלב ולב ידברו: <sup>3</sup> יכרת יהוה כל שפתי חלקות לשון מדברת גדלות: <sup>4</sup> אשר אמרו ללשנו נגביר שפתינו אתנו מי אדון לנו: <sup>5</sup> משד עניים מאנקת אביונים עתה אקום יאמר יהוה אשית בישע יפיה לו: <sup>6</sup> אמרות יהוה אמרות טהרות כסף צרוף בעליל לארץ מזקק שבעתים: <sup>7</sup> אתה יהוה תשמרם תצרנו מן הדור זו לעולם: <sup>8</sup> סביב רשעים יתהלכון כרם זלות לבני אדם:

## 13

<sup>1</sup> למנצח מזמור לדוד עד אנה יהוה תשכחני נצח עד אנה תסתיר את פניך ממני: <sup>2</sup> עד אנה אשית עצות בנפשי יגון בלבבי יומם עד אנה ירום איבי עלי: <sup>3</sup> הביטה ענני יהוה אלהי האירה עיני פן אישן המות: <sup>4</sup> פן יאמר איבי יכלתיו צרי יגילו כי אמוט: <sup>5</sup> ואני בחסדך בטחתי יגל לבי בישועתך: <sup>6</sup> אשירה ליהוה כי גמל עלי:

## 14

<sup>1</sup> למנצח לדוד אמר נבל בלבו אין אלהים השחיתו התעיבו עלילה אין עשה טוב: <sup>2</sup> יהוה משמים השקיף על בני אדם לראות היש משכיל דרש את אלהים: <sup>3</sup> הכל סר יחדו נאלחו אין עשה טוב אין גם אחד: <sup>4</sup> הלא ידעו כל פעלי און אכלי עמי אכלו לחם יהוה לא קראו: <sup>5</sup> שם פחדו פחד כי אלהים בדור צדיק: <sup>6</sup> עצת עני תבישו כי יהוה מחסהו: <sup>7</sup> מי יתן מציון ישועת ישראל בשוב יהוה שבות עמו יגל יעקב ישמח ישראל:

## 15

1 מזמור לדוד יהוה מי יגור באהלך מי ישכן בהר  
 קדשך: 2 הולך תמים ופעל צדק ודבר אמת בלבבו:  
 3 לא רגל על לשנו לא עשה לרעהו רעה וחרפה לא  
 נשא על קרבו: 4 נבזה בעיניו נמאס ואת יראי יהוה יכבד  
 נשבע להרע ולא ימר: 5 כספו לא נתן בנשך ושחד על  
 נקי לא לקח עשה אלה לא ימוט לעולם:

## 16

1 מכתם לדוד שמרני אל כי חסיתי בך: 2 אמרת  
 ליהוה אדני אתה טובתי בל עליך: 3 לקדושים אשר  
 בארץ המה ואדירי כל חפצי במ: 4 ירבו עצבותם אחר  
 מהרו בל אסיך נסכיהם מדם ובל אשא את שמותם  
 על שפתי: 5 יהוה מנת חלקי וכוסי אתה תומוך גורלי:  
 6 חבלים נפלו לי בנעמים אף נחלת שפרה עלי: 7 אברך  
 את יהוה אשר יעצני אף לילות יסרוני כליותי: 8 שויתי  
 יהוה לנגדי תמיד כי מימיני בל אמוט: 9 לכן שמח לבי  
 ויגל כבודי אף בשרי ישכן לבטח: 10 כי לא תעזב נפשי  
 לשאול לא תתן חסידך לראות שחת: 11 תודיעני ארח  
 חיים שבע שמחות את פניך נעמות בימינך נצח:

## 17

1 תפלה לדוד שמעה יהוה צדק הקשיבה רנתי  
 האזינה תפלתי בלא שפתי מרמה: 2 מלפניך משפטי  
 יצא עיניך תחזינה מישרים: 3 בחנת לבי פקדת לילה  
 צרפתי בל תמצא זמתי בל יעבר פי: 4 לפעלות אדם  
 בדבר שפתיך אני שמרתי ארחות פריץ: 5 תמך אשרי



במעגלותיך בל נמוטו פעמי: <sup>6</sup> אני קראתיך כי תענני  
 אל הט אזנך לי שמע אמרתי: <sup>7</sup> הפלה חסדיך מושיע  
 חוסים ממתקוממים בימינך: <sup>8</sup> שמרני כאישון בת עין  
 בצל כנפיך תסתירני: <sup>9</sup> מפני רשעים זו שדוני איבי  
 בנפש יקיפו עלי: <sup>10</sup> חלבמו סגרו פימו דברו בגאות:  
<sup>11</sup> אשרינו עתה סבבוני עיניהם ישיתו לנשות בארץ:  
<sup>12</sup> דמינו כאריה יכסוף לטרוף וככפיר ישב במסתרים:  
<sup>13</sup> קומה יהוה קדמה פניו הכריעהו פלטה נפשי מרשע  
 חרבך: <sup>14</sup> ממתים ידך יהוה ממתים מחלד חלקם  
 בחיים וצפינך תמלא בטנם ישבעו בנים והניחו יתרם  
 לעולליהם: <sup>15</sup> אני בצדק אחזה פניך אשבעה בהקיץ  
 תמונתך:

## 18

<sup>1</sup> למנצח לעבד יהוה לדוד אשר דבר ליהוה את  
 דברי השירה הזאת ביום הציל יהוה אותו מכף כל  
 איביו ומיד שאול ויאמר ארחמך יהוה חזקי: <sup>2</sup> יהוה  
 סלעי ומצודתי ומפלטי אלי צורי אחסה בו מגני וקרן  
 ישעי משנבי: <sup>3</sup> מהלל אקרא יהוה ומן איבי אושע:  
<sup>4</sup> אפפוני חבלי מות ונחלי בליעל יבעתוני: <sup>5</sup> חבלי  
 שאול סבבוני קדמוני מוקשי מות: <sup>6</sup> בצר לי אקרא  
 יהוה ואל אלהי אשוע ישמע מהיכלו קולי ושועתי לפניו  
 תבוא באזניו: <sup>7</sup> ותגעש ותרעש הארץ ומוסדי הרים ירגזו  
 ויתגעשו כי חרה לו: <sup>8</sup> עלה עשן באפו ואש מפיו תאכל  
 נחלים בערו ממנו: <sup>9</sup> ויט שמים וירד וערפל תחת רגליו:  
<sup>10</sup> וירכב על כרוב ויעף וידא על כנפי רוח: <sup>11</sup> ישת חשך

סתרו סביבותיו סכתו חשכת מים עבי שחקים: 12 מנגה  
 נגדו עביו עברו ברד וגחלי אש: 13 וירעם בשמים יהוה  
 ועליון יתן קלו ברד וגחלי אש: 14 וישלח חציו ופיצם  
 וברקים רב ויהמם: 15 ויראו אפיקי מים ויגלו מוסדות  
 תבל מגערתך יהוה מנשמת רוח אפך: 16 ישלח ממרום  
 יקחני ימשני ממים רבים: 17 יצילני מאיבי עז ומשנאי  
 כי אמצו ממני: 18 יקדמוני ביום אידי ויהי יהוה למשען  
 לי: 19 ויוציאני למרחב יחלצני כי חפץ בי: 20 יגמלני  
 יהוה כצדקי כבר ידי ישיב לי: 21 כי שמרתי דרכי יהוה  
 ולא רשעתי מאלהי: 22 כי כל משפטיו לנגדי וחקתיו לא  
 אסיר מני: 23 ואהי תמים עמו ואשתמר מעוני: 24 וישב  
 יהוה לי כצדקי כבר ידי לנגד עיניו: 25 עם חסיד  
 תתחסד עם גבר תמים תתמם: 26 עם נבר תתברר ועם  
 עקש תתפתל: 27 כי אתה עם עני תושיע ועינים רמות  
 תשפיל: 28 כי אתה תאיר נרי יהוה אלהי יגיה חשכי:  
 29 כי בכך ארץ גדוד ובאלהי אדלג שור: 30 האל תמים  
 דרכו אמרת יהוה צרופה מגן הוא לכל החסים בו:  
 31 כי מי אלוה מבלעדי יהוה ומי צור זולתי אלהינו:  
 32 האל המאזרני חיל ויתן תמים דרכי: 33 משוה רגלי  
 כאילות ועל במתי יעמידני: 34 מלמד ידי למלחמה  
 ונחתה קשת נחושה זרועתי: 35 ותתן לי מגן ישעך וימינך  
 תסעדני וענותך תרבני: 36 תרחיב צעדי תחתי ולא  
 מעדו קרסלי: 37 ארדוף אויבי ואשיגם ולא אשוב עד  
 כלותם: 38 אמחצם ולא יכלו קום יפלו תחת רגלי:  
 39 ותאזרני חיל למלחמה תכריע קמי תחתי: 40 ואיבי

נתתה לי ערף ומשנאי אצמיתם: 41 ישועו ואין מושיע  
 על יהוה ולא ענם: 42 ואשחקם כעפר על פני רוח כשיט  
 חוצות אריקם: 43 תפלטני מריבי עם תשימני לראש גוים  
 עם לא ידעתי יעבדוני: 44 לשמע אזן ישמעו לי בני נכר  
 יכחשו לי: 45 בני נכר יבלו ויחרגו ממסגרותיהם: 46 חי  
 יהוה וברוך צורי וירום אלוהי ישעי: 47 האל הנותן  
 נקמות לי וידבר עמים תחתי: 48 מפלטי מאיבי אף מן  
 קמי תרוממני מאיש חמס תצילני: 49 על כן אודך בגוים  
 יהוה ולשמך אזמרה: 50 מגדל ישועות מלכו ועשה חסד  
 למשיחו לדוד ולזרעו עד עולם:

## 19

1 למנצח מזמור לדוד השמים מספרים כבוד אל  
 ומעשה ידיו מגיד הרקיע: 2 יום ליום יביע אמר ולילה  
 ללילה יהוה דעת: 3 אין אמר ואין דברים בלי נשמע  
 קולם: 4 בכל הארץ יצא קום ובקצה תבל מליהם  
 לשמש שם אהל בהם: 5 והוא כחתן יצא מחפתו ישיש  
 כגבור לרוץ ארח: 6 מקצה השמים מוצאו ותקופתו  
 על קצותם ואין נסתר מחמתו: 7 תורת יהוה תמימה  
 משיבת נפש עדות יהוה נאמנה מחכימת פתי: 8 פקודי  
 יהוה ישרים משמחי לב מצות יהוה ברה מאירת עינים:  
 9 יראת יהוה טהורה עומדת לעד משפטי יהוה אמת  
 צדקו יחדו: 10 הנחמדים מזהב ומפז רב ומתוקים מדבש  
 ונפת צופים: 11 גם עבדך נזהר בהם בשמרם עקב רב:  
 12 שניאות מי יבין מנסתרות נקני: 13 גם מזדים חשך  
 עבדך אל ימשלו בי אז איתם ונקיתי מפשע רב: 14 יהיו

לרצון אמרי פי והגיון לבי לפניך יהוה צורי וגאלי:

## 20

1 למנצח מזמור לדוד יענך יהוה ביום צרה ישנבך  
 שם אלהי יעקב: 2 ישלח עזרך מקדש ומציון יסעדך:  
 3 יזכר כל מנחתך ועולתך ידשנה סלה: 4 יתן לך  
 כלבבך וכל עצתך ימלא: 5 נרננה בישועתך ובשם  
 אלהינו נדגל ימלא יהוה כל משאלותיך: 6 עתה ידעתי  
 כי הושיע יהוה משיחו יענהו משמי קדשו בגברות ישע  
 ימינו: 7 אלה ברכב ואלה בסוסים ואנחנו בשם יהוה  
 אלהינו נזכיר: 8 המה כרעו ונפלו ואנחנו קמנו ונתעודד:  
 9 יהוה הושיעה המלך יעננו ביום קראנו:

## 21

1 למנצח מזמור לדוד יהוה בעזך ישמח מלךך  
 ובישועתך מה יגיל מאד: 2 תאות לבו נתתה לו וארשת  
 שפתיו בל מנעת סלה: 3 כי תקדמנו ברכות טוב תשית  
 לראשו עטרת פז: 4 חיים שאל ממך נתתה לו ארך ימים  
 עולם ועד: 5 גדול כבודו בישועתך הוד והדר תשוה  
 עליו: 6 כי תשיתהו ברכות לעד תחדהו בשמחה את  
 פניך: 7 כי המלך בטח ביהוה ובחסד עליון בל ימוט:  
 8 תמצא ירך לכל איביך ימינך תמצא שנאיך: 9 תשיתמו  
 כתנור אש לעת פניך יהוה באפו יבלעם ותאכלם אש:  
 10 פרימו מארץ תאבד וזרעם מבני אדם: 11 כי נטו  
 עליך רעה חשבו מזמה בל יוכלו: 12 כי תשיתמו שכם  
 במיתריך תכונן על פניהם: 13 רומה יהוה בעזך נשירה  
 ונזמרה גבורתך:

## 22

1 למנצח על אילת השחר מזמור לדוד אלי אלי  
 למה עזבתני רחוק מישועתי דברי שאנתי: 2 אלהי  
 אקרא יומם ולא תענה ולילה ולא דומיה לי: 3 ואתה  
 קדוש יושב תהלות ישראל: 4 בכך בטחו אבותינו בטחו  
 ותפלטמו: 5 אליך זעקו ונמלטו בכך בטחו ולא בושו:  
 6 ואנכי תולעת ולא איש חרפת אדם ובזוי עם: 7 כל  
 ראי ילעגו לי יפטירו בשפה יניעו ראש: 8 גל אל יהוה  
 יפלטוהו יצילהו כי חפץ בו: 9 כי אתה גחוי מבטן מבטיחי  
 על שדי אמי: 10 עליך השלכתי מרחם מבטן אמי אלי  
 אתה: 11 אל תרחק ממני כי צרה קרובה כי אין עוזר:  
 12 סבבוני פרים רבים אבירי בשן כתרוני: 13 פצו עלי  
 פיהם אריה טרף ושאג: 14 כמים נשפכתי והתפרדו כל  
 עצמותי היה לבי כדונג נמס בתוך מעי: 15 יבש כחרש  
 כחי ולשוני מדבק מלקוחי ולעפר מות תשפתני: 16 כי  
 סבבוני כלבים עדת מרעים הקיפוני כארי ידי ורגלי:  
 17 אספר כל עצמותי המה יביטו יראו בי: 18 יחלקו בגדי  
 להם ועל לבושי יפילו גורל: 19 ואתה יהוה אל תרחק  
 אילותי לעזרתי חושה: 20 הצילה מחרב נפשי מיד כלב  
 יחידתי: 21 הושיעני מפי אריה ומקרני רמים עניתני:  
 22 אספרה שמך לאחי בתוך קהל אהללך: 23 יראי  
 יהוה הללוהו כל זרע יעקב כבדוהו וגורו ממנו כל זרע  
 ישראל: 24 כי לא בזה ולא שקץ ענות עני ולא הסתיר  
 פניו ממנו ובשועו אליו שמע: 25 מאתך תהלתי בקהל רב  
 נדרי אשלם נגד יראיו: 26 יאכלו ענוים וישבעו יהללו

יהוה דרשיו יחי לבבכם לעד: <sup>27</sup> יזכרו וישבו אל יהוה כל אפסי ארץ וישתחוו לפניך כל משפחות גוים: <sup>28</sup> כי ליהוה המלוכה ומשל בגוים: <sup>29</sup> אכלו וישתחוו כל דשני ארץ לפניו יכרעו כל יורדי עפר ונפשו לא חיה: <sup>30</sup> זרע יעבדנו יספר לאדני לדור: <sup>31</sup> יבאו ויגידו צדקתו לעם נולד כי עשה:

## 23

<sup>1</sup> מזמור לדוד יהוה רעי לא אחסר: <sup>2</sup> בנאות דשא ירביצני על מי מנחות ינהלני: <sup>3</sup> נפשי ישובב ינחני במעגלי צדק למען שמו: <sup>4</sup> גם כי אלך בגיא צלמות לא אירא רע כי אתה עמדי שבטך ומשענתך המה ינחמני: <sup>5</sup> תערך לפני שלחן נגד צררי דשנת בשמן ראשי כוסי רויה: <sup>6</sup> אך טוב וחסד ירדפוני כל ימי חיי ושבתני בבית יהוה לארץ ימים:

## 24

<sup>1</sup> לדוד מזמור ליהוה הארץ ומלואה תבל וישבי בה: <sup>2</sup> כי הוא על ימים יסדה ועל נהרות יכוננה: <sup>3</sup> מי יעלה בהר יהוה ומי יקום במקום קדשו: <sup>4</sup> נקי כפים ובר לבב אשר לא נשא לשוא נפשי ולא נשבע למרמה: <sup>5</sup> ישא ברכה מאת יהוה וצדקה מאלהי ישעו: <sup>6</sup> זה דור דרשו מבקשי פניך יעקב סלה: <sup>7</sup> שאו שערים ראשיכם והנשאו פתחי עולם ויבוא מלך הכבוד: <sup>8</sup> מי זה מלך הכבוד יהוה עזוז וגבור יהוה גבור מלחמה: <sup>9</sup> שאו שערים ראשיכם ושאו פתחי עולם ויבא מלך הכבוד: <sup>10</sup> מי הוא זה מלך הכבוד יהוה צבאות הוא מלך הכבוד סלה:

## 25

1 לדוד אליך יהוה נפשי אשא: 2 אלהי בך בטחתי  
 אל אבושה אל יעלצו איבי לי: 3 גם כל קויך לא יבשו  
 יבשו הבוגדים ריקם: 4 דרכיך יהוה הודיעני ארחותיך  
 למדני: 5 הדריכני באמתך ולמדני כי אתה אלהי ישעי  
 אותך קויתי כל היום: 6 זכר רחמיך יהוה וחסדיך כי  
 מעולם המה: 7 חטאות נעורי ופשעי אל תזכר כחסדך  
 זכר לי אתה למען טובך יהוה: 8 טוב וישר יהוה על  
 כן יורה חטאים בדרך: 9 ידרך עניים במשפט וילמד  
 עניים דרכו: 10 כל ארחות יהוה חסד ואמת לנצרי  
 בריתו ועדתיו: 11 למען שמך יהוה וסלחת לעוני כי  
 רב הוא: 12 מי זה האיש ירא יהוה יורנו בדרך יבחר:  
 13 נפשו בטוב תלין וזרעו יירש ארץ: 14 סוד יהוה  
 ליראיו ובריתו להודיעם: 15 עיני תמיד אל יהוה כי הוא  
 יוציא מרשת רגלי: 16 פנה אלי וחנני כי יחיד ועני אני:  
 17 צרות לבבי הרחיבו ממצוקותי הוציאני: 18 ראה עניי  
 ועמלי ושא לכל חטאותי: 19 ראה אויבי כי רבו ושנאת  
 חמס שנאוני: 20 שמרה נפשי והצילני אל אבוש כי חסיתי  
 בך: 21 תם וישר יצרוני כי קויתיך: 22 פדה אלהים את  
 ישראל מכל צרותיו:

## 26

1 לדוד שפטני יהוה כי אני בתמי הלכתי וביהוה  
 בטחתי לא אמער: 2 בחנני יהוה ונסני צרופה כליותי  
 ולבי: 3 כי חסדך לנגד עיני והתהלכתי באמתך: 4 לא  
 ישבתי עם מתי שוא ועם נעלמים לא אבוא: 5 שנאתי  
 קהל מרעים ועם רשעים לא אשב: 6 ארחץ בנקיון

כפי ואסבבה את מזבחתך יהוה: 7 לשמע בקול תודה  
 ולספר כל נפלאותיך: 8 יהוה אהבתי מעון ביתך ומקום  
 משכן כבודך: 9 אל תאסף עם חטאים נפשי ועם אנשי  
 דמים חיי: 10 אשר בידיהם זמה וימינם מלאה שחר:  
 11 ואני בתמי אלך פדני וחסני: 12 רגלי עמדה במישור  
 במקהלים אברך יהוה:

## 27

1 לדוד יהוה אורי וישעי ממי אירא יהוה מעוז חיי  
 ממי אפחד: 2 בקרב עלי מרעים לאכל את בשרי צרי  
 ואיבי לי המה כשלו ונפלו: 3 אם תחנה עלי מחנה לא  
 יירא לבי אם תקום עלי מלחמה בזאת אני בוטח: 4 אחת  
 שאלתי מאת יהוה אותה אבקש שבתי בבית יהוה כל  
 ימי חיי לחזות בנעם יהוה ולבקר בהיכלו: 5 כי יצפנני  
 בסכה ביום רעה יסתרני בסתר אהלו בצור ירוממני:  
 6 ועתה ירום ראשי על איבי סביבותי ואזבחה באהלו  
 זבחי תרועה אשירה ואזמרה ליהוה: 7 שמע יהוה קולי  
 אקרא וחסני וענני: 8 לך אמר לבי בקשו פני את פניך  
 יהוה אבקש: 9 אל תסתר פניך ממני אל תט באף עבדך  
 עזרתי היית אל תשני ואל תעזבני אלהי ישעי: 10 כי  
 אבי ואמי עזבוני ויהוה יאספני: 11 הורני יהוה דרכך  
 ונחני בארח מישור למען שוררי: 12 אל תתנני בנפש  
 צרי כי קמו בי עדי שקר ויפח חמס: 13 לולא האמנתי  
 לראות בטוב יהוה בארץ חיים: 14 קוה אל יהוה חזק  
 ויאמץ לבך וקוה אל יהוה:



## 28

1 לדוד אליך יהוה אקרא צורי אל תחרש ממני פן  
 תחשה ממני ונמשלתי עם יורדי בור: 2 שמע קול תחנוני  
 בשועי אליך בנשאי ידי אל דביר קדשך: 3 אל תמשכני  
 עם רשעים ועם פעלי און דברי שלום עם רעיהם ורעה  
 בלבבם: 4 תן להם כפעלם וכרע מעלליהם כמעשה  
 ידיהם תן להם השב גמולם להם: 5 כי לא יבינו אל  
 פעלת יהוה ואל מעשה ידיו יהרסם ולא יבנם: 6 ברוך  
 יהוה כי שמע קול תחנוני: 7 יהוה עזי ומגני בו בטח  
 לבי ונעזרתי ויעלז לבי ומשירי אהודנו: 8 יהוה עז למו  
 ומעוז ישועות משיחו הוא: 9 הושיעה את עמך וברך את  
 נחלתך ורעם ונשאם עד העולם:

## 29

1 מזמור לדוד הבו ליהוה בני אלים הבו ליהוה כבוד  
 ועז: 2 הבו ליהוה כבוד שמו השתחוו ליהוה בהדרת  
 קדש: 3 קול יהוה על המים אל הכבוד הרעים יהוה  
 על מים רבים: 4 קול יהוה בכח קול יהוה בהדר:  
 5 קול יהוה שבר ארזים וישבר יהוה את ארזי הלבנון:  
 6 וירקידם כמו עגל לבנון ושרין כמו בן ראמים: 7 קול  
 יהוה חצב להבות אש: 8 קול יהוה יחיל מדבר יחיל  
 יהוה מדבר קדש: 9 קול יהוה יחולל אילות ויחשף  
 יערות ובהיכלו כלו אמר כבוד: 10 יהוה למבול ישב  
 וישב יהוה מלך לעולם: 11 יהוה עז לעמו יתן יהוה  
 יברך את עמו בשלום:

## 30

1 מזמור שיר חנכת הבית לדוד ארוממך יהוה כי  
 דליתני ולא שמחת איבי לי: 2 יהוה אלהי שועתי אליך  
 ותרפאני: 3 יהוה העלית מן שאול נפשי חייתני מיורדי  
 בור: 4 זמרו ליהוה חסידיו והודו לזכר קדשו: 5 כי  
 רגע באפו חיים ברצונו בערב ילין בכי ולבקר רנה:  
 6 ואני אמרתי בשלוי בל אמוט לעולם: 7 יהוה ברצונך  
 העמדתה להררי עז הסתרת פניך הייתי נבהל: 8 אליך  
 יהוה אקרא ואל אדני אתחנן: 9 מה בצע בדמי ברדתי  
 אל שחת היודך עפר היגיד אמתך: 10 שמע יהוה וחנני  
 יהוה היה עזר לי: 11 הפכת מספדי למחול לי פתחת  
 שקי ותאזרני שמחה: 12 למען יזמרך כבוד ולא ידם  
 יהוה אלהי לעולם אודך:

## 31

1 למנצח מזמור לדוד בך יהוה חסיתי אל אבושה  
 לעולם בצדקתך פלטני: 2 הטח אלי אונך מהרה  
 הצילני היה לי לצור מעוז לבית מצודות להושיעני:  
 3 כי סלעי ומצודתי אתה ולמען שמך תנחני ותנהלני:  
 4 תוציאני מרשת זו טמנו לי כי אתה מעוזי: 5 בידך  
 אפקיד רוחי פדיתה אותי יהוה אל אמת: 6 שנאתי  
 השמרים הבלי שוא ואני אל יהוה בטחתי: 7 אגילה  
 ואשמחה בחסדך אשר ראית את עניי ידעת בצרות  
 נפשי: 8 ולא הסגרתני ביד אויב העמדת במרחב רגלי:  
 9 חנני יהוה כי צר לי עששה בכעס עיני נפשי ובטני:  
 10 כי כלו ביגוןי חיי ושנותי באנחה כשל בעוניי כחי

ועצמי עששו: 11 מכל צררי הייתי חרפה ולשכני מאד  
 ופחד למידעי ראי בחוץ נדרו ממני: 12 נשכחתי כמת  
 מלב הייתי ככלי אבד: 13 כי שמעתי דבת רבים מגור  
 מסביב בהוסדם יחד עלי לקחת נפשי זממו: 14 ואני  
 עליך בטחתי יהוה אמרתי אלהי אתה: 15 בידך עתתי  
 הצילני מיד אויבי ומרדפי: 16 האירה פניך על עבדך  
 הושיעני בחסדך: 17 יהוה אל אבושה כי קראתיך יבשו  
 רשעים ידמו לשאול: 18 תאלמנה שפתי שקר הדברות  
 על צדיק עתק בגאווה ובוז: 19 מה רב טובך אשר צפנת  
 ליראיך פעלת לחסים בך נגד בני אדם: 20 תסתירם  
 בסתר פניך מרכסי איש תצפנם בסכה מריב לשנות:  
 21 ברוך יהוה כי הפליא חסדו לי בעיר מצור: 22 ואני  
 אמרתי בחפזי נגרותי מנגד עיניך אכן שמעת קול תחנוני  
 בשועי אליך: 23 אהבו את יהוה כל חסידיו אמונים נצר  
 יהוה ומשלם על יתר עשה גאווה: 24 חזקו ויאמץ לבבכם  
 כל המיחלים ליהוה:

## 32

1 לרוד משכיל אשרי נשוי פשע כסוי חטאה: 2 אשרי  
 אדם לא יחשב יהוה לו עון ואין ברוחו רמיה: 3 כי  
 החרשתי בלו עצמי בשאנתי כל היום: 4 כי יומם ולילה  
 תכבד עלי ידך נהפך לשדי בחרבני קיץ סלה: 5 חטאתי  
 אודיעך ועוני לא כסיתי אמרתי אודה עלי פשעי ליהוה  
 ואתה נשאת עון חטאתי סלה: 6 על זאת יתפלל כל חסיד  
 אליך לעת מצא רק לשטף מים רבים אליו לא יגיעו:  
 7 אתה סתר לי מצר תצרני רני פלט תסובבני סלה:

8 אשכילך ואורך בדרך זו תלך איעצה עליך עיני: 9 אל תהיו כסוס כפרד אין הבין במתג ורסן עדין לבלום בל קרב אליך: 10 רבים מכאובים לרשע והבוטח ביהוה חסד יסובבנו: 11 שמחו ביהוה וגילו צדיקים והרנינו כל ישרי לב:

### 33

1 רננו צדיקים ביהוה לישרים נאווה תהלה: 2 הודו ליהוה בכנור בנבל עשור זמרו לו: 3 שירו לו שיר חדש היטיבו נגן בתרועה: 4 כי ישר דבר יהוה וכל מעשהו באמונה: 5 אהב צדקה ומשפט חסד יהוה מלאה הארץ: 6 בדבר יהוה שמים נעשו וברוח פיו כל צבאם: 7 כנס כנר מי הים נתן באצרות תהומות: 8 ייראו מיהוה כל הארץ ממנו יגורו כל ישרי תבל: 9 כי הוא אמר ויהי הוא צוה ויעמד: 10 יהוה הפיר עצת גוים הניא מחשבות עמים: 11 עצת יהוה לעולם תעמד מחשבות לבו לדר ודר: 12 אשרי הגוי אשר יהוה אלהיו העם בחר לנחלה לו: 13 משמים הביט יהוה ראה את כל בני האדם: 14 ממכון שבתו השגיח אל כל ישרי הארץ: 15 היצר יחד לבם המבין אל כל מעשיהם: 16 אין המלך נושע ברב חיל גבור לא ינצל ברב כח: 17 שקר הסוס לתשועה וברב חילו לא ימלט: 18 הנה עין יהוה אל יראיו למיחלים לחסדו: 19 להציל ממות נפשם ולחיותם ברעב: 20 נפשנו חכתה ליהוה עזרנו ומגננו הוא: 21 כי בו ישמח לבנו כי בשם קדשו בטחנו: 22 יהי חסדך יהוה עלינו כאשר יחלנו לך:

## 34

1 לדוד בשנותו את טעמו לפני אבימלך ויגרשהו  
 וילך אברכה את יהוה בכל עת תמיד תהלתו בפי:  
 2 ביהוה תתהלל נפשי ישמעו עניים וישמחו: 3 גדלו  
 ליהוה אתי ונרוממה שמו יחדו: 4 דרשתי את יהוה וענני  
 ומכל מגורותי הצילני: 5 הביטו אליו ונהרו ופניהם אל  
 יחפרו: 6 זה עני קרא ויהוה שמע ומכל צרותיו הושיעו:  
 7 חנה מלאך יהוה סביב ליראיו ויחלצם: 8 טעמו וראו  
 כי טוב יהוה אשרי הגבר יחסה בו: 9 יראו את יהוה  
 קדשו כי אין מחסור ליראיו: 10 כפירים רשו ורעבו  
 ודרשי יהוה לא יחסרו כל טוב: 11 לכו בנים שמעו לי  
 יראת יהוה אלמדכם: 12 מי האיש החפץ חיים אהב ימים  
 לראות טוב: 13 נצר לשונך מרע ושפתיך מדבר מרמה:  
 14 סור מרע ועשה טוב בקש שלום ורדפהו: 15 עיני  
 יהוה אל צדיקים ואזניו אל שועתם: 16 פני יהוה בעשי  
 רע להכרית מארץ זכרם: 17 צעקו ויהוה שמע ומכל  
 צרותם הצילם: 18 קרוב יהוה לנשברי לב ואת דכאי  
 רוח יושיע: 19 רבות רעות צדיק ומכלם יצילנו יהוה:  
 20 שמר כל עצמותיו אחת מהנה לא נשברה: 21 תמותת  
 רשע רעה ושנאי צדיק יאשמו: 22 פודה יהוה נפש עבדיו  
 ולא יאשמו כל החסים בו:

## 35

1 לדוד ריבה יהוה את יריבי לחם את לחמי: 2 החזק  
 מגן וצנה וקומה בעזרתי: 3 והרק חנית וסגר לקראת  
 רדפי אמר לנפשי ישעתך אני: 4 יבשו ויכלמו מבקשי  
 נפשי יסגו אחור ויחפרו חשבי רעתי: 5 יהיו כמץ לפני

רוח ומלאך יהוה רוחה: 6 יהי דרכם חשך וחלקלקות ומלאך יהוה רדפם: 7 כי חנם טמנו לי שחת רשתם חנם חפרו לנפשי: 8 תבואהו שואה לא ידע ורשתו אשר טמן תלכדו בשואה יפל בה: 9 ונפשי תגיל ביהוה תשיש בישועתו: 10 כל עצמותי תאמרנה יהוה מי כמוך מציל עני מחזק ממנו ועני ואביון מגזלו: 11 יקומו עדי חמס אשר לא ידעתי ישאלוני: 12 ישלמוני רעה תחת טובה שכול לנפשי: 13 ואני בחלותם לבושי שק עניתי בצום נפשי ותפלתי על חיקי תשוב: 14 כרע כאח לי התהלכתי כאבל אם קדר שחותי: 15 ובצלעי שמחו ונאספו נאספו עלי נכים ולא ידעתי קרעו ולא דמו: 16 בחנפי לעני מעוג חרק עלי שנימו: 17 אדני כמה תראה השיבה נפשי משאיהם מכפירים יחידתי: 18 אודך בקהל רב בעם עצום אהללך: 19 אל ישמחו לי איבי שקר שנאי חנם יקרצו עין: 20 כי לא שלום ידברו ועל רגעי ארץ דברי מרמות יחשבון: 21 וירחיבו עלי פיהם אמרו האח האח ראתה עינינו: 22 ראיתה יהוה אל תחרש אדני אל תרחק ממני: 23 העירה והקיצה למשפטי אלהי ואדני לריבי: 24 שפטני כצדקך יהוה אלהי ואל ישמחו לי: 25 אל יאמרו בלבם האח נפשנו אל יאמרו בלענוהו: 26 יבשו ויחפרו יחדו שמחי רעתי ילבשו בשת וכלמה המגדילים עלי: 27 ירנו וישמחו חפצי צדקי ויאמרו תמיד יגדל יהוה החפץ שלום עבדו: 28 ולשוני תהגה צדקך כל היום תהלתך:

## 36

1 למנצח לעבד יהוה לדוד נאם פשע לרשע בקרב לבי אין פחד אלהים לנגד עיניו: 2 כי החליק אליו בעיניו למצא עונו לשנא: 3 דברי פיו און ומרמה חדל להשכיל להיטיב: 4 און יחשב על משכבו יתיצב על דרך לא טוב רע לא ימאס: 5 יהוה בהשמים חסדך אמונתך עד שחקים: 6 צדקתך כהררי אל משפטך תהום רבה אדם ובהמה תושיע יהוה: 7 מה יקר חסדך אלהים ובני אדם בצל כנפיך יחסיון: 8 ירוין מדשן ביתך ונחל עדניך תשקם: 9 כי עמד מקור חיים באורך נראה אור: 10 משך חסדך לידעיך וצדקתך לישרי לב: 11 אל תבואני רגל גאווה ויד רשעים אל תדני: 12 שם נפלו פעלי און דחו ולא יכלו קום:

## 37

1 לדוד אל תתחר במרעים אל תקנא בעשי עולה: 2 כי כחציר מהרה ימלו וכירק דשא יבולון: 3 בטח ביהוה ועשה טוב שכן ארץ ורעה אמונה: 4 והתענג על יהוה ויתן לך משאלת לבך: 5 גול על יהוה דרכך ובטח עליו והוא יעשה: 6 והוציא כאור צדקך ומשפטך כצהרים: 7 דום ליהוה והתחולל לו אל תתחר במצליח דרכו באיש עשה מזמות: 8 הרף מאף ועזב חמה אל תתחר אך להרע: 9 כי מרעים יכרתון וקוי יהוה חמה יירשו ארץ: 10 ועוד מעט ואין רשע והתבוננת על מקומו ואיננו: 11 ועניים יירשו ארץ והתענגו על רב שלום: 12 זמם

רשע לצדיק וחרק עליו שניו: 13 אדני ישחק לו כי  
 ראה כי יבא יומו: 14 חרב פתחו רשעים ודרכו קשתם  
 להפיל עני ואביון לטבוח ישרי דרך: 15 חרבם תבוא  
 בלבם וקשתותם תשברנה: 16 טוב מעט לצדיק מהמון  
 רשעים רבים: 17 כי זרועות רשעים תשברנה וסומך  
 צדיקים יהוה: 18 יודע יהוה ימי תמימם ונחלתם לעולם  
 תהיה: 19 לא יבשו בעת רעה ובימי רעבון ישבעו:  
 20 כי רשעים יאבדו ואיבי יהוה כיקר כרים כלו בעשן  
 כלו: 21 לזה רשע ולא ישלם וצדיק חונן ונותן: 22 כי  
 מברכיו יירשו ארץ ומקלליו יכרתו: 23 מיהוה מצעדי  
 גבר כוננו ודרכו יחפץ: 24 כי יפל לא יוטל כי יהוה  
 סומך ידו: 25 נער הייתי גם זקנתי ולא ראיתי צדיק  
 נעזב וזרעו מבקש לחם: 26 כל היום חונן ומלוה וזרעו  
 לברכה: 27 סור מרע ועשה טוב ושכן לעולם: 28 כי  
 יהוה אהב משפט ולא יעזב את חסידיו לעולם נשמרו  
 וזרע רשעים נכרת: 29 צדיקים יירשו ארץ וישכנו לעד  
 עליה: 30 פי צדיק יהגה חכמה ולשונו תדבר משפט:  
 31 תורת אלהיו בלבו לא תמעד אשריו: 32 צופה רשע  
 לצדיק ומבקש להמיתו: 33 יהוה לא יעזבנו בידו ולא  
 ירשיענו בהשפטו: 34 קוה אל יהוה ושמר דרכו וירוממך  
 לרשת ארץ בהכרת רשעים תראה: 35 ראיתי רשע עריץ  
 ומתערה כאזרח רענן: 36 ויעבר והנה איננו ואבקשהו  
 ולא נמצא: 37 שמר תם וראה ישר כי אחרית לאיש  
 שלום: 38 ופשעים נשמדו יחדו אחרית רשעים נכרתה:  
 39 ותשועת צדיקים מיהוה מעוזם בעת צרה: 40 ויעזרם



יהוה ויפלטם יפלטם מרשעים ויושיעם כי חסו בו:

## 38

1 מזמור לדוד להזכיר יהוה אל בקצפך תוכיחני  
 ובחמתך תיסרני: 2 כי חציך נחתו בי ותנחת עלי ירך:  
 3 אין מתם בבשרי מפני זעמך אין שלום בעצמי מפני  
 חטאתי: 4 כי עונתי עברו ראשי כמשא כבד יכבדו ממני:  
 5 הבאישו נמקו חבורתי מפני אולתי: 6 נעויתי שחתי עד  
 מאד כל היום קדר הלכתי: 7 כי כסלי מלאו נקלה  
 ואין מתם בבשרי: 8 נפונותי ונדכיתי עד מאד שאנתי  
 מנהמת לבי: 9 אדני נגדך כל תאותי ואנחתי ממך לא  
 נסתרה: 10 לבי סחרחר עזבני כחי ואור עיני גם הם  
 אין אתי: 11 אהבי ורעי מנגד ננעי יעמדו וקרובי מרחק  
 עמדו: 12 וינקשו מבקשי נפשי ודרשי רעתי דברו הוות  
 ומרמות כל היום יהגו: 13 ואני כחרש לא אשמע וכאלם  
 לא יפתח פיו: 14 ואהי כאיש אשר לא שמע ואין בפיו  
 תוכחות: 15 כי לך יהוה הוחלתי אתה תענה אדני אלהי:  
 16 כי אמרתי פן ישמחו לי במוט רגלי עלי הגדילו:  
 17 כי אני לצלע נכון ומכאובי נגדי תמיד: 18 כי עוני  
 אגיד אדאג מחטאתי: 19 ואיבי חיים עצמו ורבו שנאי  
 שקר: 20 ומשלמי רעה תחת טובה ישטנוני תחת רדופי  
 טוב: 21 אל תעזבני יהוה אלהי אל תרחק ממני: 22 חושה  
 לעזרתי אדני תשועתי:

## 39

1 למנצח לידיתון מזמור לדוד אמרתי אשמרה דרכי  
 מחטוא בלשוני אשמרה לפי מחסום בעד רשע לנגדי:  
 2 נאלמתי דומיה החשיתי משוב וכאבי נעכר: 3 חם לבי

בקרבי בהגיגי תבער אש דברתי בלשוני: 4 הודיעני יהוה קצי ומדת ימי מה היא אדעה מה חדל אני: 5 הנה שפחות נתתה ימי וחלדי כאין נגדך אך כל הבל כל אדם נצב סלה: 6 אך בצלם יתהלך איש אך הבל יהמיון יצבר ולא ידע מי אספם: 7 ועתה מה קויתי אדני תוחלתי לך היא: 8 מכל פשעי הצילני חרפת נבל אל תשימני: 9 נאלמתי לא אפתח פי כי אתה עשית: 10 הסר מעלי נגעך מתגרת ירך אני כליתי: 11 בתוכחות על עון יסרת איש ותמס כעש חמודו אך הבל כל אדם סלה: 12 שמעה תפלתי יהוה ושועתי האזינה אל דמעתי אל תחרש כי גר אנכי עמך תושב ככל אבותי: 13 השע ממני ואבליגה בטרם אלך ואינני:

## 40

1 למנצח לדוד מזמור קוה קויתי יהוה ויט אלי וישמע שועתי: 2 ויעלני מבור שאון מטיט היון ויקם על סלע רגלי כונן אשרי: 3 ויתן בפי שיר חדש תהלה לאלהינו יראו רבים וייראו ויבטחו ביהוה: 4 אשרי הגבר אשר שם יהוה מבטחו ולא פנה אל רהבים ושטי כזב: 5 רבות עשית אתה יהוה אלהי נפלאותך ומחשבתך אלינו אין ערך אליך אנידה ואדברה עצמו מספר: 6 זבח ומנחה לא חפצת אזנים כרית לי עולה וחטאה לא שאלת: 7 אז אמרתי הנה באתי במגלת ספר כתוב עלי: 8 לעשות רצונך אלהי חפצתי ותורתך בתוך מעי: 9 בשרתי צדק בקהל רב הנה שפתי לא אכלא יהוה אתה ידעת: 10 צדקתך לא כסיתי בתוך לבי אמונתך

ותשועתך אמרתי לא כחדתי חסדך ואמתך לקהל רב:  
 11 אתה יהוה לא תכלא רחמיך ממני חסדך ואמתך  
 תמיד יצרוני: 12 כי אפפו עלי רעות עד אין מספר  
 השיגוני עונתי ולא יכלתי לראות עצמו משערות ראשי  
 ולבי עזבני: 13 רצה יהוה להצילני יהוה לעזרתי חושה:  
 14 יבשו ויחפרו יחד מבקשי נפשי לספותה יסגו אחור  
 ויכלמו חפצי רעתי: 15 ישמו על עקב בשתם האמרים  
 לי האח האח: 16 ישישו וישמחו בך כל מבקשיך יאמרו  
 תמיד יגדל יהוה אהבי תשועתך: 17 ואני עני ואביון אדני  
 יחשב לי עזרתי ומפלטי אתה אלהי אל תאחר:

## 41

1 למנצח מזמור לדוד אשרי משכיל אל דל ביום רעה  
 ימלטהו יהוה: 2 יהוה ישמרהו ויחיהו יאשר בארץ ואל  
 תתנהו בנפש איביו: 3 יהוה יסעדנו על ערש דוי כל  
 משכבו הפכת בחליו: 4 אני אמרתי יהוה חנני רפאה  
 נפשי כי חטאתי לך: 5 אויבי יאמרו רע לי מתי ימות  
 ואבד שמו: 6 ואם בא לראות שוא ידבר לבו יקבץ  
 און לו יצא לחוץ ידבר: 7 יחד עלי יתלחשו כל שנאי  
 עלי יחשבו רעה לי: 8 דבר בליעל יצוק בו ואשר  
 שכב לא יוסיף לקום: 9 גם איש שלומי אשר בטחתי  
 בו אוכל לחמי הגדיל עלי עקב: 10 ואתה יהוה חנני  
 והקימני ואשלמה להם: 11 בזאת ידעתי כי חפצת בי  
 כי לא יריע איבי עלי: 12 ואני בתמי תמכת בי ותציבני  
 לפניך לעולם: 13 ברוך יהוה אלהי ישראל מהעולם  
 ועד העולם אמן ואמן:

## 42

1 למנצח משכיל לבני קרח כאיל תערג על אפיקי  
 מים כן נפשי תערג אליך אלהים: 2 צמאה נפשי לאלהים  
 לאל חי מתי אבוא ואראה פני אלהים: 3 היתה לי דמעתי  
 לחם יומם ולילה באמר אלי כל היום איה אלהיך:  
 4 אלה אזכרה ואשפכה עלי נפשי כי אעבר בסך אדרם  
 עד בית אלהים בקול רנה ותודה המון חוגג: 5 מה  
 תשתוחחי נפשי ותהמי עלי הוחילי לאלהים כי עוד  
 אודנו ישועות פניו: 6 אלהי עלי נפשי תשתוחח על כן  
 אזכרך מארץ ירדן וחרמונים מהר מצער: 7 תהום אל  
 תהום קורא לקול צנוריד כל משבריד וגליך עלי עברו:  
 8 יומם יצוה יהוה חסדו ובלילה שירה עמי תפלה לאל  
 חי: 9 אומרה לאל סלעי למה שכחתני למה קדר אלך  
 בלחץ אויב: 10 ברצח בעצמותי חרפוני צוררי באמרם  
 אלי כל היום איה אלהיך: 11 מה תשתוחחי נפשי ומה  
 תהמי עלי הוחילי לאלהים כי עוד אודנו ישועת פני  
 ואלהי:

## 43

1 שפטני אלהים וריבה ריבי מגוי לא חסיד מאיש  
 מרמה ועולה תפלטני: 2 כי אתה אלהי מעוזי למה  
 זנחתני למה קדר אתהלך בלחץ אויב: 3 שלח אורך  
 ואמתך המה ינחוני יביאוני אל הר קדשך ואל  
 משכנותיך: 4 ואבואה אל מזבח אלהים אל אל שמחת  
 גילי ואודך בכנור אלהים אלהי: 5 מה תשתוחחי נפשי  
 ומה תהמי עלי הוחילי לאלהים כי עוד אודנו ישועת  
 פני ואלהי:

## 44

1 למנצח לבני קרח משכיל אלהים באזנינו שמענו  
 אבותינו ספרו לנו פעל פעלת בימיהם בימי קדם:  
 2 אתה ירך גוים הורשת ותטעם תרע לאמים ותשלחם:  
 3 כי לא בחרבם ירשו ארץ וזרועם לא הושיעה לנו כי  
 ימינך וזרועך ואור פניך כי רציתם: 4 אתה הוא מלכי  
 אלהים צוה ישועות יעקב: 5 בך צרינו נגח בשמך נבוס  
 קמינו: 6 כי לא בקשתי אבטח וחרבי לא תושיעני: 7 כי  
 הושעתנו מצרינו ומשנאינו הבישות: 8 באלהים הללנו  
 כל היום ושמך לעולם נודה סלה: 9 אף זנחת ותכלימנו  
 ולא תצא בצבאותינו: 10 תשיבנו אחר מני צר ומשנאינו  
 שסו לנו: 11 תתננו כצאן מאכל ובגוים זריתנו: 12 תמכר  
 עמך בלא הון ולא רבית במחיריהם: 13 תשימנו חרפה  
 לשכנינו לעג וקלס לסביבותינו: 14 תשימנו משל בגוים  
 מנוד ראש בל אמים: 15 כל היום כלמתי נגדי ובשת פני  
 כסתני: 16 מקול מחרף ומגדף מפני אויב ומתנקם: 17 כל  
 זאת באתנו ולא שכחנוך ולא שקרנו בבריתך: 18 לא נסוג  
 אחר לבנו ותט אשרינו מני ארחך: 19 כי דכיתנו במקום  
 תנים ותכס עלינו בצלמות: 20 אם שכחנו שם אלהינו  
 ונפרש כפינו לאל זר: 21 הלא אלהים יחקר זאת כי הוא  
 ידע תעלמות לב: 22 כי עליך הרגנו כל היום נחשבנו  
 כצאן טבחה: 23 עורה למה תישן אדני הקיצה אל תזנח  
 לנצח: 24 למה פניך תסתיר תשכח ענינו ולחצנו: 25 כי  
 שחה לעפר נפשנו דבקה לארץ בטננו: 26 קומה עזרתה  
 לנו ופדנו למען חסדך:

## 45

1 למנצח על ששנים לבני קרח משכיל שיר יודית  
 רחש לבי דבר טוב אמר אני מעשי למלך לשוני עט  
 סופר מהיר: 2 יפיית מבני אדם הוצק חן בשפתותיך  
 על כן ברכך אלהים לעולם: 3 חגור חרבך על ירך  
 גבור הודך והדרך: 4 והדרך צלח רכב על דבר  
 אמת וענוה צדק ותורך נוראות ימינך: 5 חציך שנונים  
 עמים תחתוך יפלו בלב אויבי המלך: 6 כסאך אלהים  
 עולם ועד שבט מישר שבט מלכותך: 7 אהבת צדק  
 ותשנא רשע על כן משחך אלהים אלהיך שמן ששון  
 מחברריך: 8 מר ואהלות קציעות כל בגדתיך מן היכלי  
 שן מני שמחוך: 9 בנות מלכים ביקרותיך נצבה שגל  
 לימינך בכתם אופיר: 10 שמעי בת וראי והטי אזנך  
 ושכחי עמך ובית אביך: 11 ויתאו המלך יפיך כי הוא  
 אדניך והשתחוי לו: 12 ובת צר במנחה פניך יחלו  
 עשירי עם: 13 כל כבודה בת מלך פנימה ממשבצות  
 זהב לבושה: 14 לרקמות תובל למלך בתולות אחריה  
 רעותיה מובאות לך: 15 תובלנה בשמחת וגיל תבאינה  
 בהיכל מלך: 16 תחת אבתך יהיו בניך תשיתמו לשרים  
 בכל הארץ: 17 אזכירה שמך בכל דר ודר על כן עמים  
 יהודך לעלם ועד:

## 46

1 למנצח לבני קרח על עלמות שיר אלהים לנו מחסה  
 ועז עזרה בצרות נמצא מאד: 2 על כן לא נירא בהמיר

ארץ ובמוט הרים בלב ימים: 3 יהמו יחמרו מימיו  
 ירעשו הרים בגאותו סלה: 4 נהר פלגיו ישמחו עיר  
 אלהים קדש משכני עליון: 5 אלהים בקרבה בל תמוט  
 יעזרה אלהים לפנות בקר: 6 המו גוים מטו ממלכות נתן  
 בקולו תמוג ארץ: 7 יהוה צבאות עמנו משגב לנו אלהי  
 יעקב סלה: 8 לכו חזו מפעלות יהוה אשר שם שמות  
 בארץ: 9 משבית מלחמות עד קצה הארץ קשת ישבר  
 וקצץ חנית עגלות ישרף באש: 10 הרפו ודעו כי אנכי  
 אלהים ארום בגוים ארום בארץ: 11 יהוה צבאות עמנו  
 משגב לנו אלהי יעקב סלה:

## 47

1 למנצח לבני קרח מזמור כל העמים תקעו כף  
 הריעו לאלהים בקול רנה: 2 כי יהוה עליון נורא מלך  
 גדול על כל הארץ: 3 ידבר עמים תחתינו ולאמים תחת  
 רגלינו: 4 יבחר לנו את נחלתנו את גאון יעקב אהב  
 סלה: 5 עלה אלהים בתרועה יהוה בקול שופר: 6 זמרו  
 אלהים זמרו זמרו למלכנו זמרו: 7 כי מלך כל הארץ  
 אלהים זמרו משכיל: 8 מלך אלהים על גוים אלהים ישב  
 על כסא קדשו: 9 נדיבי עמים נאספו עם אלהי אברהם  
 כי לאלהים מגני ארץ מאד נעלה:

## 48

1 שיר מזמור לבני קרח גדול יהוה ומהלל מאד בעיר  
 אלהינו הר קדשו: 2 יפה נוף משוש כל הארץ הר ציון

ורכתי צפון קרית מלך רב: <sup>3</sup> אלהים בארמנותיה נודע  
 למשגב: <sup>4</sup> כי הנה המלכים נועדו עברו יחדו: <sup>5</sup> המה  
 ראו כן תמהו נבהלו נחפזו: <sup>6</sup> רעדה אחזתם שם חיל  
 כולדה: <sup>7</sup> ברוח קדים תשבר אניות תרשיש: <sup>8</sup> כאשר  
 שמענו כן ראינו בעיר יהוה צבאות בעיר אלהינו אלהים  
 יכוננה עד עולם סלה: <sup>9</sup> דמינו אלהים חסדך בקרב  
 היכלך: <sup>10</sup> כשמך אלהים כן תהלתך על קצוי ארץ  
 צדק מלאה ימינך: <sup>11</sup> ישמח הר ציון תגלנה בנות יהודה  
 למען משפטיך: <sup>12</sup> סבו ציון והקיפוח ספרו מגדליה:  
<sup>13</sup> שיתו לבכם לחילה פסגו ארמנותיה למען תספרו  
 לדור אחרון: <sup>14</sup> כי זה אלהים אלהינו עולם ועד הוא  
 ינהגנו על מות:

## 49

<sup>1</sup> למנצח לבני קרח מזמור שמעו זאת כל העמים  
 האזינו כל יושבי חלד: <sup>2</sup> גם בני אדם גם בני איש יחד  
 עשיר ואביון: <sup>3</sup> פי ידבר חכמות והגות לבי תבונות:  
<sup>4</sup> אטה למשל אזני אפתח בכנור חידתי: <sup>5</sup> למה אירא  
 בימי רע עון עקבי יסובני: <sup>6</sup> הבטחים על חילם וברב  
 עשרם יתהללו: <sup>7</sup> אח לא פדה יפדה איש לא יתן  
 לאלהים כפרו: <sup>8</sup> ויקר פדיון נפשם וחדל לעולם: <sup>9</sup> ויחי  
 עוד לנצח לא יראה השחת: <sup>10</sup> כי יראה חכמים ימותו  
 יחד כסיל ובער יאבדו ועזבו לאחרים חילם: <sup>11</sup> קרבם  
 בתימו לעולם משכנתם לדר ודר קראו בשמותם עלי  
 אדמות: <sup>12</sup> ואדם ביקר בל ילין נמשל כבהמות נדמו:  
<sup>13</sup> זה דרכם כסל למו ואחריהם בפיהם ירצו סלה:



14 כצאן לשאול שתו מות ירעם וירדו בם ישרים לבקר וצירם לבלות שאול מזבל לו: 15 אך אלהים יפרה נפשי מיד שאול כי יקחני סלה: 16 אל תירא כי יעשר איש כי ירבה כבוד ביתו: 17 כי לא במותו יקח הכל לא ירד אחריו כבודו: 18 כי נפשו בחייו יברך ויודך כי תיטיב לך: 19 תבוא עד דור אבותיו עד נצח לא יראו אור: 20 אדם ביקר ולא יבין נמשל כבהמות נדמו:

## 50

1 מזמור לאסף אל אלהים יהוה דבר ויקרא ארץ ממזרח שמש עד מבאו: 2 מציון מכלל יפי אלהים הופיע: 3 יבא אלהינו ואל יחרש אש לפניו תאכל וסביביו נשערה מאד: 4 יקרא אל השמים מעל ואל הארץ לדין עמו: 5 אספו לי חסידי כרתי בריתי עלי זבח: 6 ויגידו שמים צדקו כי אלהים שפט הוא סלה: 7 שמעה עמי ואדברה ישראל ואעידה בך אלהים אלהיך אנכי: 8 לא על זבחיך אוכיחך ועולתיך לנגדי תמיד: 9 לא אקח מביתך פר ממכלאתיך עתודים: 10 כי לי כל חיתו יער בהמות בהררי אלף: 11 ידעתי כל עוף הרים וזיז שדי עמדי: 12 אם ארעב לא אמר לך כי לי תבל ומלאה: 13 האוכל בשר אבירים ודם עתודים אשתה: 14 זבח לאלהים תודה ושלים לעליון נדריך: 15 וקראני ביום צרה אחלצך ותכבדני: 16 ולרשע אמר אלהים מה לך לספר חקי ותשא בריתי עלי פיך: 17 ואתה שנאת מוסר ותשלך דברי אחרים: 18 אם ראית

גנב ותרץ עמו ועם מנאפים חלקך: <sup>19</sup> פיך שלחת ברעה  
 ולשונך תצמיד מרמה: <sup>20</sup> תשב באחיך תדבר בבן אמך  
 תתן דפי: <sup>21</sup> אלה עשית והחרשתי דמית היות אהיה  
 כמוך אוכיחך ואערכה לעיניך: <sup>22</sup> בינו נא זאת שכחי  
 אלוה פן אטרף ואין מציל: <sup>23</sup> זבח תודה יכבדני ושם  
 דרך אראנו בישע אלהים:

## 51

<sup>1</sup> למנצח מזמור לדוד בבוא אליו נתן הנביא כאשר  
 בא אל בת שבע חנני אלהים כחסדך כרב רחמך  
 מחה פשעי: <sup>2</sup> הרבה כבסני מעוני ומחטאתי טהרני:  
<sup>3</sup> כי פשעי אני אדע וחטאתי נגדי תמיד: <sup>4</sup> לך לבדך  
 חטאתי והרע בעיניך עשיתי למען תצדק בדברך תזכה  
 בשפטך: <sup>5</sup> הן בעוון חוללתי ובחטא יחמתני אמי: <sup>6</sup> הן  
 אמת חפצת בטחות ובסתם חכמה תודיעני: <sup>7</sup> תחטאני  
 באזוב ואטהר תכבסני ומשלג אלבין: <sup>8</sup> תשמיעני ששון  
 ושמחה תגלנה עצמות דכית: <sup>9</sup> הסתר פניך מחטאי  
 וכל עונתי מחה: <sup>10</sup> לב טהור ברא לי אלהים ורוח  
 נכון חדש בקרבי: <sup>11</sup> אל תשליכני מלפניך ורוח קדשך  
 אל תקח ממני: <sup>12</sup> השיבה לי ששון ישעך ורוח נדיבה  
 תסמכני: <sup>13</sup> אלמדה פשעים דרכיך וחטאים אליך  
 ישובו: <sup>14</sup> הצילני מדמים אלהים אלהי תשועתי תרנן  
 לשוני צדקתך: <sup>15</sup> אדני שפתי תפתח ופי יגיד תהלתך:  
<sup>16</sup> כי לא תחפץ זבח ואתנה עולה לא תרצה: <sup>17</sup> זבחי  
 אלהים רוח נשברה לב נשבר ונרכה אלהים לא תבזה:

18 היטיבה ברצונך את ציון תבנה חומות ירושלים: 19 אז תחפץ זבחי צדק עולה וכליל אז יעלו על מזבחתך פרים:

## 52

1 למנצח משכיל לדוד בבוא דואג האדמי ויגד לשאול ויאמר לו בא דוד אל בית אחימלך מה תתהלל ברעה הגבור חסד אל כל היום: 2 הוות תחשב לשונך כתער מלטש עשה רמיה: 3 אהבת רע מטוב שקר מדבר צדק סלה: 4 אהבת כל דברי בלע לשון מרמה: 5 גם אל יתצך לנצח יחתך ויסחך מאהל ושרשך מארץ חיים סלה: 6 ויראו צדיקים וייראו ועליו ישחקו: 7 הנה הגבר לא ישים אלהים מעוזו ויבטח ברב עשרו יעז בהותו: 8 ואני כזית רענן בבית אלהים בטחתי בחסד אלהים עולם ועד: 9 אודך לעולם כי עשית ואקוה שמך כי טוב נגד חסידך:

## 53

1 למנצח על מחלת משכיל לדוד אמר נבל בלבו אין אלהים השחיתו והתעיבו עול אין עשה טוב: 2 אלהים משמים השקיף על בני אדם לראות היש משכיל דרש את אלהים: 3 כלו סג יחדו נאלחו אין עשה טוב אין גם אחד: 4 הלא ידעו פעלי און אכלי עמי אכלו לחם אלהים לא קראו: 5 שם פחדו פחד לא היה פחד כי אלהים פזר עצמות חנך הבשתה כי אלהים מאסם: 6 מי יתן מציון ישעות ישראל בשוב אלהים שבות עמו יגל יעקב ישמח ישראל:

## 54

1 למנצח בנגינת משכיל לדוד בבוא הזיפים ויאמרו  
 לשאול הלא דוד מסתתר עמנו אלהים בשמך הושיעני  
 ובגבורתך תדינני: 2 אלהים שמע תפלתי האזינה לאמרי  
 פי: 3 כי זרים קמו עלי ועריצים בקשו נפשי לא שמו  
 אלהים לנגדם סלה: 4 הנה אלהים עזר לי אדני בסמכי  
 נפשי: 5 ישוב הרע לשררי באמתך הצמיתם: 6 בנדבה  
 אזבחה לך אודה שמך יהוה כי טוב: 7 כי מכל צרה  
 הצילני ובאיבי ראתה עיני:

## 55

1 למנצח בנגינת משכיל לדוד האזינה אלהים תפלתי  
 ואל תתעלם מתחנותי: 2 הקשיבה לי וענני אריד בשיחי  
 ואהימה: 3 מקול אויב מפני עקת רשע כי ימיטו עלי און  
 ובאף ישטמוני: 4 לבי יחיל בקרבי ואימות מות נפלו  
 עלי: 5 יראה ורעד יבא בי ותכסני פלצות: 6 ואמר מי יתן  
 לי אבר כיונה אעופה ואשכנה: 7 הנה ארחיק נדד אליו  
 במדבר סלה: 8 אחישה מפלט לי מרוח סעה מסער:  
 9 בלע אדני פלג לשונם כי ראיתי חמס וריב בעיר:  
 10 יומם ולילה יסובבה על חומתיה ואון ועמל בקרבה:  
 11 הוות בקרבה ולא ימיש מרחבה תך ומרמה: 12 כי  
 לא אויב יחרפני ואשא לא משנאי עלי הגדיל ואסתר  
 ממנו: 13 ואתה אנוש כערכי אלופי ומידעי: 14 אשר יחדו  
 נמתיק סוד בבית אלהים נהלך ברגש: 15 ישימות עלימו  
 ירדו שאול חיים כי רעות במגורם בקרבם: 16 אני אל  
 אלהים אקרא ויהוה יושיעני: 17 ערב ובקר וצהרים  
 אשיחה ואהמה וישמע קולי: 18 פדה בשלום נפשי מקרב

לי כי ברבים היו עמדוי: 19 ישמע אל ויענם וישב קדם סלה אשר אין חליפות למו ולא יראו אלהים: 20 שלח ידיו בשלמיו חלל בריתו: 21 חלקו מחמאת פיו וקרב לבו רכו דבריו משמן והמה פתחות: 22 השלך על יהוה יהבך והוא יכלכלך לא יתן לעולם מוט לצדיק: 23 ואתה אלהים תורדם לבאר שחת אנשי דמים ומרמה לא יחצו ימיהם ואני אבטח בך:

## 56

1 למנצח על יונת אלם רחקים לדוד מכתם באחז אתו פלשתים בגת חנני אלהים כי שאפני אנוש כל היום לחם ילחצני: 2 שאפו שוררי כל היום כי רבים לחמים לי מרום: 3 יום אירא אני אליך אבטח: 4 באלהים אהלל דברו באלהים בטחתי לא אירא מה יעשה בשר לי: 5 כל היום דברי יעצבו עלי כל מחשבתם לרע: 6 יגורו יצפינו המה עקבי ישמרו כאשר קוו נפשי: 7 על און פלט למו באף עמים הורד אלהים: 8 נדי ספרתה אתה שימה דמעתי בנאדך הלא בספרתך: 9 אז ישובו אויבי אחור ביום אקרא זה ידעתי כי אלהים לי: 10 באלהים אהלל דבר ביהוה אהלל דבר: 11 באלהים בטחתי לא אירא מה יעשה אדם לי: 12 עלי אלהים נדריך אשלם תודת לך: 13 כי הצלת נפשי ממות הלא רגלי מדחי להתהלך לפני אלהים באור החיים:

## 57

1 למנצח אל תשחת לדוד מכתם בברחו מפני שאול במערה חנני אלהים חנני כי בך חסיה נפשי ובצל כנפיד

אחסה עד יעבר הוות: <sup>2</sup> אקרא לאלהים עליון לאל  
 גמר עלי: <sup>3</sup> ישלח משמים ויושיעני חרף שאפי סלה  
 ישלח אלהים חסדו ואמתו: <sup>4</sup> נפשי בתוך לבאם אשכבה  
 להטים בני אדם שניהם חנית וחצים ולשונם חרב חדה:  
<sup>5</sup> רומה על השמים אלהים על כל הארץ כבודך: <sup>6</sup> רשת  
 הכינו לפעמי כפף נפשי כרו לפני שיחה נפלו בתוכה  
 סלה: <sup>7</sup> נכון לבי אלהים נכון לבי אשירה ואזמרה:  
<sup>8</sup> עורה כבודי עורה הנבל וכנור אעירה שחר: <sup>9</sup> אודך  
 בעמים אדני אזמרך בל אמים: <sup>10</sup> כי גדל עד שמים  
 חסדך ועד שחקים אמתך: <sup>11</sup> רומה על שמים אלהים  
 על כל הארץ כבודך:

## 58

<sup>1</sup> למנצח אל תשחת לדוד מכתם האמנם אלם צדק  
 תדברון מישרים תשפטו בני אדם: <sup>2</sup> אף בלב עולת  
 תפעלון בארץ חמס ידיכם תפלסון: <sup>3</sup> זרו רשעים מרחם  
 תעו מבטן דברי כזב: <sup>4</sup> חמת למו כדמות חמת נחש  
 כמו פתן חרש יאטם אזנו: <sup>5</sup> אשר לא ישמע לקול  
 מלחשים חובר חברים מחכם: <sup>6</sup> אלהים הרס שנימו  
 בפימו מלתעות כפירים נתן יהוה: <sup>7</sup> ימאסו כמו מים  
 יתהלכו למו ידרך חצו כמו יתמללו: <sup>8</sup> כמו שבלול תמס  
 יהלך נפל אשת בל חזו שמש: <sup>9</sup> בטרם יבינו סירתכם  
 אטד כמו חי כמו חרון ישערנו: <sup>10</sup> ישמח צדיק כי חזה  
 נקם פעמיו ירחץ בדם הרשע: <sup>11</sup> ויאמר אדם אך פרי  
 לצדיק אך יש אלהים שפטים בארץ:

## 59

1 למנצח אל תשחת לדוד מכתם בשלח שאול וישמרו  
 את הבית להמיתו הצילני מאיבי אלהי ממתקוממי  
 תשגבני: 2 הצילני מפעלי און ומאנשי דמים הושיעני:  
 3 כי הנה ארבו לנפשי יגורו עלי עזים לא פשעי ולא  
 חטאתי יהוה: 4 בלי עון ירוצון ויכוננו עורה לקראתי  
 וראה: 5 ואתה יהוה אלהים צבאות אלהי ישראל הקיצה  
 לפקד כל הגוים אל תחן כל בגדי און סלה: 6 ישובו  
 לערב יהמו ככלב ויסובבו עיר: 7 הנה יביעון בפיהם  
 חרבות בשפתותיהם כי מי שמע: 8 ואתה יהוה תשחק  
 למו תלעג לכל גוים: 9 עזו אליך אשמרה כי אלהים  
 משגבי: 10 אלהי חסדו יקדמני אלהים יראני בשררי:  
 11 אל תהרגם פן ישכחו עמי הניעמו בחילך והורידמו  
 מגננו אדני: 12 חטאת פימו דבר שפתימו וילכדו בגאונם  
 ומאלה ומכחש יספרו: 13 כלה בחמה כלה ואינמו וידעו  
 כי אלהים משל ביעקב לאפסי הארץ סלה: 14 וישובו  
 לערב יהמו ככלב ויסובבו עיר: 15 המה ינועון לאכל  
 אם לא ישבעו וילינו: 16 ואני אשיר עזך וארנן לבקר  
 חסדך כי היית משגב לי ומגוס ביום צר לי: 17 עזי אליך  
 אזמרה כי אלהים משגבי אלהי חסדי:

## 60

1 למנצח על שושן עדות מכתם לדוד ללמד בהצותו  
 את ארם נהרים ואת ארם צובה וישב יואב ויך את  
 אדום בגיא מלח שנים עשר אלף אלהים זנחתנו פרצתנו  
 אנפת תשובב לנו: 2 הרעשתה ארץ פצמתה רפה  
 שבריה כי מטה: 3 הראיתה עמך קשה השקיתנו יין

תרעלה: 4 נתתה ליראיך נס להתנוסס מפני קשט  
 סלה: 5 למען יחלצון ידידיך הושיעה ימינך ועננו:  
 6 אלהים דבר בקדשו אעלזה אחלקה שכם ועמק סכות  
 אמדד: 7 לי גלעד ולי מנשה ואפרים מעוז ראשי יהודה  
 מחקקי: 8 מואב סיר רחצי על אדום אשליך נעלי עלי  
 פלשת התרעעי: 9 מי יבלני עיר מצור מי נחני עד  
 אדום: 10 הלא אתה אלהים זנחתנו ולא תצא אלהים  
 בצבאותינו: 11 הבה לנו עזרת מצר ושוא תשועת אדם:  
 12 באלהים נעשה חיל והוא יבוס צרינו:

## 61

1 למנצח על נגינת לרוד שמעה אלהים רנתי הקשיבה  
 תפלתי: 2 מקצה הארץ אליך אקרא בעטף לבי בצור  
 ירום ממני תנחני: 3 כי היית מחסה לי מגדל עז מפני  
 אויב: 4 אגורה באהלך עולמים אחסה בסתר כנפיך  
 סלה: 5 כי אתה אלהים שמעת לנדרי נתת ירשת יראי  
 שמך: 6 ימים על ימי מלך תוסיף שנותיו כמו דר ודר:  
 7 ישב עולם לפני אלהים חסד ואמת מן ינצרהו: 8 כן  
 אזמרה שמך לעד לשלמי נדרי יום יום:

## 62

1 למנצח על ידותון מזמור לרוד אך אל אלהים  
 דומיה נפשי ממנו ישועתי: 2 אך הוא צורי וישועתי  
 משגבי לא אמוט רבה: 3 עד אנה תהותתו על איש  
 תרצחו כלכם כקיר נטוי גדר הדחוייה: 4 אך משאתו  
 יעצו להדיח ירצו כזב בפיו יברכו ובקרבתם יקללו  
 סלה: 5 אך לאלהים דומי נפשי כי ממנו תקותי: 6 אך



הוא צורי וישועתי משגבי לא אמוט: <sup>7</sup> על אלהים ישעי וכבודי צור עזי מחסי באלהים: <sup>8</sup> בטחו בו בכל עת עם שפכו לפניו לבבכם אלהים מחסה לנו סלה: <sup>9</sup> אך הבל בני אדם כזב בני איש במאזנים לעלות המה מהבל יחד: <sup>10</sup> אל תבטחו בעשק ובגזל אל תהבלו חיל כי ינוב אל תשיתו לב: <sup>11</sup> אחת דבר אלהים שתיים זו שמעתי כי עז לאלהים: <sup>12</sup> ולך אדני חסד כי אתה תשלם לאיש כמעשהו:

## 63

<sup>1</sup> מזמור לדוד בהיותו במדבר יהודה אלהים אלי אתה אשחרך צמאה לך נפשי כמה לך בשרי בארץ ציה ועיף בלי מים: <sup>2</sup> כן בקדש חזיתיך לראות עזך וכבודך: <sup>3</sup> כי טוב חסרך מחיים שפתי ישבחונך: <sup>4</sup> כן אברכך בחיי בשמך אשא כפי: <sup>5</sup> כמו חלב ודשן תשבע נפשי ושפתי רננות יהלל פי: <sup>6</sup> אם זכרתיך על יצועי באשמרות אהגה בך: <sup>7</sup> כי היית עזרתה לי ובצל כנפיד ארנן: <sup>8</sup> דבקה נפשי אחרריך בי תמכה ימינך: <sup>9</sup> והמה לשואה יבקשו נפשי יבאו בתחתיות הארץ: <sup>10</sup> יגירהו על ידי חרב מנת שעלים יהיו: <sup>11</sup> והמלך ישמח באלהים יתהלל כל הנשבע בו כי יסכר פי דוברי שקר:

## 64

<sup>1</sup> למנצח מזמור לדוד שמע אלהים קולי בשיחי מפחד אויב תצר חיי: <sup>2</sup> תסתירני מסוד מרעים מרגשת פעלי און: <sup>3</sup> אשר שננו כחרב לשונם דרכו חצם דבר מר: <sup>4</sup> לירות במסתרים תם פתאם ירהו ולא ייראו: <sup>5</sup> יחזקו למו דבר רע יספרו לטמוון מוקשים אמרו מי

יראה למו: 6 יחפשו עולת תמנו חפש מחפש וקרב  
 איש ולב עמק: 7 וירם אלהים חץ פתאום היו מכותם:  
 8 ויכשילוהו עלימו לשונם יתנדרו כל ראה בם: 9 וייראו  
 כל אדם ויגידו פעל אלהים ומעשהו השכילו: 10 ישמח  
 צדיק ביהוה וחסה בו ויתהללו כל ישרי לב:

## 65

1 למנצח מזמור לדוד שיר לך דמיה תהלה אלהים  
 בציון ולך ישלם נדר: 2 שמע תפלה עדיך כל בשר  
 יבאו: 3 דברי עונת גברו מני פשעינו אתה תכפרם:  
 4 אשרי תבחר ותקרב ישכן הצריך נשבעה בטוב  
 ביתך קדש היכלך: 5 נוראות בצדק תעננו אלהי ישענו  
 מבטח כל קצוי ארץ וים רחקים: 6 מכין הרים בכחו  
 נאזר בנבורה: 7 משביח שאון ימים שאון גליהם והמון  
 לאמים: 8 וייראו ישרי קצות מאותתיך מוצאי בקר וערב  
 תרנין: 9 פקדת הארץ ותשקקה רבת תעשרנה פלג  
 אלהים מלא מים תכין דגנם כי כן תכינה: 10 תלמיה רוח  
 נחת גדודיה ברביבים תמגנה צמחה תברך: 11 עטרת  
 שנת טובתך ומעגליך ירעפון דשן: 12 ירעפו נאות מדבר  
 וגיל גבעות תחגרנה: 13 לבשו כרים הצאן ועמקים  
 יעטפו בר יתרועעו אף ישירו:

## 66

1 למנצח שיר מזמור הריעו לאלהים כל הארץ:  
 2 זמרו כבוד שמו שימו כבוד תהלתו: 3 אמרו לאלהים  
 מה נורא מעשיך ברב עזך יכחשו לך איביך: 4 כל  
 הארץ ישתחו לך ויזמרו לך יזמרו שמך סלה: 5 לכו

וראו מפעלות אלהים נורא עלילה על בני אדם: 6 הפך  
 ים ליבשה בנהר יעברו בגל שם נשמחה בו: 7 משל  
 בגבורתו עולם עיניו בגוים תצפינה הסוררים אל ירימו  
 למו סלה: 8 ברכו עמים אלהינו והשמיעו קול תהלתו:  
 9 השם נפשנו בחיים ולא נתן למוט רגלנו: 10 כי בחנתנו  
 אלהים צרפתנו כצרף כסף: 11 הבאתנו במצודה שמת  
 מועקה במתנינו: 12 הרכבת אנוש לראשנו באנו באש  
 ובמים ותוציאנו לרויה: 13 אבוא ביתך בעולות אשלם  
 לך נדרי: 14 אשר פצו שפתי ודבר פי בצר לי: 15 עלות  
 מחים אעלה לך עם קטרת אילים אעשה בקר עם  
 עתודים סלה: 16 לכו שמעו ואספרה כל יראי אלהים  
 אשר עשה לנפשי: 17 אליו פי קראתי ורומם תחת לשוני:  
 18 און אם ראיתי בלבי לא ישמע אדני: 19 אכן שמע  
 אלהים הקשיב בקול תפלתי: 20 ברוך אלהים אשר לא  
 הסיר תפלתי וחסדו מאתי:

## 67

1 למנצח בנגינת מזמור שיר אלהים יחננו ויברכנו  
 יאר פניו אתנו סלה: 2 לדעת בארץ דרכך בכל גוים  
 ישועתך: 3 יודוך עמים אלהים יודוך עמים כלם:  
 4 ישמחו וירננו לאמים כי תשפט עמים מישור ולאמים  
 בארץ תנחם סלה: 5 יודוך עמים אלהים יודוך עמים  
 כלם: 6 ארץ נתנה יבולה יברכנו אלהים אלהינו:  
 7 יברכנו אלהים וייראו אתו כל אפסי ארץ:

## 68

1 למנצח לדוד מזמור שיר יקום אלהים יפוצו

אויביו וינוסו משנאיו מפניו: <sup>2</sup> כהנדרף עשן תנדרף כהמס  
 דונג מפני אש יאבדו רשעים מפני אלהים: <sup>3</sup> וצדיקים  
 ישמחו יעלצו לפני אלהים וישישו בשמחה: <sup>4</sup> שירו  
 לאלהים זמרו שמו סלו לרכב בערבות ביה שמו  
 ועלזו לפניו: <sup>5</sup> אבי יתומים ודין אלמנות אלהים במעון  
 קדשו: <sup>6</sup> אלהים מושיב יחידים ביתה מוציא אסירים  
 בכושרות אך סוררים שכנו צחיחה: <sup>7</sup> אלהים בצאתך  
 לפני עמך בצעדך בישימון סלה: <sup>8</sup> ארץ רעשה אף  
 שמים נטפו מפני אלהים זה סיני מפני אלהים אלהי  
 ישראל: <sup>9</sup> גשם נדבות תניף אלהים נחלתך ונלאה אתה  
 כוננתה: <sup>10</sup> חיתך ישבו בה תכין בטובתך לעני אלהים:  
<sup>11</sup> אדני יתן אמר המבשרות צבא רב: <sup>12</sup> מלכי צבאות  
 ידרון ידרון ונות בית תחלק שלל: <sup>13</sup> אם תשכבון  
 בין שפתים כנפי יונה נחפה בכסף ואברותיה בירקרק  
 חרוץ: <sup>14</sup> בפרש שדי מלכים בה תשלג בצלמון: <sup>15</sup> הר  
 אלהים הר בשן הר גבננים הר בשן: <sup>16</sup> למה תרצדון  
 הרים גבננים ההר חמד אלהים לשבתו אף יהוה ישכן  
 לנצח: <sup>17</sup> רכב אלהים רבתים אלפי שנאן אדני במ סיני  
 בקדש: <sup>18</sup> עלית למרום שבית שבי לקחת מתנות באדם  
 ואף סוררים לשכן יה אלהים: <sup>19</sup> ברוך אדני יום יום  
 יעמס לנו האל ישועתנו סלה: <sup>20</sup> האל לנו אל למושעות  
 וליהוה אדני למות תוצאות: <sup>21</sup> אך אלהים ימחץ ראש  
 איביו קדקד שער מתהלך באשמיו: <sup>22</sup> אמר אדני מבשן  
 אשיב אשיב ממצלות ים: <sup>23</sup> למען תמחץ רגלך בדם  
 לשון כלביך מאיבים מנהו: <sup>24</sup> ראו הליכותיך אלהים

הליכות אלי מלכי בקדש: <sup>25</sup> קדמו שרים אחר נגנים  
 בתוך עלמות תופפות: <sup>26</sup> במקהלות ברכו אלהים יהוה  
 ממקור ישראל: <sup>27</sup> שם בנימן צעיר רדם שרי יהודה  
 רגמתם שרי זבלון שרי נפתלי: <sup>28</sup> צוה אלהיך עזך  
 עוזה אלהים זו פעלת לנו: <sup>29</sup> מהיכלך על ירושלם לך  
 יובילו מלכים שי: <sup>30</sup> גער חית קנה עדת אבירים בעגלי  
 עמים מתרפס ברצי כסף בזר עמים קרבות יחפצו:  
<sup>31</sup> יאתיו חשמנים מני מצרים כוש תריץ ידיו לאלהים:  
<sup>32</sup> ממלכות הארץ שירו לאלהים זמרו אדני סלה:  
<sup>33</sup> לרכב בשמי שמי קדם הן יתן בקולו קול עז: <sup>34</sup> תנו עז  
 לאלהים על ישראל גאותו ועזו בשחקים: <sup>35</sup> נורא אלהים  
 ממקדשיך אל ישראל הוא נתן עז ותעצמות לעם ברוך  
 אלהים:

## 69

<sup>1</sup> למנצח על שושנים לדוד הושיעני אלהים כי באו  
 מים עד נפש: <sup>2</sup> טבעתי ביון מצולה ואין מעמד באתי  
 במעמקי מים ושבלת שטפתי: <sup>3</sup> יגעתי בקראי נחר  
 גרוני כלו עיני מיחל לאלהי: <sup>4</sup> רבו משערות ראשי  
 שנאי חנם עצמו מצמיתי איבי שקר אשר לא גזלתי  
 אז אשיב: <sup>5</sup> אלהים אתה ידעת לאולתי ואשמותי ממך  
 לא נכחדו: <sup>6</sup> אל יבשו בי קויך אדני יהוה צבאות אל  
 יכלמו בי מבקשיך אלהי ישראל: <sup>7</sup> כי עליך נשאתי  
 חרפה כסתה כלמה פני: <sup>8</sup> מוזר הייתי לאחי ונכרי  
 לבני אמי: <sup>9</sup> כי קנאת ביתך אכלתני וחרפות חורפיך

נפלו עלי: 10 ואבכה בצום נפשי ותהי לחרפות לי:  
 11 ואתנה לבושי שק ואהי להם למשל: 12 ישיחו בי ישבי  
 שער ונגינות שותי שכר: 13 ואני תפלתי לך יהוה עת  
 רצון אלהים ברב חסדך ענני באמת ישעך: 14 הצילני  
 מטיט ואל אטבעה אנצלה משנאי וממעמקי מים: 15 אל  
 תשטפני שבלת מים ואל תבלעני מצולה ואל תאטר  
 עלי באר פיה: 16 ענני יהוה כי טוב חסדך כרב  
 רחמוך פנה אלי: 17 ואל תסתר פניך מעבדך כי צר  
 לי מהר ענני: 18 קרבה אל נפשי גאלה למען איבי  
 פדני: 19 אתה ידעת חרפתי ובשתי וכלמתי נגדך כל  
 צוררי: 20 חרפה שברה לבי ואנושה ואקוה לנוד ואין  
 ולמנחמים ולא מצאתי: 21 ויתנו בברותי ראש ולצמאי  
 ישקוני חמוץ: 22 יהי שלחנם לפניהם לפח ולשלומים  
 למוקש: 23 תחשכנה עיניהם מראות ומתניהם תמיד  
 המעד: 24 שפך עליהם זעמך וחרון אפך ישיגם: 25 תהי  
 טירתם נשמה באהליהם אל יהי ישב: 26 כי אתה אשר  
 הכית רדפו ואל מכאוב חלליך יספרו: 27 תנה עון  
 על עונם ואל יבאו בצדקתך: 28 ימחו מספר חיים ועם  
 צדיקים אל יכתבו: 29 ואני עני וכואב ישועתך אלהים  
 תשגבני: 30 אהללה שם אלהים בשיר ואגדלנו בתודה:  
 31 ותיטב ליהוה משור פר מקרן מפריס: 32 ראו ענוים  
 ישמחו דרשי אלהים ויחי לבבכם: 33 כי שמע אל  
 אביונים יהוה ואת אסיריו לא בזה: 34 יהללוהו שמים  
 וארץ ימים וכל רמש בם: 35 כי אלהים יושיע ציון ויבנה  
 ערי יהודה וישבו שם וירשוה: 36 וזרע עבדיו ינחלוה  
 ואהבי שמו ישכנו בה:

## 70

1 למנצח לדוד להזכיר אלהים להצילני יהוה  
 לעזרתי חושה: 2 יבשו ויחפרו מבקשי נפשי יסגו אחור  
 ויכלמו חפצי רעתי: 3 ישובו על עקב בשתם האמרים  
 האח האח: 4 ישישו וישמחו בכך כל מבקשיך ויאמרו  
 תמיד יגדל אלהים אהבי ישועתך: 5 ואני עני ואביון  
 אלהים חושה לי עזרי ומפלטי אתה יהוה אל תאחר:

## 71

1 בכך יהוה חסיתי אל אבושה לעולם: 2 בצדקתך  
 תצילני ותפלטני הטח אלי אונך והושיעני: 3 היה  
 לי לצור מעון לבוא תמיד צוית להושיעני כי סלעי  
 ומצודתי אתה: 4 אלהי פלטני מיד רשע מכף מעול  
 וחומץ: 5 כי אתה תקותי אדני יהוה מבטחי מנעורי:  
 6 עליך נסמכתי מבטן ממעי אמי אתה גוזי בכך תהלתי  
 תמיד: 7 כמופת הייתי לרבים ואתה מחסי עז: 8 ימלא  
 פי תהלתך כל היום תפארתך: 9 אל תשליכני לעת  
 זקנה ככלות כחי אל תעזבני: 10 כי אמרו אויבי לי  
 ושמרי נפשי נועצו יחדו: 11 לאמר אלהים עזבו רדפו  
 ותפשוהו כי אין מציל: 12 אלהים אל תרחק ממני אלהי  
 לעזרתי חישה: 13 יבשו יכלו שטני נפשי יעטו חרפה  
 וכלמה מבקשי רעתי: 14 ואני תמיד איחל והוספתי על  
 כל תהלתך: 15 פי יספר צדקתך כל היום תשועתך  
 כי לא ידעתי ספרות: 16 אבוא בגברות אדני יהוה  
 אזכיר צדקתך לברך: 17 אלהים למדתני מנעורי ועד  
 הנה אני נפלאותיך: 18 וגם עד זקנה ושיבה אלהים

אל תעזבני עד אניד זרועך לדור לכל יבוא גבורתך:  
 19 וצדקתך אלהים עד מרום אשר עשית גדלות אלהים  
 מי כמוך: 20 אשר הראיתנו צרות רבות ורעות תשוב  
 תחיינו ומתהמות הארץ תשוב תעלני: 21 תרב גדלתי  
 ותסב תנחמני: 22 גם אני אודך בכלי נבל אמתך אלהי  
 אזמרה לך בכנור קדוש ישראל: 23 תרננה שפתי כי  
 אזמרה לך ונפשי אשר פדית: 24 גם לשוני כל היום  
 תהגה צדקתך כי בשו כי חפרו מבקשי רעתי:

## 72

1 לשלמה אלהים משפטיך למלך תן וצדקתך לבן  
 מלך: 2 ידיו עמד בצדק וענייד במשפט: 3 ישאו הרים  
 שלום לעם וגבעות בצדקה: 4 ישפט עניי עם יושע לבני  
 אביון וידכא עושק: 5 ייראוך עם שמש ולפני ירח דור  
 דורים: 6 ירד כמטר על גז כרביבים זרזיף ארץ: 7 יפרח  
 בימיו צדיק ורב שלום עד בלי ירח: 8 וירד מים עד  
 ים ומנחר עד אפסי ארץ: 9 לפניו יכרעו ציים ואיביו  
 עפר ילחכו: 10 מלכי תרשיש ואיים מנחה ישיבו מלכי  
 שבא וסבא אשכר יקריבו: 11 וישתחו לו כל מלכים כל  
 גוים יעבדוהו: 12 כי יציל אביון משוע ועני ואין עזר לו:  
 13 יחס על דל ואביון ונפשות אביונים יושיע: 14 מתוך  
 ומחמס יגאל נפשם וייקר דמם בעיניו: 15 ויחי ויתן לו  
 מזהב שבא ויתפלל בעדו תמיד כל היום יברכנהו:  
 16 יהי פסת בר בארץ בראש הרים ירעש כלבנון פרוי  
 ויציצו מעיר כעשב הארץ: 17 יהי שמו לעולם לפני שמש



ניין שמו ויתברכו בו כל גוים יאשרוהו: 18 ברוך יהוה  
אלהים אלהי ישראל עשה נפלאות לברו: 19 וברוך שם  
כבודו לעולם וימלא כבודו את כל הארץ אמן ואמן:  
20 כלו תפלות דוד בן ישי:

## 73

1 מזמור לאסף אך טוב לישראל אלהים לברי לבב:  
2 ואני כמעט נטוי רגלי כאין שפכה אשרי: 3 כי קנאתי  
בהוללים שלום רשעים אראה: 4 כי אין חרצבות  
למותם ובריא אולם: 5 בעמל אנוש אינמו ועם אדם  
לא יננעו: 6 לכן ענקתמו גאווה יעטף שית חמס למו:  
7 יצא מחלב עינמו עברו משכיות לבב: 8 ימיקו וידברו  
ברע עשק ממרום ידברו: 9 שתו בשמים פיהם ולשונם  
תהלך בארץ: 10 לכן ישיב עמו הלם ומי מלא ימצו  
למו: 11 ואמרו איכה ידע אל ויש דעה בעליון: 12 הנה  
אלה רשעים ושלוו עולם השנו חיל: 13 אך ריק זכיתי  
לבבי וארחץ בנקיון כפי: 14 ואהי נגוע כל היום ותוכחתי  
לבקרים: 15 אם אמרתי אספרה כמו הנה דור בניך  
בגדתי: 16 ואחשבה לדעת זאת עמל היא בעיני: 17 עד  
אבוא אל מקדשי אל אבינה לאחרייתם: 18 אך בחלקות  
תשית למו הפלתם למשואות: 19 איך היו לשמה כרגע  
ספו תמו מן בלהות: 20 כחלום מהקיץ אדני בעיר צלמם  
תבזה: 21 כי יתחמץ לבבי וכליותי אשתונן: 22 ואני בער  
ולא אדע בהמות הייתי עמך: 23 ואני תמיד עמך אחזת  
ביד ימיני: 24 בעצתך תנחני ואחר כבוד תקחני: 25 מי

לי בשמים ועמך לא חפצתי בארץ: <sup>26</sup> כלה שארי ולבבי צור לבבי וחלקי אלהים לעולם: <sup>27</sup> כי הנה רחקיך יאבדו הצמתה כל זונה ממך: <sup>28</sup> ואני קרבת אלהים לי טוב שתי באדני יהוה מחסי לספר כל מלאכותיך:

## 74

<sup>1</sup> משכיל לאסף למה אלהים זנחת לנצח יעשן אפך בצאן מרעיתך: <sup>2</sup> זכר עדתך קניית קדם גאלת שבט נחלתך הר ציון זה שכנת בו: <sup>3</sup> הרימה פעמיך למשאות נצח כל הרע אויב בקדש: <sup>4</sup> שאגו צרריך בקרב מועדך שמו אותתם אתות: <sup>5</sup> יודע כמביא למעלה בסבך עץ קרדמות: <sup>6</sup> ועת פתוחיה יחד בכשיל וכילפת יהלמון: <sup>7</sup> שלחו באש מקדשך לארץ חללו משכן שמך: <sup>8</sup> אמרו בלבם נינם יחד שרפו כל מועדי אל בארץ: <sup>9</sup> אותתינו לא ראינו אין עוד נביא ולא אתנו ידע עד מה: <sup>10</sup> עד מתי אלהים יחרף צר ינאץ אויב שמך לנצח: <sup>11</sup> למה תשיב ירך וימינך מקרב חוקך כלה: <sup>12</sup> ואלהים מלכי מקדם פעל ישועות בקרב הארץ: <sup>13</sup> אתה פוררת בעזך ים שברת ראשי תנינים על המים: <sup>14</sup> אתה רצצת ראשי לויתן תתננו מאכל לעם לציים: <sup>15</sup> אתה בקעת מעין ונחל אתה הובשת נהרות איתן: <sup>16</sup> לך יום אף לך לילה אתה הכינות מאור ושמש: <sup>17</sup> אתה הצבת כל גבולות ארץ קיץ וחרף אתה יצרתם: <sup>18</sup> זכר זאת אויב חרף יהוה ועם נבל נאצו שמך: <sup>19</sup> אל תתן לחית נפש תורך חית ענייך אל תשכח לנצח: <sup>20</sup> הבט לברית כי מלאו

מחשכי ארץ נאות חמס: <sup>21</sup> אל ישב דך נכלם עני ואביון  
 יהללו שמך: <sup>22</sup> קומה אלהים ריבה ריבך זכר חרפתך  
 מני נבל כל היום: <sup>23</sup> אל תשכח קול צרריך שאון קמיד  
 עלה תמיד:

## 75

<sup>1</sup> למנצח אל תשחת מזמור לאסף שיר הודינו לך  
 אלהים הודינו וקרוב שמך ספרו נפלאותיך: <sup>2</sup> כי אקח  
 מועד אני מישרים אשפט: <sup>3</sup> נמנים ארץ וכל ישביה  
 אנכי תכנתי עמודיה סלה: <sup>4</sup> אמרתי להוללים אל תהללו  
 ולרשעים אל תרימו קרן: <sup>5</sup> אל תרימו למרום קרנכם  
 תדברו בצואר עתק: <sup>6</sup> כי לא ממוצא וממערב ולא  
 ממדבר הרים: <sup>7</sup> כי אלהים שפט זה ישפיל וזה ירים:  
<sup>8</sup> כי כוס ביד יהוה ויין חמר מלא מסך ויגר מזה  
 אך שמריה ימצו ישתו כל רשעי ארץ: <sup>9</sup> ואני אגיד  
 לעלם אזמרה לאלהי יעקב: <sup>10</sup> וכל קרני רשעים אנדע  
 תרוממנה קרנות צדיק:

## 76

<sup>1</sup> למנצח בנגינת מזמור לאסף שיר נודע ביהודה  
 אלהים בישראל גדול שמו: <sup>2</sup> ויהי בשלם סכו ומעונתו  
 בציון: <sup>3</sup> שמה שבר רשפי קשת מגן וחרב ומלחמה סלה:  
<sup>4</sup> נאור אתה אדיר מהררי טרף: <sup>5</sup> אשתוללו אבירי לב  
 נמו שנתם ולא מצאו כל אנשי חיל ידיהם: <sup>6</sup> מגערתך  
 אלהי יעקב נרדם ורכב וסוס: <sup>7</sup> אתה נורא אתה ומי  
 יעמד לפניך מאז אפך: <sup>8</sup> משמים השמעת דין ארץ יראה

ושקטה: 9 בקום למשפט אלהים להושיע כל ענוי ארץ  
 סלה: 10 כי חמת אדם תודך שארית חמת תחגר: 11 נדרו  
 ושלמו ליהוה אלהיכם כל סביביו יובילו שי למורא:  
 12 יבצר רוח נגידים נורא למלכי ארץ:

## 77

1 למנצח על ידיתון לאסף מזמור קולי אל אלהים  
 ואצעקה קולי אל אלהים והאזין אלי: 2 ביום צרתי  
 אדני דרשתי ידי לילה נגרה ולא תפוג מאנה הנחם  
 נפשי: 3 אזכרה אלהים ואהמיה אשיחה ותתעטף רוחי  
 סלה: 4 אחזת שמרות עיני נפעמתי ולא אדבר: 5 חשבתי  
 ימים מקדם שנות עולמים: 6 אזכרה נגינתי בלילה עם  
 לבבי אשיחה ויחפש רוחי: 7 הלעולמים יזנח אדני ולא  
 יסוף לרצות עוד: 8 האפס לנצח חסדו גמר אמר לדר  
 ודר: 9 השכח חנות אל אם קפץ באף רחמיו סלה:  
 10 ואמר חלותי היא שנות ימין עליון: 11 אזכיר מעללי  
 יה כי אזכרה מקדם פלאך: 12 והגיתי בכל פעלך  
 ובעלילותיך אשיחה: 13 אלהים בקדש דרכך מי אל  
 גדול כאלהים: 14 אתה האל עשה פלא הודעת בעמים  
 עזך: 15 גאלת בזרוע עמך בני יעקב ויוסף סלה: 16 ראוך  
 מים אלהים ראוך מים יחילו אף ירגזו תהמות: 17 זרמו  
 מים עבות קול נתנו שחקים אף חצצריך יתהלכו: 18 קול  
 רעמך בגלגל האירו ברקים תבל רגזה ותרעש הארץ:  
 19 בים דרכך ושביליך במים רבים ועקבותיך לא נדעו:  
 20 נחית כצאן עמך ביד משה ואהרן:

## 78

1 משכיל לאסף האזינה עמי תורתִי הטו אזנכם לאמרי  
 פי: 2 אפתחה במשל פי אביעה חידות מני קדם: 3 אשר  
 שמענו ונדעם ואבותינו ספרו לנו: 4 לא נכחד מבניהם  
 לדור אחרון מספרים תהלות יהוה ועוזו ונפלאותיו  
 אשר עשה: 5 ויקם עדות ביעקב ותורה שם בישראל  
 אשר צוה את אבותינו להודיעם לבניהם: 6 למען ידעו  
 דור אחרון בנים יולדו יקמו ויספרו לבניהם: 7 וישימו  
 באלהים כסלם ולא ישכחו מעללי אל ומצותיו ינצרו:  
 8 ולא יהיו כאבותם דור סורר ומרה דור לא הכין  
 לבו ולא נאמנה את אל רוחו: 9 בני אפרים נושקי  
 רומי קשת הפכו ביום קרב: 10 לא שמרו ברית אלהים  
 ובתורתו מאנו ללכת: 11 וישכחו עלילותיו ונפלאותיו  
 אשר הראם: 12 נגד אבותם עשה פלא בארץ מצרים  
 שדה צען: 13 בקע ים ויעבירם ויצב מים כמו נד:  
 14 וינחם בענן יומם וכל הלילה באור אש: 15 יבקע צרים  
 במדבר וישק כתהמות רבה: 16 ויוצא נוזלים מסלע  
 ויורד כנהרות מים: 17 ויוסיפו עוד לחטא לו למרות  
 עליון בציה: 18 וינסו אל בלבבם לשאל אכל לנפשם:  
 19 וידברו באלהים אמרו היוכל אל לערך שלחן  
 במדבר: 20 הן הכה צור ויזובו מים ונחלים ישטפו  
 הגם לחם יוכל תת אם יכין שאר לעמו: 21 לכן שמע  
 יהוה ויתעבר ואש נשקה ביעקב וגם אף עלה בישראל:  
 22 כי לא האמינו באלהים ולא בטחו בישועתו: 23 ויצו  
 שחקים ממעל ודלתי שמים פתח: 24 וימטר עליהם

מן לאכל ודגן שמים נתן למו: 25 לחם אבירים אכל  
 איש צידה שלח להם לשבע: 26 יסע קדים בשמים  
 וינהג בעזו תימן: 27 וימטר עליהם כעפר שאר וכחול  
 ימים עוף כנף: 28 ויפל בקרב מחנהו סביב למשכנתיו:  
 29 ויאכלו וישבעו מאד ותאותם יבא להם: 30 לא זרו  
 מתאותם עוד אכלם בפיהם: 31 ואף אלהים עלה בהם  
 ויהרג במשמניהם ובחורי ישראל הכריע: 32 בכל זאת  
 חטאו עוד ולא האמינו בנפלאותיו: 33 ויכל בהבל ימיהם  
 ושנותם בבהלה: 34 אם הרגם ודרשוהו ושבנו ושחרו אל:  
 35 ויזכרו כי אלהים צורם ואל עליון גאלם: 36 ויפתוהו  
 בפיהם ובלשונם יכזבו לו: 37 ולבם לא נכון עמו ולא  
 נאמנו בכריתו: 38 והוא רחום יכפר עון ולא ישחית  
 והרבה להשיב אפו ולא יעיר כל חמתו: 39 ויזכר  
 כי בשר המה רוח הולך ולא ישוב: 40 כמה ימרוהו  
 במדבר יעציבוהו בישימון: 41 וישבו וינסו אל וקדוש  
 ישראל התוו: 42 לא זכרו את ידו יום אשר פדם מני  
 צר: 43 אשר שם במצרים אתותיו ומופתיו בשדה צען:  
 44 ויהפך לדם יאריהם ונזליהם בל ישתיון: 45 ישלח  
 בהם ערב ויאכלם וצפרדע ותשחיתם: 46 ויתן לחסיל  
 יבולם ויגיעם לארבה: 47 יהרג בברד גפנם ושקמותם  
 בחנמל: 48 ויסגר לברד בעירם ומקניהם לרשפים:  
 49 ישלח בם חרון אפו עברה וזעם וצרה משלחת מלאכי  
 רעים: 50 יפלס נתיב לאפו לא חשך ממות נפשם וחיתם  
 לדבר הסגיר: 51 ויך כל בכור במצרים ראשית אונים  
 באהלי חם: 52 ויסע כצאן עמו וינהגם כעדר במדבר:  
 53 וינחם לבטח ולא פחדו ואת אויביהם כסה הים:

54 ויביאם אל גבול קדשו הר זה קנתה ימינו: 55 ויגרש מפניהם גוים ויפילם בחבל נחלה וישכן באהליהם שבטי ישראל: 56 וינסו וימרו את אלהים עליון ועדותיו לא שמרו: 57 ויסגו ויבגדו כאבותם נהפכו כקשת רמיה: 58 וכעיסוהו בבמותם ובפסיליהם יקניאוהו: 59 שמע אלהים ויתעבר וימאס מאד בישראל: 60 ויטש משכן שלו אהל שכן באדם: 61 ויתן לשבי עזו ותפארתו ביד צר: 62 ויסגר לחרב עמו ובנחלתו התעבר: 63 בחוריו אכלה אש ובתולתיו לא הוללו: 64 כהניו בחרב נפלו ואלמנתיו לא תבכינה: 65 ויקץ כישן אדני כגבור מתרונן מיון: 66 ויך צריו אחור חרפת עולם נתן למו: 67 וימאס באהל יוסף ובשבט אפרים לא בחר: 68 ויבחר את שבט יהודה את הר ציון אשר אהב: 69 ויבן כמו רמים מקדשו כארץ יסדה לעולם: 70 ויבחר ברוד עברו ויקחהו ממכלאת צאן: 71 מאחר עלות הביאו לרעות ביעקב עמו ובישראל נחלתו: 72 וירעם כתם לבבו ובתבונות כפיו ינחם:

## 79

1 מזמור לאסף אלהים באו גוים בנחלתך טמאו את היכל קדשך שמו את ירושלם לעיים: 2 נתנו את נבלת עבדיך מאכל לעוף השמים בשר חסידיך לחיתו ארץ: 3 שפכו דמם כמים סביבות ירושלם ואין קובר: 4 היינו חרפה לשכנינו לעג וקלס לסביבותינו: 5 עד מה יהוה תאנף לנצח תבער כמו אש קנאתך: 6 שפך חמתך אל הגוים אשר לא ידעוך ועל ממלכות אשר בשמך לא

קראו: <sup>7</sup> כי אכל את יעקב ואת נוהו השמו: <sup>8</sup> אל תזכר לנו עונת ראשנים מהר יקדמונו רחמיך כי דלונו מאד: <sup>9</sup> עזרנו אלהי ישענו על דבר כבוד שמך והצילנו וכפר על חטאתינו למען שמך: <sup>10</sup> למה יאמרו הגוים איה אלהיהם יודע בגיים לעינינו נקמת דם עבדיך השפוך: <sup>11</sup> תבוא לפניך אנקת אסיר כגדל זרועך הותר בני תמותה: <sup>12</sup> והשב לשכנינו שבעתים אל חיקם חרפתם אשר חרפוך אדני: <sup>13</sup> ואנחנו עמך וצאן מרעיתך נודה לך לעולם לדר ודר נספר תהלתך:

## 80

<sup>1</sup> למנצח אל ששנים עדות לאסף מזמור רעה ישראל האזינה נהג כצאן יוסף ישב הכרובים הופיעה: <sup>2</sup> לפני אפרים ובנימן ומנשה עוררה את גבורתך ולכה לישעתה לנו: <sup>3</sup> אלהים השיבנו והאר פניך ונושעה: <sup>4</sup> יהוה אלהים צבאות עד מתי עשנת בתפלת עמך: <sup>5</sup> האכלתם לחם דמעה ותשקמו בדמעות שלישי: <sup>6</sup> תשימנו מרון לשכנינו ואיבינו ילענו למו: <sup>7</sup> אלהים צבאות השיבנו והאר פניך ונושעה: <sup>8</sup> גפן ממצרים תסיע תגרש גוים ותטעה: <sup>9</sup> פנית לפנייה ותשרש שרשיה ותמלא ארץ: <sup>10</sup> כסו הרים צלה וענפיה ארזי אל: <sup>11</sup> תשלח קצירה עד ים ואל נהר יונקותיה: <sup>12</sup> למה פרצת גדריה וארוה כל עברי דרך: <sup>13</sup> יכרסמנה חזיר מיער וזיו שדי ירענה: <sup>14</sup> אלהים צבאות שוב נא הבט משמים וראה ופקד גפן זאת: <sup>15</sup> וכנה אשר נטעה ימינך ועל בן אמצתה לך: <sup>16</sup> שרפה באש כסוחה מגערת פניך יאבדו: <sup>17</sup> תהי



ידך על איש ימינך על בן אדם אמצת לך: 18 ולא נסוג ממך תחינו ובשמך נקרא: 19 יהוה אלהים צבאות השיבנו האר פניך ונושעה:

## 81

1 למנצח על הגתית לאסף הרנינו לאלהים עוזנו הריעו לאלהי יעקב: 2 שאו זמרה ותנו תף כנור נעים עם נבל: 3 תקעו בחדש שופר בכסה ליום חגנו: 4 כי חק לישראל הוא משפט לאלהי יעקב: 5 עדות ביהוסף שמו בצאתו על ארץ מצרים שפת לא ידעתי אשמע: 6 הסירותי מסבל שכמו כפיו מדוד תעברנה: 7 בצרה קראת ואחלצך אענך בסתר רעם אבחנך על מי מריבה סלה: 8 שמע עמי ואעידה בך ישראל אם תשמע לי: 9 לא יהיה בך אל זר ולא תשתחוה לאל נכר: 10 אנכי יהוה אלהיך המעלך מארץ מצרים הרחב פיך ואמלאהו: 11 ולא שמע עמי לקולי וישראל לא אבה לי: 12 ואשלחן בשרירות לבם ילכו במועצותיהם: 13 לו עמי שמע לי ישראל בדרכי יהלכו: 14 כמעט אויביהם אכניע ועל צריהם אשיב ידי: 15 משנאי יהוה יכחשו לו ויהי עתם לעולם: 16 ויאכילהו מחלב חטה ומצור דבש אשביעך:

## 82

1 מזמור לאסף אלהים נצב בעדת אל בקרב אלהים ישפט: 2 עד מתי תשפטו עול לפני רשעים תשאו סלה: 3 שפטו דל ויתום עני ורש הצדיקן: 4 פלטו דל ואביון מיד רשעים הצילו: 5 לא ידעו ולא יבינו בחשכה

יתהלכו ימוטו כל מוסדי ארץ: <sup>6</sup> אני אמרתי אלהים אתם  
ובני עליון כלכם: <sup>7</sup> אכן כאדם תמותון וכאחד השרים  
תפלו: <sup>8</sup> קומה אלהים שפטה הארץ כי אתה תנחל בכל  
הגוים:

## 83

<sup>1</sup> שיר מזמור לאסף אלהים אל דמי לך אל תחרש  
ואל תשקט אל: <sup>2</sup> כי הנה אויביך יהמיון ומשנאיך נשאו  
ראש: <sup>3</sup> על עמך יערימו סוד ויתיעצו על צפוניך: <sup>4</sup> אמרו  
לכו ונכחידם מגוי ולא יזכר שם ישראל עוד: <sup>5</sup> כי נועצו  
לב יחדו עליך ברית יכרתו: <sup>6</sup> אהלי אדום וישמעאלים  
מואב והגרים: <sup>7</sup> גבל ועמון ועמלק פלשת עם ישבי צור:  
<sup>8</sup> גם אשור נלוה עמם היו זרוע לבני לוט סלה: <sup>9</sup> עשה  
להם כמדון כסיסרא כיבין בנחל קישון: <sup>10</sup> נשמדו בעין  
דאר היו דמן לאדמה: <sup>11</sup> שיתמו נדיבמו כערב וכזאב  
וכזבח וכצלמנע כל נסיכמו: <sup>12</sup> אשר אמרו נירשה לנו  
את נאות אלהים: <sup>13</sup> אלהי שיתמו כגלגל כקש לפני רוח:  
<sup>14</sup> כאש תבער יער וכלהבה תלהט הרים: <sup>15</sup> כן תרדפם  
בסערך ובסופתך תבהלם: <sup>16</sup> מלא פניהם קלון ויבקשו  
שמך יהוה: <sup>17</sup> יבשו ויבהלו עדי עד ויחפרו ויאבדו:  
<sup>18</sup> וידעו כי אתה שמך יהוה לבדך עליון על כל הארץ:

## 84

<sup>1</sup> למנצח על הגתית לבני קרח מזמור מה ידידות  
משכנותיך יהוה צבאות: <sup>2</sup> נכספה וגם כלתה נפשי  
לחצרות יהוה לבי ובשרי ירננו אל אל חי: <sup>3</sup> גם צפור  
מצאה בית ודרור קן לה אשר שתה אפרחיה את

מזבחותיך יהוה צבאות מלכי ואלהי: 4 אשרי יושבי ביתך עוד יהללוך סלה: 5 אשרי אדם עוז לו בך מסלות בלבבם: 6 עברי בעמק הבכא מעין ישיתוהו גם ברכות יעטה מורה: 7 ילכו מחיל אל חיל יראה אל אלהים בציון: 8 יהוה אלהים צבאות שמעה תפילתי האזינה אלהי יעקב סלה: 9 מגננו ראה אלהים והבט פני משיחך: 10 כי טוב יום בחצריך מאלף בחרתי הסתופף בבית אלהי מדור באהלי רשע: 11 כי שמש ומגן יהוה אלהים חן וכבוד יתן יהוה לא ימנע טוב להלכים בתמים: 12 יהוה צבאות אשרי אדם בטח בך:

## 85

1 למנצח לבני קרח מזמור רצית יהוה ארצך שבת שבות יעקב: 2 נשאת עון עמך כסית כל חטאתם סלה: 3 אספת כל עברתך השיבות מחרון אפך: 4 שובנו אלהי ישענו והפר כעסך עמנו: 5 הלעולם תאנף בנו תמשך אפך לדר ודר: 6 הלא אתה תשוב תחינו ועמך ישמחו בך: 7 הראנו יהוה חסדך וישעך תתן לנו: 8 אשמעה מה ידבר האל יהוה כי ידבר שלום אל עמו ואל חסידיו ואל ישובו לכסלה: 9 אך קרוב ליראיו ישעו לשכן כבוד בארצנו: 10 חסד ואמת נפגשו צדק ושלום נשקו: 11 אמת מארץ תצמח וצדק משמים נשקף: 12 גם יהוה יתן הטוב וארצנו תתן יכולה: 13 צדק לפניו יהלך וישם לדרך פעמיו:

## 86

1 תפלה לרודד הטה יהוה אזנך ענני כי עני ואביון

אני: 2 שמרה נפשי כי חסיד אני הושע עבדך אתה  
אלהי הבוטח אליך: 3 חנני אדני כי אליך אקרא כל  
היום: 4 שמח נפש עבדך כי אליך אדני נפשי אשא:  
5 כי אתה אדני טוב וסלח ורב חסד לכל קראיך:  
6 האזינה יהוה תפלתי והקשיבה בקול תחנונותי: 7 ביום  
צרתי אקראך כי תענני: 8 אין כמוך באלהים אדני ואין  
כמעשיך: 9 כל גוים אשר עשית יבואו וישתחוו לפניך  
אדני ויכבדו לשמך: 10 כי גדול אתה ועשה נפלאות אתה  
אלהים לבדך: 11 הורני יהוה דרכך אהלך באמתך יחד  
לבבי ליראה שמך: 12 אודך אדני אלהי בכל לבבי  
ואכבדה שמך לעולם: 13 כי חסדך גדול עלי והצלת  
נפשי משאול תחתיה: 14 אלהים זדים קמו עלי ועדת  
עריצים בקשו נפשי ולא שמוך לנגדם: 15 ואתה אדני  
אל רחום וחנון ארך אפים ורב חסד ואמת: 16 פנה אלי  
וחנני תנה עזך לעבדך והושיעה לבן אמתך: 17 עשה  
עמי אות לטובה ויראו שנאי ויבשו כי אתה יהוה עזרתני  
ונחמתני:

## 87

1 לבני קרח מזמור שיר יסודתו בהררי קדש: 2 אהב  
יהוה שערי ציון מכל משכנות יעקב: 3 נכבדות מדבר  
בך עיר האלהים סלה: 4 אזכיר רהב ובבל לידעי הנה  
פלשת וצור עם כוש זה ילד שם: 5 ולציון יאמר איש  
ואיש ילד בה והוא יכוננה עליון: 6 יהוה יספר בכתוב  
עמים זה ילד שם סלה: 7 ושרים כחללים כל מעיני בך:

## 88

1 שיר מזמור לבני קרח למנצח על מחלת לענות משכיל להימן האזרחי יהוה אלהי ישועתי יום צעקתי בלילה נגדך: 2 תבוא לפניך תפלתי הטה אזנך לרנתי: 3 כי שבעה ברעות נפשי וחיי לשאול הגיעו: 4 נחשבתי עם יורדי בור הייתי כגבר אין איל: 5 במתים חפשי כמו חללים שכבי קבר אשר לא זכרתם עוד והמה מידך נגזרו: 6 שני בבור תחתיות במחשכים במצללות: 7 עלי סמכה חמתך וכל משבריך ענית סלה: 8 הרחקת מידעי ממני שני תועבות למו כלא ולא אצא: 9 עיני דאבה מני עני קראתיך יהוה בכל יום שטחתי אליך כפי: 10 הלמתים תעשה פלא אם רפאים יקומו יודוך סלה: 11 היספר בקבר חסדך אמונתך באבדון: 12 היודע בחשך פלאך וצדקתך בארץ נשיה: 13 ואני אליך יהוה שועתי ובבקר תפלתי תקדמך: 14 למה יהוה תזנח נפשי תסתיר פניך ממני: 15 עני אני וגוע מגער נשאתי אמיד אפונה: 16 עלי עברו חרוניך בעותיך צמתותני: 17 סבוני כמים כל היום הקיפו עלי יחד: 18 הרחקת ממני אהב ורע מידעי מחשך:

## 89

1 משכיל לאיתן האזרחי חסדי יהוה עולם אשירה לדר ודר אודיע אמונתך בפי: 2 כי אמרתי עולם חסד יבנה שמים תכן אמונתך בהם: 3 כרתי ברית לבחירי נשבעתי לדוד עבדי: 4 עד עולם אכין זרעך ובניתי לדר ודור כסאך סלה: 5 ויודו שמים פלאך יהוה אף אמונתך

בקהל קדשים: <sup>6</sup> כי מי בשחק יערך ליהוה ידמה ליהוה  
 בבני אלים: <sup>7</sup> אל נערץ בסוד קדשים רבה ונורא על  
 כל סביביו: <sup>8</sup> יהוה אלהי צבאות מי כמוך חסין יה  
 ואמונתך סביבותיך: <sup>9</sup> אתה מושל בגאות הים בשוא גליו  
 אתה תשבחם: <sup>10</sup> אתה דכאת כחלל רהב בזרוע עזך  
 פזרת אויביך: <sup>11</sup> לך שמים אף לך ארץ תבל ומלאה  
 אתה יסדתם: <sup>12</sup> צפון וימין אתה בראתם תבור וחרמון  
 בשמך ירננו: <sup>13</sup> לך זרוע עם גבורה תעז ירך תרום  
 ימינך: <sup>14</sup> צדק ומשפט מכון כסאך חסד ואמת יקדמו  
 פניך: <sup>15</sup> אשרי העם יודעי תרועה יהוה באור פניך  
 יהלכון: <sup>16</sup> בשמך יגילון כל היום ובצדקתך ירומו:  
<sup>17</sup> כי תפארת עזמו אתה וברצנך תרים קרננו: <sup>18</sup> כי  
 ליהוה מגננו ולקדוש ישראל מלכנו: <sup>19</sup> אז דברת בחזון  
 לחסידריך ותאמר שויתי עזר על גבור הרימותי בחור  
 מעם: <sup>20</sup> מצאתי דוד עבדי בשמן קדשי משחתיו: <sup>21</sup> אשר  
 ידי תכון עמו אף זרועי תאמצנו: <sup>22</sup> לא ישא אויב בו ובן  
 עולה לא יעננו: <sup>23</sup> וכתותי מפניו צריו ומשנאיו אנוף:  
<sup>24</sup> ואמונתו וחסדי עמו ובשמי תרום קרנו: <sup>25</sup> ושמתו  
 בים ידו ובנהרות ימינו: <sup>26</sup> הוא יקראני אבי אתה אלי  
 וצור ישועתי: <sup>27</sup> אף אני בכור אתנהו עליון למלכי ארץ:  
<sup>28</sup> לעולם אשמור לו חסדי ובריתי נאמנת לו: <sup>29</sup> ושמתו  
 לעד זרעו וכסאו כימי שמים: <sup>30</sup> אם יעזבו בניו תורתו  
 ובמשפטי לא ילכון: <sup>31</sup> אם חקתי יחללו ומצותי לא  
 ישמרו: <sup>32</sup> ופקדתי בשבת פשעם ובנגעים עונם: <sup>33</sup> וחסדי  
 לא אפיר מעמו ולא אשקר באמונתו: <sup>34</sup> לא אחלל בריתי  
 ומוצא שפתי לא אשנה: <sup>35</sup> אחת נשבעתי בקדשי אם

לדוד אכזב: 36 זרעו לעולם יהיה וכסאו כשמש ננדי:  
 37 כירח יכון עולם ועד בשחק נאמן סלה: 38 ואתה זנחת  
 ותמאס התעברת עם משיחך: 39 נארתה ברית עבדך  
 חללת לארץ נזרו: 40 פרצת כל גדרתיו שמת מבצריו  
 מחתה: 41 שסהו כל עברי דרך היה חרפה לשכניו:  
 42 הרימות ימין צריו השמחת כל אויביו: 43 אף תשיב  
 צור חרבו ולא הקימתו במלחמה: 44 השבת מטהרו  
 וכסאו לארץ מגרתה: 45 הקצרת ימי עלומיו העטית  
 עליו בושח סלה: 46 עד מה יהוה תסתיר לנצח תבער  
 כמו אש חמתך: 47 זכר אני מה חלד על מה שוא בראת  
 כל בני אדם: 48 מי גבר יחיה ולא יראה מות ימלט  
 נפשו מיד שאול סלה: 49 איה חסדיך הראשנים אדני  
 נשבעת לדוד באמונתך: 50 זכר אדני חרפת עבדיך  
 שאתי בחיקי כל רבים עמים: 51 אשר חרפו אויביך יהוה  
 אשר חרפו עקבות משיחך: 52 ברוך יהוה לעולם אמן  
 ואמן:

## 90

1 תפלה למשה איש האלהים אדני מעון אתה היית  
 לנו בדר ודר: 2 בטרם הרים ילדו ותחולל ארץ ותבל  
 ומעולם עד עולם אתה אל: 3 תשב אנוש עד דכא ותאמר  
 שובו בני אדם: 4 כי אלף שנים בעיניך כיום אתמול  
 כי יעבר ואשמורה בלילה: 5 זרמתם שנה יהיו בבקר  
 כחציר יחלף: 6 בבקר יציץ וחלף לערב ימולל ויבש:  
 7 כי כלינו באפך ובחמתך נבהלנו: 8 שת עונתינו לנגדך  
 עלמנו למאור פניך: 9 כי כל ימינו פנו בעברתך כלינו

שנינו כמו הגה: 10 ימי שנותינו בהם שבעים שנה ואם  
בגבורת שמונים שנה ורהבם עמל ואון כי גז חיש ונעפה:  
11 מי יודע עז אפך וכיראתך עברתך: 12 למנות ימינו כן  
הודע ונבא לבב חכמה: 13 שובה יהוה עד מתי והנחם  
על עבדיך: 14 שבענו בבקר חסדך ונרננה ונשמחה בכל  
ימינו: 15 שמחנו כימות עניתנו שנות ראינו רעה: 16 יראה  
אל עבדיך פעלך והדרך על בניהם: 17 ויהי נעם אדני  
אלהינו עלינו ומעשה ידינו כוננה עלינו ומעשה ידינו  
כוננהו:

## 91

1 ישב בסתר עליון בצל שדי יתלונן: 2 אמר ליהוה  
מחסי ומצודתי אלהי אבטח בו: 3 כי הוא יצילך מפח  
יקוש מדבר הוות: 4 באברתו יסך לך ותחת כנפיו תחסה  
צנה וסחרה אמתו: 5 לא תירא מפחד לילה מחץ יעוף  
יומם: 6 מדבר באפל יהלך מקטב ישוד צהרים: 7 יפל  
מצדך אלף ורבבה מימינך אליך לא יגש: 8 רק בעיניך  
תביט ושלמת רשעים תראה: 9 כי אתה יהוה מחסי  
עליון שמת מעונך: 10 לא תאנה אליך רעה ונגע לא  
יקרב באהלך: 11 כי מלאכיו יצוה לך לשמרך בכל  
דרכיך: 12 על כפים ישאונך פן תגף באבן רגלך: 13 על  
שחל ופתן תדרך תרמס כפיר ותנין: 14 כי בי חשק  
ואפלטוהו אשגבהו כי ידע שמי: 15 יקראני ואענהו עמו  
אנכי בצרה אחלצהו ואכבדהו: 16 ארך ימים אשביעהו  
ואראהו בישועתי:

## 92

1 מזמור שיר ליום השבת טוב להדות ליהוה ולזמר



לשמך עליון: 2 להגיד בבקר חסדך ואמונתך בלילות:  
 3 עלי עשור ועלי נבל עלי הגיון בכנור: 4 כי שמחתני  
 יהוה בפעלך במעשי ידיך ארנן: 5 מה גדלו מעשיך  
 יהוה מאד עמקו מחשבתך: 6 איש בער לא ידע וכסיל  
 לא יבין את זאת: 7 בפרח רשעים כמו עשב ויציצו כל  
 פעלי און להשמדם עדי עד: 8 ואתה מרום לעלם יהוה:  
 9 כי הנה איביך יהוה כי הנה איביך יאבדו יתפרדו  
 כל פעלי און: 10 ותרם כראים קרני בלתי בשמן רענן:  
 11 ותבט עיני בשורי בקמים עלי מרעים תשמענה אזני:  
 12 צדיק כתמר יפרח כארז בלבנון ישגה: 13 שתולים  
 בבית יהוה בחצרות אלהינו יפריחו: 14 עוד ינובון  
 בשיבה דשנים ורעננים יהיו: 15 להגיד כי ישר יהוה  
 צורי ולא עלתה בו:

## 93

1 יהוה מלך גאות לבש לבש יהוה עז התאזר אף  
 תכון תבל בל תמוט: 2 נכון כסאך מאז מעולם אתה:  
 3 נשאו נהרות יהוה נשאו נהרות קולם ישאו נהרות  
 דכים: 4 מקלות מים רבים אדירים משברי ים אדיר  
 במרום יהוה: 5 עדתיך נאמנו מאד לביתך נאווה קדש  
 יהוה לארך ימים:

## 94

1 אל נקמות יהוה אל נקמות הופיע: 2 הנשא שפט  
 הארץ השב גמול על גאים: 3 עד מתי רשעים יהוה עד  
 מתי רשעים יעלזו: 4 יביעו ידברו עתק ותאמרו כל פעלי

און: 5 עמך יהוה ידכאו ונחלתך יענו: 6 אלמנה וגר יהרגו  
 ויתומים ירצחו: 7 ויאמרו לא יראה יה ולא יבין אלהי  
 יעקב: 8 בינו בערים בעם וכסילים מתי תשכילו: 9 הנטע  
 אזן הלא ישמע אם יצר עין הלא יביט: 10 היסר גוים  
 הלא יוכיח המלמד אדם דעת: 11 יהוה ידע מחשבות  
 אדם כי המה הבל: 12 אשרי הגבר אשר תיסרנו יה  
 ומתורתך תלמדנו: 13 להשקיט לו מימי רע עד יכרה  
 לרשע שחת: 14 כי לא יטש יהוה עמו ונחלתו לא יעזב:  
 15 כי עד צדק ישוב משפט ואחריו כל ישרי לב: 16 מי  
 יקום לי עם מרעים מי יתיצב לי עם פעלי און: 17 לולי  
 יהוה עזרתה לי כמעט שכנה דומה נפשי: 18 אם אמרתי  
 מטה רגלי חסדך יהוה יסעדני: 19 ברב שרעפי בקרבי  
 תנחומיך ישעשעו נפשי: 20 היחברך כסא הוות יצר עמל  
 עלי חק: 21 יגודו על נפש צדיק ודם נקי ירשיעו: 22 ויהי  
 יהוה לי למשגב ואלהי לצור מחסי: 23 וישב עליהם את  
 אונם וברעתם יצמיתם יצמיתם יהוה אלהינו:

## 95

1 לכו נרננה ליהוה נריעה לצור ישענו: 2 נקדמה  
 פנינו בתודה בזמרות נריע לו: 3 כי אל גדול יהוה  
 ומלך גדול על כל אלהים: 4 אשר בידו מחקרי ארץ  
 ותועפות הרים לו: 5 אשר לו הים והוא עשהו ויבשת  
 ידיו יצרו: 6 באו נשתחוו ונכרעה נברכה לפני יהוה  
 עשנו: 7 כי הוא אלהינו ואנחנו עם מרעיתו וצאן ידו  
 היום אם בקלו תשמעו: 8 אל תקשו לבבכם כמריבה  
 כיום מסה במדבר: 9 אשר נסוני אבותיכם בחנוני גם  
 ראו פעלי: 10 ארבעים שנה אקוט בדור ואמר עם תעי

לבב הם והם לא ידעו דרכי: 11 אשר נשבעתי באפי אם יבאון אל מנוחתתי:

## 96

1 שירו ליהוה שיר חדש שירו ליהוה כל הארץ:  
 2 שירו ליהוה ברכו שמו בשרו מיום ליום ישועתו:  
 3 ספרו בגוים כבודו בכל העמים נפלאותיו: 4 כי גדול יהוה ומהלל מאד נורא הוא על כל אלהים: 5 כי כל אלהי העמים אלילים ויהוה שמים עשה: 6 הוד והדר לפניו עז ותפארת במקדשו: 7 הבו ליהוה משפחות עמים הבו ליהוה כבוד ועז: 8 הבו ליהוה כבוד שמו שאו מנחה ובאו לחצרותיו: 9 השתחוו ליהוה בהדרת קדש חילו מפניו כל הארץ: 10 אמרו בגוים יהוה מלך אף תכון תבל כל תמוט ידין עמים במישרים: 11 ישמחו השמים ותגל הארץ ירעם הים ומלאו: 12 יעלז שדי וכל אשר בו אז ירננו כל עצי יער: 13 לפני יהוה כי בא כי בא לשפט הארץ ישפט תבל בצדק ועמים באמונתו:

## 97

1 יהוה מלך תגל הארץ ישמחו איים רבים: 2 ענו וערפל סביביו צדק ומשפט מכון כסאו: 3 אש לפניו תלך ותלהט סביב צריו: 4 האירו ברקיו תבל ראתה ותחל הארץ: 5 הרים כדונג נמסו מלפני יהוה מלפני אדון כל הארץ: 6 הגידו השמים צדקו וראו כל העמים כבודו: 7 יבשו כל עבדי פסל המתהללים באלילים השתחוו לו כל אלהים: 8 שמעה ותשמח ציון ותגלגלה בנות יהודה למען משפטיך יהוה: 9 כי אתה יהוה עליון

על כל הארץ מאד נעלית על כל אלהים: 10 אהבי יהוה שנאו רע שמר נפשות חסידיו מיד רשעים יצילם: 11 אור זרע לצדיק ולישרי לב שמחה: 12 שמחו צדיקים ביהוה והודו לזכר קדשו:

## 98

1 מזמור שירו ליהוה שיר חדש כי נפלאות עשה הושיעה לו ימינו וזרוע קדשו: 2 הודיע יהוה ישועתו לעיני הגוים גלה צדקתו: 3 זכר חסדו ואמונתו לבית ישראל ראו כל אפסי ארץ את ישועת אלהינו: 4 הריעו ליהוה כל הארץ פצחו ורננו וזמרו: 5 זמרו ליהוה בכנור בכנור וקול זמרה: 6 בחצצרות וקול שופר הריעו לפני המלך יהוה: 7 ירעם הים ומלאו תבל וישיבי בה: 8 נהרות ימחאו כף יחד הרים ירננו: 9 לפני יהוה כי בא לשפט הארץ ישפט תבל בצדק ועמים במישרים:

## 99

1 יהוה מלך ירגזו עמים ישב כרובים תנוט הארץ: 2 יהוה בציון גדול ורם הוא על כל העמים: 3 יודו שמך גדול ונורא קדוש הוא: 4 ועז מלך משפט אהב אתה כוננת מישרים משפט וצדקה ביעקב אתה עשית: 5 רוממו יהוה אלהינו והשתחוו להדם רגליו קדוש הוא: 6 משה ואהרן בכהניו ושמואל בקראי שמו קראים אל יהוה והוא יענם: 7 בעמוד ענן ידבר אליהם שמרו עדתיו וחק נתן למו: 8 יהוה אלהינו אתה עניתם אל נשא היית

להם ונקם על עלילותם: <sup>9</sup> רוממו יהוה אלהינו והשתחונו  
להר קדשו כי קדוש יהוה אלהינו:

## 100

<sup>1</sup> מזמור לתודה הריעו ליהוה כל הארץ: <sup>2</sup> עבדו את  
יהוה בשמחה באו לפניו ברננה: <sup>3</sup> דעו כי יהוה הוא  
אלהים הוא עשנו ולא אנחנו עמו וצאן מרעיתו: <sup>4</sup> באו  
שעריו בתודה חצרתיו בתהלה הודו לו ברכו שמו: <sup>5</sup> כי  
טוב יהוה לעולם חסדו ועד דר ודר אמונתו:

## 101

<sup>1</sup> לדוד מזמור חסד ומשפט אשירה לך יהוה אזמרה:  
<sup>2</sup> אשכילה בדרך תמים מתי תבוא אלי אתהלך בתם  
לבבי בקרב ביתי: <sup>3</sup> לא אשית לנגד עיני דבר בליעל  
עשה סטים שנאתי לא ידבק בי: <sup>4</sup> לבב עקש יסור ממני  
רע לא אדע: <sup>5</sup> מלושני בסתר רעהו אותו אצמית גבה  
עינים ורחב לבב אתו לא אוכל: <sup>6</sup> עיני בנאמני ארץ  
לשבת עמדי הלך בדרך תמים הוא ישרתני: <sup>7</sup> לא ישב  
בקרב ביתי עשה רמיה דבר שקרים לא יכון לנגד עיני:  
<sup>8</sup> לבקרים אצמית כל רשעי ארץ להכרית מעיר יהוה  
כל פעלי און:

## 102

<sup>1</sup> תפלה לעני כי יעטרף ולפני יהוה ישפך שיחו יהוה  
שמעה תפלתי ושועתי אליך תבוא: <sup>2</sup> אל תסתר פניך  
ממני ביום צר לי הטה אלי אזנך ביום אקרא מהר ענני:  
<sup>3</sup> כי כלו בעשן ימי ועצמותי כמו קד נחרו: <sup>4</sup> הוכה

כעשב ויבש לבי כי שכחתי מאכל לחמי: <sup>5</sup> מקול אנחתי  
 דבקה עצמי לבשרי: <sup>6</sup> דמותי לקאת מדבר הייתי ככוס  
 חרבות: <sup>7</sup> שקדתי ואהיה כצפור בודד על גג: <sup>8</sup> כל  
 היום חרפוני אויבי מהוללי בי נשבעו: <sup>9</sup> כי אפר כלחם  
 אכלתי ושקוי בבכי מסכתי: <sup>10</sup> מפני זעמך וקצפך כי  
 נשאתני ותשליכני: <sup>11</sup> ימי כצל נטוי ואני כעשב איבש:  
<sup>12</sup> ואתה יהוה לעולם תשב וזכרך לדר ודר: <sup>13</sup> אתה  
 תקום תרחם ציון כי עת לחננה כי בא מועד: <sup>14</sup> כי  
 רצו עבדיך את אבניה ואת עפרה יחננו: <sup>15</sup> וייראו גוים  
 את שם יהוה וכל מלכי הארץ את כבודך: <sup>16</sup> כי בנה  
 יהוה ציון נראה בכבודו: <sup>17</sup> פנה אל תפלת הערער ולא  
 בזה את תפלתם: <sup>18</sup> תכתב זאת לדור אחרון ועם נברא  
 יהלל יה: <sup>19</sup> כי השקיף ממרום קדשו יהוה משמים אל  
 ארץ הביט: <sup>20</sup> לשמע אנקת אסיר לפתח בני תמותה:  
<sup>21</sup> לספר בציון שם יהוה ותהלתו בירושלם: <sup>22</sup> בהקבץ  
 עמים יחדו וממלכות לעבד את יהוה: <sup>23</sup> ענה בדרך כחו  
 קצר ימי: <sup>24</sup> אמר אלי אל תעלני בחצי ימי בדור דורים  
 שנותיך: <sup>25</sup> לפני הארץ יסדת ומעשה ידיך שמים:  
<sup>26</sup> המה יאבדו ואתה תעמד וכלם כבגד יבלו כלבוש  
 תחליפם ויחלפו: <sup>27</sup> ואתה הוא ושנותיך לא יתמו: <sup>28</sup> בני  
 עבדיך ישכנו וזרעם לפניך יכון:

## 103

<sup>1</sup> לדוד ברכי נפשי את יהוה וכל קרבי את שם  
<sup>2</sup> קדשו: ברכי נפשי את יהוה ואל תשכחי כל גמוליו:

3 הסלת לכל עונכי הרפא לכל תחלאיכי: 4 הנואל משחת חייכי המעטרכי חסד ורחמים: 5 המשביע בטוב עדיך תתחדש כנשר נעורייכי: 6 עשה צדקות יהוה ומשפטים לכל עשוקים: 7 יודיע דרכיו למשה לבני ישראל עלילותיו: 8 רחום וחנון יהוה ארך אפים ורב חסד: 9 לא לנצח יריב ולא לעולם יטור: 10 לא כחטאינו עשה לנו ולא כעונתינו גמל עלינו: 11 כי כגבה שמים על הארץ גבר חסדו על יראיו: 12 כרחק מזרח ממערב הרחיק ממנו את פשעינו: 13 כרחם אב על בנים רחם יהוה על יראיו: 14 כי הוא ידע יצרנו זכור כי עפר אנחנו: 15 אנוש כחציר ימיו כציץ השדה כן יציץ: 16 כי רוח עברה בו ואיננו ולא יכירנו עוד מקומו: 17 וחסד יהוה מעולם ועד עולם על יראיו וצדקתו לבני בנים: 18 לשמרי בריתו ולזכרי פקדיו לעשותם: 19 יהוה בשמים הכין כסאו ומלכותו בכל משלה: 20 ברכו יהוה מלאכיו גברי כח עשי דברו לשמע בקול דברו: 21 ברכו יהוה כל צבאיו משרתיו עשי רצונו: 22 ברכו יהוה כל מעשיו בכל מקומות ממשלתו ברכי נפשי את יהוה:

## 104

1 ברכי נפשי את יהוה יהוה אלהי גדלת מאד הוד והדר לבשת: 2 עטה אור כשלמה נוטה שמים כיריעה: 3 המקרה במים עליותיו השם עבים רכובו המהלך על כנפי רוח: 4 עשה מלאכיו רוחות משרתיו אש להט: 5 יסד ארץ על מכוניה בל תמוט עולם ועד: 6 תהום כלבוש כסיתו על הרים יעמדו מים: 7 מן גערתך ינוסון מן קול רעמך יחפזון: 8 יעלו הרים ירדו בקעות אל

מקום זה יסדת להם: <sup>9</sup> גבול שמת בל יעברון בל ישובון  
לכסות הארץ: <sup>10</sup> המשלח מעינים בנחלים בין הרים  
יהלכון: <sup>11</sup> ישקו כל חיתו שדי ישברו פראים צמאם:  
<sup>12</sup> עליהם עוף השמים ישכון מבין עפאים יתנו קול:  
<sup>13</sup> משקה הרים מעליותיו מפרי מעשיך תשבע הארץ:  
<sup>14</sup> מצמיח חציר לבהמה ועשב לעבדת האדם להוציא  
לחם מן הארץ: <sup>15</sup> ויין ישמח לבב אנוש להצהיל פנים  
משמן ולחם לבב אנוש יסעד: <sup>16</sup> ישבעו עצי יהוה ארזי  
לבנון אשר נטע: <sup>17</sup> אשר שם צפרים יקננו חסידה  
ברושים ביתה: <sup>18</sup> הרים הגבהים ליעלים סלעים מחסה  
לשפנים: <sup>19</sup> עשה ירח למועדים שמש ידע מבואו:  
<sup>20</sup> תשת חשך ויהי לילה בו תרמש כל חיתו יער:  
<sup>21</sup> הכפירים שאגים לטרף ולבקש מאל אכלם: <sup>22</sup> תזרח  
השמש יאספון ואל מעונתם ירבצון: <sup>23</sup> יצא אדם לפעלו  
ולעבדתו עדי ערב: <sup>24</sup> מה רבו מעשיך יהוה כלם  
בחכמה עשית מלאה הארץ קנינך: <sup>25</sup> זה הים גדול  
ורחב ידיים שם רמש ואין מספר חיות קטנות עם גדלות:  
<sup>26</sup> שם אניות יהלכון לויתן זה יצרת לשחק בו: <sup>27</sup> כלם  
אליך ישברון לתת אכלם בעתו: <sup>28</sup> תתן להם ילקטון  
תפתח ירך ישבעון טוב: <sup>29</sup> תסתיר פניך יבהלון תסף  
רוחם יגועון ואל עפרם ישובון: <sup>30</sup> תשלח רוחך יבראון  
ותחדש פני אדמה: <sup>31</sup> יהי כבוד יהוה לעולם ישמח יהוה  
במעשיו: <sup>32</sup> המביט לארץ ותרעד יגע בהרים ויעשנו:  
<sup>33</sup> אשירה ליהוה בחיי אזמרה לאלהי בעודי: <sup>34</sup> יערב  
עליו שיחי אנכי אשמח ביהוה: <sup>35</sup> יתמו חטאים מן הארץ



ורשעים עוד אינם ברכי נפשי את יהוה הללו יה:

## 105

1 הודו ליהוה קראו בשמו הודיעו בעמים עלילותיו:  
 2 שירו לו זמרו לו שיחו בכל נפלאותיו: 3 התהללו בשם קדשו ישמח לב מבקשי יהוה: 4 דרשו יהוה ועזו בקשו פניו תמיד: 5 זכרו נפלאותיו אשר עשה מפתיו ומשפטי פיו: 6 זרע אברהם עבדו בני יעקב בחיריו: 7 הוא יהוה אלהינו בכל הארץ משפטיו: 8 זכר לעולם בריתו דבר צוה לאלף דור: 9 אשר כרת את אברהם ושבעתו לישחק: 10 ויעמידה ליעקב לחק לישראל ברית עולם: 11 לאמר לך אתן את ארץ כנען חבל נחלתכם: 12 בהיותם מתי מספר כמעט וגרים בה: 13 ויתהלכו מגוי אל גוי מממלכה אל עם אחר: 14 לא הניח אדם לעשקם ויוכח עליהם מלכים: 15 אל תגעו במשיחי ולנביאי אל תרעו: 16 ויקרא רעב על הארץ כל מטה לחם שבר: 17 שלח לפניהם איש לעבד נמכר יוסף: 18 ענו בכבל רגליו ברזל באה נפשו: 19 עד עת בא דברו אמרת יהוה צרפתהו: 20 שלח מלך ויתירהו משל עמים ויפתחהו: 21 שמו אדון לביתו ומשל בכל קנינו: 22 לאסר שריו בנפשו וזקניו יחכם: 23 ויבא ישראל מצרים ויעקב גר בארץ חם: 24 ויפר את עמו מאד ויעצמהו מצריו: 25 הפך לבם לשנא עמו להתנכל בעבדיו: 26 שלח משה עבדו אהרן אשר בחר בו: 27 שמו במ דברי אתותיו ומפתים בארץ חם: 28 שלח חשך ויחשך ולא מרו את דבריו: 29 הפך את מימיהם

לדם וימת את דגתם: <sup>30</sup> שרץ ארצם צפרדעים בחדרי מלכיהם: <sup>31</sup> אמר ויבא ערב כנים בכל גבולם: <sup>32</sup> נתן גשמיהם ברד אש להבות בארצם: <sup>33</sup> ויך גפנם ותאנתם וישבר עץ גבולם: <sup>34</sup> אמר ויבא ארבה וילק ואין מספר: <sup>35</sup> ויאכל כל עשב בארצם ויאכל פרי אדמתם: <sup>36</sup> ויך כל בכור בארצם ראשית לכל אונם: <sup>37</sup> ויוציאם בכסף וזהב ואין בשבטיו כושל: <sup>38</sup> שמח מצרים בצאתם כי נפל פחדם עליהם: <sup>39</sup> פרש ענן למסך ואש להאיר לילה: <sup>40</sup> שאל ויבא שלו ולחם שמים ישביעם: <sup>41</sup> פתח צור ויזובו מים הלכו בציות נהר: <sup>42</sup> כי זכר את דבר קדשו את אברהם עבדו: <sup>43</sup> ויוצא עמו בששון ברנה את בחיריו: <sup>44</sup> ויתן להם ארצות גוים ועמל לאמים יירשו: <sup>45</sup> בעבור ישמרו חקיו ותורתיו ינצרו הללו יה:

## 106

<sup>1</sup> הללויה הודו ליהוה כי טוב כי לעולם חסדו:  
<sup>2</sup> מי ימלל גבורות יהוה ישמיע כל תהלתו: <sup>3</sup> אשרי שמרי משפט עשה צדקה בכל עת: <sup>4</sup> זכרני יהוה ברצון עמך פקדני בישועתך: <sup>5</sup> לראות בטובת בחיריך לשמח בשמחת גויך להתהלל עם נחלתך: <sup>6</sup> חטאנו עם אבותינו העוינו הרשענו: <sup>7</sup> אבותינו במצרים לא השכילו נפלאותיך לא זכרו את רב חסדיך וימרו על ים בים סוף: <sup>8</sup> ויושיעם למען שמו להודיע את גבורתו: <sup>9</sup> ויגער בים סוף ויחרב ויוליכם בתהמות כמדבר: <sup>10</sup> ויושיעם מיד שונא ויגאלם מיד אויב: <sup>11</sup> ויכסו מים צריהם אחד מהם לא נותר: <sup>12</sup> ויאמינו בדבריו ישירו

תהלתו: 13 מהרו שכחו מעשיו לא חכו לעצתו: 14 ויתאוו  
תאוה במדבר וינסו אל בשימון: 15 ויתן להם שאלתם  
וישלח רזון בנפשם: 16 ויקנאו למשה במחנה לאהרן  
קדוש יהוה: 17 תפתח ארץ ותבלע דתן ותכס על עדת  
אבירם: 18 ותבער אש בעדתם להבה תלהט רשעים:  
19 יעשו עגל בחרב וישתחוו למסכה: 20 וימירו את  
כבודם בתבנית שור אכל עשב: 21 שכחו אל מושיעם  
עשה גדלות במצרים: 22 נפלאות בארץ חם נוראות  
על ים סוף: 23 ויאמר להשמידם לולי משה בחירו  
עמד בפרץ לפניו להשיב חמתו מהשחית: 24 וימאסו  
בארץ חמדה לא האמינו לדברו: 25 וירגנו באהליהם  
לא שמעו בקול יהוה: 26 וישא ידו להם להפיל אותם  
במדבר: 27 ולהפיל זרעם בגוים ולזרותם בארצות:  
28 ויצמדו לבעל פעור ויאכלו זבחי מתים: 29 ויכעיסו  
במעלליהם ותפרץ בם מגפה: 30 ויעמד פינחס ויפלל  
ותעצר המגפה: 31 ותחשב לו לצדקה לדר ודר עד  
עולם: 32 ויקציפו על מי מריבה וירע למשה בעבורם:  
33 כי המרו את רוחו ויבטא בשפתיו: 34 לא השמידו את  
העמים אשר אמר יהוה להם: 35 ויתערבו בגוים וילמדו  
מעשיהם: 36 ויעבדו את עצביהם ויהיו להם למוקש:  
37 ויזבחו את בניהם ואת בנותיהם לשדים: 38 וישפכו דם  
נקי דם בניהם ובנותיהם אשר זבחו לעצבי כנען ותחנף  
הארץ בדמים: 39 ויטמאו במעשיהם ויזנו במעלליהם:  
40 ויחר אף יהוה בעמו ויתעב את נחלתו: 41 ויתנם  
ביד גוים וימשלו בהם שנאיהם: 42 וילחצום אויביהם  
ויכנעו תחת ידם: 43 פעמים רבות יצילם והמה ימרו

בעצתם וימכו בעונם: 44 וירא בצר להם בשמעו את רנתם: 45 ויזכר להם בריתו וינחם כרב חסדו: 46 ויתן אותם לרחמים לפני כל שוביהם: 47 הושיענו יהוה אלהינו וקבצנו מן הגוים להדות לשם קדשך להשתבח בתהלתך: 48 ברוך יהוה אלהי ישראל מן העולם ועד העולם ואמר כל העם אמן הללו יה:

## 107

1 הרו ליהוה כי טוב כי לעולם חסדו: 2 יאמרו גאולי יהוה אשר גאלם מיד צר: 3 ומארצות קבצם ממזרח וממערב מצפון ומים: 4 תעו במדבר בשימון דרך עיר מושב לא מצאו: 5 רעבים גם צמאים נפשם בהם תתעטף: 6 ויצעקו אל יהוה בצר להם ממצוקותיהם יצילים: 7 ויודריכם בדרך ישרה ללכת אל עיר מושב: 8 יודו ליהוה חסדו ונפלאותיו לבני אדם: 9 כי השביע נפש שקקה ונפש רעבה מלא טוב: 10 ישבי חשך וצלמות אסירי עני וברזל: 11 כי המרו אמרי אל ועצת עליון נאצו: 12 ויכנע בעמל לבם כשלו ואין עזר: 13 ויזעקו אל יהוה בצר להם ממצקותיהם יושיעם: 14 יוציאם מחשך וצלמות ומוסרותיהם ינתק: 15 יודו ליהוה חסדו ונפלאותיו לבני אדם: 16 כי שבר דלתות נחשת ובריחי ברזל גדע: 17 אולים מדרך פשעם ומעונותיהם יתענו: 18 כל אכל תתעב נפשם ויגיעו עד שערי מות: 19 ויזעקו אל יהוה בצר להם ממצקותיהם יושיעם: 20 ישלח דברו וירפאם וימלט משחיתותם: 21 יודו ליהוה חסדו ונפלאותיו לבני אדם: 22 ויזבחו זבחי תודה ויספרו מעשיו ברנה: 23 יורדי הים באניות עשי מלאכה במים

רבים: 24 המה ראו מעשי יהוה ונפלאותיו במצולה:  
 25 ויאמר ויעמד רוח סערה ותרומם גליו: 26 יעלו  
 שמים ירדו תהומות נפשם ברעה תתמונג: 27 יחוגו וינעו  
 כשכור וכל חכמתם תתבלע: 28 ויצעקו אל יהוה בצר  
 להם וממצוקתיהם יוציאים: 29 יקם סערה לדממה ויחשו  
 גליהם: 30 וישמחו כי ישתקו וינחם אל מחוז חפצם:  
 31 יודו ליהוה חסדו ונפלאותיו לבני אדם: 32 וירממוהו  
 בקהל עם ובמושב זקנים יהללוהו: 33 ישם נהרות  
 למדבר ומצאי מים לצמאון: 34 ארץ פרי למלחה מרעת  
 ישבי בה: 35 ישם מדבר לאגם מים וארץ ציה למצאי  
 מים: 36 ויושב שם רעבים ויכוננו עיר מושב: 37 ויזרעו  
 שדות ויטעו כרמים ויעשו פרי תבואה: 38 ויברכם וירבו  
 מאד ובהמתם לא ימעט: 39 וימעטו וישחו מעצר רעה  
 ויגון: 40 שפך בוז על נדיבים ויתעם בתהו לא דרך:  
 41 וישגב אביון מעוני וישם כצאן משפחות: 42 יראו  
 ישרים וישמחו וכל עולה קפצה פיה: 43 מי חכם וישמר  
 אלה ויתבוננו חסדי יהוה:

## 108

1 שיר מזמור לדוד נכון לבי אלהים אשירה ואזמרה  
 אף כבודי: 2 עורה הנבל וכנור אעירה שחר: 3 אודך  
 בעמים יהוה ואזמרך בל אמים: 4 כי גדול מעל שמים  
 חסדך ועד שחקים אמתך: 5 רומה על שמים אלהים  
 ועל כל הארץ כבודך: 6 למען יחלצון ידידיך הושיעה  
 ימינך וענני: 7 אלהים דבר בקדשו אעלזה אחלקה  
 שכם ועמק סכות אמדד: 8 לי גלעד לי מגשה ואפרים  
 מעוז ראשי יהודה מחקקי: 9 מואב סיר רחצי על אדום

אשליך נעלי עלי פלשת אתרועע: 10 מי יבלני עיר  
 מבצר מי נחני עד אדום: 11 הלא אלהים זנחתנו ולא  
 תצא אלהים בצבאתינו: 12 הבה לנו עזרת מצר ושוא  
 תשועת אדם: 13 באלהים נעשה חיל והוא יבוס צרינו:

## 109

1 למנצח לדוד מזמור אלהי תהלתי אל תחרש:  
 2 כי פי רשע ופי מרמה עלי פתחו דברו אתי לשון  
 שקר: 3 ודברי שנאה סבבוני וילחמוני חנם: 4 תחת  
 אהבתי ישטנוני ואני תפלה: 5 וישימו עלי רעה תחת  
 טובה ושנאה תחת אהבתי: 6 הפקר עליו רשע ושטן  
 יעמד על ימינו: 7 בהשפטו יצא רשע ותפלתו תהיה  
 לחטאה: 8 יהיו ימיו מעטים פקדתו יקח אחר: 9 יהיו בניו  
 יתומים ואשתו אלמנה: 10 ונוע ונועו בניו ושאלו ודרשו  
 מחרבותיהם: 11 ינקש נושה לכל אשר לו ויבזו זרים  
 יגיעו: 12 אל יהי לו משך חסד ואל יהי חונן ליתומיו:  
 13 יהי אחריתו להכרית בדור אחר ימח שמו: 14 יזכר  
 עון אבתיו אל יהוה וחטאת אמו אל תמוח: 15 יהיו נגד  
 יהוה תמיד ויכרת מארץ זכרם: 16 יען אשר לא זכר  
 עשות חסד וירדף איש עני ואביון ונכאה לבב למוותת:  
 17 ויאהב קללה ותבואהו ולא חפץ בברכה ותרחק  
 ממנו: 18 וילבש קללה כמדו ותבא כמים בקרבו וכשמן  
 בעצמותיו: 19 תהי לו כבגד יעטה ולמזח תמיד יחגרה:  
 20 זאת פעלת שטני מאת יהוה והדברים רע על נפשי:  
 21 ואתה יהוה אדני עשה אתי למען שמך כי טוב חסדך  
 הצילני: 22 כי עני ואביון אנכי ולבי חלל בקרבי: 23 כצל  
 כנשותו נהלכתי ננערתי כארבה: 24 ברכי כשלו מצום

ובשרי כחש משמן: 25 ואני הייתי חרפה להם יראוני  
 נייעון ראשם: 26 עזרני יהוה אלהי הושיעני כחסדך:  
 27 וידעו כי ירך זאת אתה יהוה עשיתה: 28 יקללו המה  
 ואתה תברך קמו ויבשו ועבדך ישמח: 29 ילבשו שוטני  
 כלמה ויעטו כמעיל בשתם: 30 אודה יהוה מאד בפי  
 ובתוך רבים אהללנו: 31 כי יעמד לימין אביון להושיע  
 משפטי נפשו:

## 110

1 לרוד מזמור נאם יהוה לאדני שב לימיני עד אשית  
 איביך הדם לרגליך: 2 מטה עזך ישלח יהוה מציון רדה  
 בקרב איביך: 3 עמך נדבת ביום חילך בהדרי קדש  
 מרחם משחר לך טל ילדתיך: 4 נשבע יהוה ולא ינחם  
 אתה כהן לעולם על דברתי מלכי צדק: 5 אדני על  
 ימינך מחץ ביום אפו מלכים: 6 ידין בגוים מלא גויות  
 מחץ ראש על ארץ רבה: 7 מנחל בדרך ישתה על כן  
 ירים ראש:

## 111

1 הללו יה אודה יהוה בכל לבב ישרים ועדה:  
 2 גדלים מעשי יהוה דרושים לכל חפציהם: 3 הוד והדר  
 פעלו וצדקתו עמדת לעד: 4 זכר עשה לנפלאותיו חנון  
 ורחום יהוה: 5 טרף נתן ליראיו יזכר לעולם בריתו:  
 6 כח מעשיו הגיד לעמו לתת להם נחלת גוים: 7 מעשי  
 ידיו אמת ומשפט נאמנים כל פקודיו: 8 סמוכים לעד  
 לעולם עשויים באמת וישר: 9 פדות שלח לעמו צוה  
 לעולם בריתו קדוש ונורא שמו: 10 ראשית חכמה יראת  
 יהוה שכל טוב לכל עשיהם תהלתו עמדת לעד:

## 112

1 הללו יה אשרי איש ירא את יהוה במצותיו חפץ  
 מאד: 2 גבור בארץ יהיה זרעו דור ישרים יברך: 3 הון  
 ועשר בביתו וצדקתו עמדת לעד: 4 זרח בחשך אור  
 לישרים חנון ורחום וצדיק: 5 טוב איש חנון ומלוה  
 וכלכל דבריו במשפט: 6 כי לעולם לא ימוט לזכר  
 עולם יהיה צדיק: 7 משמועה רעה לא יירא נכון לבו  
 בטח ביהוה: 8 סמוך לבו לא יירא עד אשר יראה  
 בצריו: 9 פזר נתן לאביונים צדקתו עמדת לעד קרנו  
 תרום בכבוד: 10 רשע יראה וכעס שניו יחרק ונמס תאות  
 רשעים תאבד:

## 113

1 הללו יה הללו עבדי יהוה הללו את שם יהוה: 2 יהי  
 שם יהוה מברך מעתה ועד עולם: 3 ממזרח שמש עד  
 מבואו מהלל שם יהוה: 4 רם על כל גוים יהוה על  
 השמים כבודו: 5 מי כיהוה אלהינו המגביהי לשבת:  
 6 המשפילי לראות בשמים ובארץ: 7 מקימי מעפר דל  
 מאשפת ירים אביון: 8 להושיבי עם נדיבים עם נדיבי  
 עמו: 9 מושיבי עקרת הבית אם הבנים שמחה הללו יה:

## 114

1 בצאת ישראל ממצרים בית יעקב מעם לעז: 2 היתה  
 יהודה לקדשו ישראל ממשלותיו: 3 הים ראה וינס  
 הירדן יסב לאחור: 4 ההרים רקדו כאילים גבעות  
 כבני צאן: 5 מה לך הים כי תנוס הירדן תסב לאחור:  
 6 ההרים תרקדו כאילים גבעות כבני צאן: 7 מלפני אדון



חולי ארץ מלפני אלוה יעקב: 8 ההפכי הצור אנם מים  
חלמיש למעינו מים:

## 115

1 לא לנו יהוה לא לנו כי לשמך תן כבוד על  
חסדך על אמתך: 2 למה יאמרו הגוים איה נא אלהיהם:  
3 ואלהינו בשמים כל אשר חפץ עשה: 4 עצביהם כסף  
וזהב מעשה ידי אדם: 5 פה להם ולא ידברו עינים  
להם ולא יראו: 6 אזנים להם ולא ישמעו אף להם ולא  
יריחונו: 7 ידיהם ולא ימישונו רגליהם ולא יהלכו לא  
יהנו בגרונם: 8 כמוהם יהיו עשיהם כל אשר בטח בהם:  
9 ישראל בטח ביהוה עזרם ומגנם הוא: 10 בית אהרן  
בטחו ביהוה עזרם ומגנם הוא: 11 יראי יהוה בטחו  
ביהוה עזרם ומגנם הוא: 12 יהוה זכרנו יברך יברך  
את בית ישראל יברך את בית אהרן: 13 יברך יראי  
יהוה הקטנים עם הגדלים: 14 יסף יהוה עליכם עליכם  
ועל בניכם: 15 ברוכים אתם ליהוה עשה שמים וארץ:  
16 השמים שמים ליהוה והארץ נתן לבני אדם: 17 לא  
המתים יהללו יה ולא כל ירדי רומה: 18 ואנחנו נברך  
יה מעתה ועד עולם הללו יה:

## 116

1 אהבתי כי ישמע יהוה את קולי תחנוני: 2 כי הטח  
אזנו לי ובימי אקרא: 3 אפפוני חבלי מות ומצרי שאול  
מצאוני צרה ויגון אמצא: 4 ובשם יהוה אקרא אנה יהוה  
מלטה נפשי: 5 חנון יהוה וצדיק ואלהינו מרחם: 6 שמר  
פתאים יהוה דלותי ולי יהושיע: 7 שובי נפשי למנוחיכי

כי יהוה גמל עליכי: 8 כי חלצת נפשי ממות את עיני מן דמעה את רגלי מדחי: 9 אתהלך לפני יהוה בארצות החיים: 10 האמנתי כי אדבר אני עניתי מאד: 11 אני אמרתי בחפזי כל האדם כזב: 12 מה אשיב ליהוה כל תגמולוהי עלי: 13 כוס ישועות אשא ובשם יהוה אקרא: 14 נדרי ליהוה אשלם נגדה נא לכל עמו: 15 יקר בעיני יהוה המותה לחסידיו: 16 אנה יהוה כי אני עבדך אני עבדך בן אמתך פתחת למוסרי: 17 לך אזבח זבח תודה ובשם יהוה אקרא: 18 נדרי ליהוה אשלם נגדה נא לכל עמו: 19 בחצרות בית יהוה בתוככי ירושלם הללו יה:

## 117

1 הללו את יהוה כל גוים שבחוהו כל האמים: 2 כי גבר עלינו חסדו ואמת יהוה לעולם הללו יה:

## 118

1 הודו ליהוה כי טוב כי לעולם חסדו: 2 יאמר נא ישראל כי לעולם חסדו: 3 יאמרו נא בית אהרן כי לעולם חסדו: 4 יאמרו נא יראי יהוה כי לעולם חסדו: 5 מן המצר קראתי יה ענני במרחב יה: 6 יהוה לי לא אירא מה יעשה לי אדם: 7 יהוה לי בעזרי ואני אראה בשנאי: 8 טוב לחסות ביהוה מבטח באדם: 9 טוב לחסות ביהוה מבטח בנדיבים: 10 כל גוים סבבוני בשם יהוה כי אמילם: 11 סבוני גם סבבוני בשם יהוה כי אמילם: 12 סבוני כדבורים דעכו כאש קוצים בשם יהוה כי אמילם: 13 דחה דחיתני לנפל ויהוה עזרני: 14 עזי וזמרת יה ויהי לי לישועה: 15 קול רנה וישועה באהלי צדיקים ימין יהוה עשה חיל: 16 ימין יהוה רוממה ימין

יהוה עשה חיל: 17 לא אמות כי אחיה ואספר מעשי יה: 18 יסר יסרני יה ולמות לא נתנני: 19 פתחו לי שערי צדק אבא במ אודה יה: 20 זה השער ליהוה צדיקים יבאו בו: 21 אודך כי עניתני ותהי לי לישועה: 22 אבן מאסו הבונים היתה לראש פנה: 23 מאת יהוה היתה זאת היא נפלאות בעינינו: 24 זה היום עשה יהוה נגילה ונשמחה בו: 25 אנא יהוה הושיעה נא אנא יהוה הצליחה נא: 26 ברוך הבא בשם יהוה ברכנוכם מבית יהוה: 27 אל יהוה ויאר לנו אסרו חג בעבתים עד קרנות המזבח: 28 אלי אתה ואודך אלהי ארוממך: 29 הודו ליהוה כי טוב כי לעולם חסדו:

## 119

1 אשרי תמימי דרך התלכים בתורת יהוה: 2 אשרי נצרי עדתיו בכל לב ידרשוהו: 3 אף לא פעלו עולה בדרכיו הלכו: 4 אתה צויתתה פקדיך לשמר מאד: 5 אחלי יכנו דרכי לשמר חקיך: 6 אז לא אבוש בהביטי אל כל מצותיך: 7 אודך בישר לבב בלמדי משפטי צדקך: 8 את חקיך אשמר אל תעזבני עד מאד: 9 במה יזכה נער את ארחו לשמר כדברך: 10 בכל לבי דרשתיך אל תשגני ממצותיך: 11 בלבי צפנתי אמרתך למען לא אחטא לך: 12 ברוך אתה יהוה למדני חקיך: 13 בשפתי ספרתי כל משפטי פיך: 14 בדרך עדותיך ששתי כעל כל הון: 15 בפקדיך אישיחה ואביטה ארחתיך: 16 בחקתיך אשתעשע לא אשכח דברך: 17 גמל על עברך אחיה ואשמרה דברך:

18 גל עיני ואביטה נפלאות מתורתך: 19 גר אנכי בארץ  
 אל תסתר ממני מצותיך: 20 גרסה נפשי לתאבה אל  
 משפטיך בכל עת: 21 גערת זדים ארורים השנים  
 ממצותיך: 22 גל מעלי חרפה ובוז כי עדתיך נצרתני:  
 23 גם ישבו שרים בי נדברו עבדך ישיח בחקיך: 24 גם  
 עדתיך שעשעי אנשי עצתי: 25 דבקה לעפר נפשי חינו  
 כדברך: 26 דרכי ספרתי ותענני למדני חקיך: 27 דרך  
 פקודיך הבינני ואשיחה בנפלאותיך: 28 דלפה נפשי  
 מתונה קימני כדברך: 29 דרך שקר הסר ממני ותורתך  
 חנני: 30 דרך אמונה בחרתי משפטיך שויתי: 31 דבקתי  
 בעדותיך יהוה אל תבישני: 32 דרך מצותיך ארוץ  
 כי תרחיב לבי: 33 הורני יהוה דרך חקיך ואצרנה  
 עקב: 34 הבינני ואצרה תורתך ואשמרנה בכל לב:  
 35 הדריכני בנתיב מצותיך כי בו חפצתי: 36 הט לבי  
 אל עדותיך ואל אל בצע: 37 העבר עיני מראות שוא  
 בדרכך חינו: 38 הקם לעבדך אמרתך אשר ליראתך:  
 39 העבר חרפתי אשר יגרתני כי משפטיך טובים: 40 הנה  
 תאבתי לפקדיך בצדקתך חינו: 41 ויבאני חסדך יהוה  
 תשועתך כאמרתך: 42 ואענה חרפי דבר כי בטחתני  
 בדברך: 43 ואל תצל מפי דבר אמת עד מאד כי  
 למשפטך יחלתי: 44 ואשמרה תורתך תמיד לעולם ועד:  
 45 ואתהלכה ברחבה כי פקדיך דרשתי: 46 ואדברה  
 בעדתיך נגד מלכים ולא אבוש: 47 ואשתעשע במצותיך  
 אשר אהבתי: 48 ואשא כפי אל מצותיך אשר אהבתי  
 ואשיחה בחקיך: 49 זכר דבר לעבדך על אשר יחלתני:

50 זאת נחמתי בעניי כי אמרתך חיתני: 51 זדים הליצני  
 עד מאד מתורתך לא נשיתי: 52 זכרתי משפטיך מעולם  
 יהוה ואתנחם: 53 זלעפה אחזתני מרשעים עזבי תורתך:  
 54 זמרות היו לי חקיך בבית מגורי: 55 זכרתי בלילה  
 שמך יהוה ואשמרה תורתך: 56 זאת היתה לי כי פקדיך  
 נצרתני: 57 חלקי יהוה אמרתי לשמר דבריך: 58 חליתי  
 פניך בכל לב חנני כאמרתך: 59 חשבתי דרכי ואשיבה  
 רגלי אל עדתיך: 60 חשתי ולא התמהמהתי לשמר  
 מצותיך: 61 חבלי רשעים עודני תורתך לא שכחתי:  
 62 חצות לילה אקום להודות לך על משפטי צדקך:  
 63 חבר אני לכל אשר יראוך ולשמרי פקודיך: 64 חסדך  
 יהוה מלאה הארץ חקיך למדני: 65 טוב עשית עם  
 עבדך יהוה כדברך: 66 טוב טעם ודעת למדני כי  
 במצותיך האמנתי: 67 טרם אענה אני שגג ועתה אמרתך  
 שמרתי: 68 טוב אתה ומטיב למדני חקיך: 69 טפלו  
 עלי שקר זדים אני בכל לב אצר פקודיך: 70 טפש  
 כחלב לבם אני תורתך שעשעתי: 71 טוב לי כי עניתני  
 למען אלמד חקיך: 72 טוב לי תורת פיך מאלפי זהב  
 וכסף: 73 יריך עשוני ויכוננוני הבינני ואלמדה מצותיך:  
 74 יראיך יראוני וישמחו כי לדברך יחלתי: 75 ידעתי  
 יהוה כי צדק משפטיך ואמונה עניתני: 76 יהי נא חסדך  
 לנחמני כאמרתך לעבדך: 77 יבאוני רחמיך ואחיה  
 כי תורתך שעשעי: 78 יבשו זדים כי שקר עותוני אני  
 אשיח בפקודיך: 79 ישובו לי יראיך וידעו עדתיך:

80 יהי לבי תמים בחקיך למען לא אבוש: 81 כלתה לתשועתך נפשי לדברך יחלתי: 82 כלו עיני לאמרתך לאמר מתי תנחמני: 83 כי הייתי כנאד בקיטור חקיך לא שכחתי: 84 כמה ימי עבדך מתי תעשה ברדפי משפט: 85 כרו לי זדים שיחות אשר לא כתורתך: 86 כל מצותיך אמונה שקר רדפוני עזרני: 87 כמעט כלוני בארץ ואני לא עזבתי פקודיך: 88 כחסדך חניני ואשמרה עדות פיך: 89 לעולם יהוה דברך נצב בשמים: 90 לדר ודר אמונתך כוננת ארץ ותעמד: 91 למשפטיך עמדו היום כי הכל עבדיך: 92 לולי תורתך שעשעי אז אברתי בעניי: 93 לעולם לא אשכח פקודיך כי בם חייתני: 94 לך אני הושיעני כי פקודיך דרשתי: 95 לי קור רשעים לאבדני עדתיך אתבונן: 96 לכל תכלה ראיתי קץ רחבה מצותך מאד: 97 מה אהבתי תורתך כל היום היא שיחתי: 98 מאיבי תחכמני מצותך כי לעולם היא לי: 99 מכל מלמדי השכלתי כי עדותיך שיחה לי: 100 מזקנים אתבונן כי פקודיך נצרתני: 101 מכל ארח רע כלאתי רגלי למען אשמר דברך: 102 ממשפטיך לא סרתי כי אתה הורתני: 103 מה נמלצו לחכי אמרתך מדבש לפי: 104 מפקודיך אתבונן על כן שנאתי כל ארח שקר: 105 נר לרגלי דברך ואור לנתיבתי: 106 נשבעתי ואקימה לשמר משפטי צדקך: 107 נעניתי עד מאד יהוה חניני כדברך: 108 נדבות פי רצה נא יהוה ומשפטיך למדני: 109 נפשי בכפי תמיד ותורתך לא שכחתי:

110 נתנו רשעים פח לי ומפקודיך לא תעיתי: 111 נחלתי  
 עדותיך לעולם כי ששון לבי המה: 112 נטיתי לבי  
 לעשות חקיך לעולם עקב: 113 סעפים שנאתי ותורתך  
 אהבתי: 114 סתרי ומגני אתה לדברך יחלתי: 115 סורו  
 ממני מרעים ואצרה מצות אלהי: 116 סמכני כאמרתך  
 ואחיה ואל תבישני משברי: 117 סעדני ואושעה ואשעה  
 בחקיך תמיד: 118 סלית כל שונים מחקיך כי שקר  
 תרמיתם: 119 סגים השבת כל רשעי ארץ לכן אהבתי  
 עדתיך: 120 סמה מפחדך בשרי וממשפטיך יראתי:  
 121 עשיתי משפט וצדק בל תניחני לעשקי: 122 ערב  
 עבדך לטוב אל יעשקני זדים: 123 עיני כלו לישועתך  
 ולאמרת צדקך: 124 עשה עם עבדך כחסדך וחקיך  
 למדני: 125 עבדך אני הבינני ואדעה עדתיך: 126 עת  
 לעשות ליהוה הפרו תורתך: 127 על כן אהבתי מצותיך  
 מזהב ומפז: 128 על כן כל פקודי כל ישרתי כל ארח  
 שקר שנאתי: 129 פלאות עדותיך על כן נצרתם נפשי:  
 130 פתח דבריך יאיר מבין פתיים: 131 פי פערתי  
 ואשאפה כי למצותיך יאבתי: 132 פנה אלי וחנני כמשפט  
 לאהבי שמך: 133 פעמי הכן באמרתך ואל תשלט  
 בי כל און: 134 פדני מעשק אדם ואשמרה פקודיך:  
 135 פניך האר בעבדך ולמדני את חקיך: 136 פלגי מים  
 ירדו עיני על לא שמרו תורתך: 137 צדיק אתה יהוה  
 וישר משפטיך: 138 צוית צדק עדתיך ואמונה מאד:  
 139 צמתתני קנאתי כי שכחו דבריך צרי: 140 צרופה  
 אמרתך מאד ועבדך אהבה: 141 צעיר אנכי ונבזה

פקדיך לא שכחתי: 142 צדקתך צדק לעולם ותורתך  
 אמת: 143 צר ומצוק מצאוני מצותיך שעשעי: 144 צדק  
 עדותיך לעולם הבינני ואחיה: 145 קראתי בכל לב  
 ענני יהוה חקיך אצרה: 146 קראתיך הושיעני ואשמרה  
 עדתיך: 147 קדמתי בנשף ואשועה לדבריך יחלתי:  
 148 קדמו עיני אשמרות לשיח באמרתך: 149 קולי שמעה  
 כחסדך יהוה כמשפטך חיני: 150 קרבו רדפי זמה  
 מתורתך רחקו: 151 קרוב אתה יהוה וכל מצותיך אמת:  
 152 קדם ידעתי מעדתיך כי לעולם יסדתם: 153 ראה  
 עניי וחלצני כי תורתך לא שכחתי: 154 ריבה ריבי  
 וגאלני לאמרתך חיני: 155 רחוק מרשעים ישועה כי  
 חקיך לא דרשו: 156 רחמוך רבים יהוה כמשפטך חיני:  
 157 רבים רדפי וצרי מעדותיך לא נשיתי: 158 ראיתי  
 בגדים ואתקוטטה אשר אמרתך לא שמרו: 159 ראה  
 כי פקודיך אהבתי יהוה כחסדך חיני: 160 ראש דברך  
 אמת ולעולם כל משפט צדקך: 161 שרים רדפוני חנם  
 ומדבריך פחד לבי: 162 שש אנכי על אמרתך כמוצא  
 שלל רב: 163 שקר שנאתי ואתעבה תורתך אהבתי:  
 164 שבע ביום הללתיך על משפטי צדקך: 165 שלום רב  
 לאהבי תורתך ואין למו מכשול: 166 שברתי לישועתך  
 יהוה ומצותיך עשיתי: 167 שמרה נפשי עדתיך ואהבם  
 מאד: 168 שמרתי פקודיך ועדתיך כי כל דרכי נגדך:  
 169 תקרב רנתי לפניך יהוה כדברך הבינני: 170 תבוא  
 תחנתי לפניך כאמרתך הצילני: 171 תבענה שפתי  
 תהלה כי תלמדני חקיך: 172 תען לשוני אמרתך כי כל



מצותיך צדק: 173 תהי ירך לעזרני כי פקודיך בחרתי:  
 174 תאבתי לישועתך יהוה ותורתך שעשעי: 175 תחי  
 נפשי ותהללך ומשפטך יעזרני: 176 תעיתי כשה אבד  
 בקש עבדך כי מצותיך לא שכחתי:

## 120

1 שיר המעלות אל יהוה בצרתה לי קראתי ויענני:  
 2 יהוה הצילה נפשי משפת שקר מלשון רמיה: 3 מה יתן  
 לך ומה יסיף לך לשון רמיה: 4 חצי גבור שנונים עם  
 גחלי רתמים: 5 אויה לי כי גרתי משך שכנתי עם אהלי  
 קדר: 6 רבת שכנה לה נפשי עם שונא שלום: 7 אני שלום  
 וכי אדבר המה למלחמה:

## 121

1 שיר למעלות אשא עיני אל ההרים מאין יבא עזרי:  
 2 עזרי מעם יהוה עשה שמים וארץ: 3 אל יתן למוט  
 רגלך אל ינום שמרך: 4 הנה לא ינום ולא יישן שומר  
 ישראל: 5 יהוה שמרך יהוה צלך על יד ימינך: 6 יומם  
 השמש לא יכבה וירח בלילה: 7 יהוה ישמרך מכל רע  
 ישמר את נפשך: 8 יהוה ישמר צאתך ובואך מעתה ועד  
 עולם:

## 122

1 שיר המעלות לדוד שמחתי באמרים לי בית יהוה  
 נלך: 2 עמדות היו רגלינו בשעריך ירושלם: 3 ירושלם  
 הבנויה כעיר שחברה לה יחדו: 4 ששם עלו שבטים  
 שבטי יה עדות לישראל להדות לשם יהוה: 5 כי  
 שמה ישבו כסאות למשפט כסאות לבית דויד: 6 שאלו

שלום ירושלם ישליו אהביך: 7 יהי שלום בחילך שלוח  
 בארמנותיך: 8 למען אחי ורעי אדברה נא שלום בך:  
 9 למען בית יהוה אלהינו אבקשה טוב לך:

## 123

1 שיר המעלות אליך נשאתי את עיני הישבי בשמים:  
 2 הנה כעיני עבדים אל יד אדוניהם כעיני שפחה אל  
 יד גברתה כן עינינו אל יהוה אלהינו עד שיחננו: 3 חננו  
 יהוה חננו כי רב שבענו בוז: 4 רבת שבעה לה נפשנו  
 הלעג השאננים הבוז לגאיונים:

## 124

1 שיר המעלות לדוד לולי יהוה שהיה לנו יאמר נא  
 ישראל: 2 לולי יהוה שהיה לנו בקום עלינו אדם: 3 אזי  
 חיים בלעונו בחרות אפם בנו: 4 אזי המים שטפנו נחלה  
 עבר על נפשנו: 5 אזי עבר על נפשנו המים הזידונים:  
 6 ברוך יהוה שלא נתננו טרף לשניהם: 7 נפשנו כצפור  
 נמלטה מפח יוקשים הפח נשבר ואנחנו נמלטנו: 8 עזרנו  
 בשם יהוה עשה שמים וארץ:

## 125

1 שיר המעלות הבטחים ביהוה כהר ציון לא ימוט  
 לעולם ישב: 2 ירושלם הרים סביב לה ויהוה סביב  
 לעמו מעתה ועד עולם: 3 כי לא ינוח שבט הרשע על  
 גורל הצדיקים למען לא ישלחו הצדיקים בעולתה  
 ידיהם: 4 היטיבה יהוה לטובים ולישרים בלבנותם:  
 5 והמטים עקלקלותם יוליכם יהוה את פעלי האון שלום  
 על ישראל:

## 126

1 שיר המעלות בשוב יהוה את שיבת ציון היינו כחלמים: 2 אז ימלא שחוק פינו ולשונו רנה אז יאמרו בגוים הגדיל יהוה לעשות עם אלה: 3 הגדיל יהוה לעשות עמנו היינו שמחים: 4 שובה יהוה את שבותנו כאפיקים בנגב: 5 הזרעים בדמעה ברנה יקצרו: 6 הלוך ילך ובכה נשא משך הזרע בא יבוא ברנה נשא אלמתיו:

## 127

1 שיר המעלות לשלמה אם יהוה לא יבנה בית שוא עמלו בוניו בו אם יהוה לא ישמר עיר שוא שקד שומר: 2 שוא לכם משכימי קום מאחרי שבת אכלי לחם העצבים כן יתן לידידו שנא: 3 הנה נחלת יהוה בנים שכר פרי הבטן: 4 כחצים ביד גבור כן בני הנעורים: 5 אשרי הגבר אשר מלא את אשפתו מהם לא יבשו כי ידברו את אויבים בשער:

## 128

1 שיר המעלות אשרי כל ירא יהוה ההלך בדרכיו: 2 יגיע כפיך כי תאכל אשריך וטוב לך: 3 אשתך כגפן פריה בירכתי ביתך בנוך כשתלי זיתים סביב לשלחנך: 4 הנה כי כן יברך גבר ירא יהוה: 5 יברכך יהוה מציון וראה בטוב ירושלם כל ימי חיך: 6 וראה בנים לבנוך שלום על ישראל:

## 129

1 שיר המעלות רבת צררוני מנעורי יאמר נא ישראל: 2 רבת צררוני מנעורי גם לא יכלו לי: 3 על גבי חרשו

חרשים האריכו למענותם: 4 יהוה צדיק קצץ עבות רשעים: 5 יבשו ויסגו אחור כל שנאי ציון: 6 יהיו כחציר גנות שקדמת שלף יבש: 7 שלא מלא כפו קוצר וחצנו מעמר: 8 ולא אמרו העברים ברכת יהוה אליכם ברכנו אתכם בשם יהוה:

## 130

1 שיר המעלות ממעמקים קראתיך יהוה: 2 אדני שמעה בקולי תהינה אזניך קשבות לקול תחנוני: 3 אם עונות תשמר יה אדני מי יעמד: 4 כי עמך הסליחה למען תורא: 5 קויתי יהוה קותה נפשי ולדברו הוחלתי: 6 נפשי לאדני משמרים לבקר שמרים לבקר: 7 יחל ישראל אל יהוה כי עם יהוה החסד והרבה עמו פדות: 8 והוא יפדה את ישראל מכל עונתיו:

## 131

1 שיר המעלות לדוד יהוה לא גבה לבי ולא רמו עיני ולא הלכתי בגדלות ובנפלאות ממני: 2 אם לא שויתי ודומתי נפשי כגמל עלי אמו כגמל עלי נפשי: 3 יחל ישראל אל יהוה מעתה ועד עולם:

## 132

1 שיר המעלות זכור יהוה לדוד את כל ענותו: 2 אשר נשבע ליהוה נדר לאביר יעקב: 3 אם אבא באהל ביתי אם אעלה על ערש יצועי: 4 אם אתן שנת לעיני לעפעפי תנומה: 5 עד אמצא מקום ליהוה משכנות לאביר יעקב: 6 הנה שמענוה באפרתה מצאנוה בשדי יער: 7 נבואה למשכנותיו נשתחווה להדם רגליו: 8 קומה

יהוה למנוחתך אתה וארון עזך: <sup>9</sup> כהניך ילבשו צדק  
 וחסידיך ירננו: <sup>10</sup> בעבור דוד עבדך אל תשב פני  
 משיחך: <sup>11</sup> נשבע יהוה לדוד אמת לא ישוב ממנה מפרי  
 בטנך אשית לכסא לך: <sup>12</sup> אם ישמרו בניך בריתי ועדתי  
 זו אלמדם גם בניהם עדי עד ישבו לכסא לך: <sup>13</sup> כי בחר  
 יהוה בציון אוה למושב לו: <sup>14</sup> זאת מנוחתי עדי עד פה  
 אשב כי אותיה: <sup>15</sup> צידה ברך אברך אביוניה אשביע  
 לחם: <sup>16</sup> וכהניה אלביש ישע וחסידיה רנן ירננו: <sup>17</sup> שם  
 אצמיח קרן לדוד ערכתני נר למשיחי: <sup>18</sup> אויביו אלביש  
 בשת ועליו יציץ נזרו:

## 133

<sup>1</sup> שיר המעלות לדוד הנה מה טוב ומה נעים שבת  
 אחים גם יחד: <sup>2</sup> כשמן הטוב על הראש ירד על הזקן  
 זקן אהרן שירד על פי מדותיו: <sup>3</sup> כטל חרמון שירד  
 על הררי ציון כי שם צוה יהוה את הברכה חיים עד  
 העולם:

## 134

<sup>1</sup> שיר המעלות הנה ברכו את יהוה כל עבדי יהוה  
 העמדים בבית יהוה בלילות: <sup>2</sup> שאו ידכם קדש וברכו  
 את יהוה: <sup>3</sup> יברכך יהוה מציון עשה שמים וארץ:

## 135

<sup>1</sup> הללו יה הללו את שם יהוה הללו עבדי יהוה:  
<sup>2</sup> שעמדים בבית יהוה בחצרות בית אלהינו: <sup>3</sup> הללו  
 יה כי טוב יהוה זמרו לשמו כי נעים: <sup>4</sup> כי יעקב  
 בחר לו יה ישראל לסגלתו: <sup>5</sup> כי אני ידעתי כי גדול

יהוה ואדנינו מכל אלהים: 6 כל אשר חפץ יהוה עשה בשמים ובארץ בימים וכל תהומות: 7 מעלה נשאים מקצה הארץ ברקים למטר עשה מוצא רוח מאוצרותיו: 8 שהכה בכורי מצרים מאדם עד בהמה: 9 שלח אתות ומפתים בתוככי מצרים בפרעה ובכל עבדיו: 10 שהכה גוים רבים והרג מלכים עצומים: 11 לסיחון מלך האמרי ולעוג מלך הבשן ולכל ממלכות כנען: 12 ונתן ארצם נחלה נחלה לישראל עמו: 13 יהוה שמך לעולם יהוה זכרך לדר ודר: 14 כי ידין יהוה עמו ועל עבדיו יתנחם: 15 עצבי הגוים כסף וזהב מעשה ידי אדם: 16 פה להם ולא ידברו עינים להם ולא יראו: 17 אזנים להם ולא יאזינו אף אין יש רוח בפיהם: 18 כמוהם יהיו עשיהם כל אשר בטח בהם: 19 בית ישראל ברכו את יהוה בית אהרן ברכו את יהוה: 20 בית הלוי ברכו את יהוה יראי יהוה ברכו את יהוה: 21 ברוך יהוה מציון שכן ירושלם הללו יה:

## 136

1 הודו ליהוה כי טוב כי לעולם חסדו: 2 הודו לאלהי האלהים כי לעולם חסדו: 3 הודו לאדני האדנים כי לעולם חסדו: 4 לעשה נפלאות גדלות לבדו כי לעולם חסדו: 5 לעשה השמים בתבונה כי לעולם חסדו: 6 לרקע הארץ על המים כי לעולם חסדו: 7 לעשה אורים גדלים כי לעולם חסדו: 8 את השמש לממשלת ביום כי לעולם חסדו: 9 את הירח וכוכבים לממשלות בלילה כי לעולם חסדו: 10 למכה מצרים בבכוריהם כי לעולם חסדו: 11 ויוצא ישראל מתוכם כי לעולם חסדו: 12 ביד חזקה ובזרוע נטויה כי לעולם חסדו:

13 לגזר ים סוף לגזרים כי לעולם חסדו: 14 והעביר  
 ישראל בתוכו כי לעולם חסדו: 15 ונער פרעה וחילו  
 בים סוף כי לעולם חסדו: 16 למוליך עמו במדבר כי  
 לעולם חסדו: 17 למכה מלכים גדלים כי לעולם חסדו:  
 18 ויהרג מלכים אדירים כי לעולם חסדו: 19 לסיחון  
 מלך האמרי כי לעולם חסדו: 20 ולעוג מלך הבשן כי  
 לעולם חסדו: 21 ונתן ארצם לנחלה כי לעולם חסדו:  
 22 נחלה לישראל עבדו כי לעולם חסדו: 23 שבשפלנו  
 זכר לנו כי לעולם חסדו: 24 ויפרקנו מצרינו כי לעולם  
 חסדו: 25 נתן לחם לכל בשר כי לעולם חסדו: 26 הודו  
 לאל השמים כי לעולם חסדו:

## 137

1 על נהרות בבל שם ישבנו גם בכינו בזכרנו את ציון:  
 2 על ערבים בתוכה תלינו כנרותינו: 3 כי שם שאלונו  
 שובינו דברי שיר ותוללינו שמחה שירו לנו משיר ציון:  
 4 איך נשיר את שיר יהוה על ארמת נכר: 5 אם אשכח  
 ירושלם תשכח ימיני: 6 תדבק לשוני לחכי אם לא  
 אזכרכי אם לא אעלה את ירושלם על ראש שמחתי:  
 7 זכר יהוה לבני אדום את יום ירושלם האמרים ערו  
 ערו עד היסוד בה: 8 בת בבל השדודה אשרי שישלם  
 לך את גמולך שגמלת לנו: 9 אשרי שיאחז ונפץ את  
 עלליך אל הסלע:

## 138

1 לדוד אודך בכל לבי נגד אלהים אזמרך:  
 2 אשתחווה אל היכל קדשך ואודה את שמך על חסדך

ועל אמתך כי הגדלת על כל שמך אמרתך: <sup>3</sup> ביום קראתי ותענני תרהבני בנפשי עז: <sup>4</sup> יודוך יהוה כל מלכי ארץ כי שמעו אמרי פיך: <sup>5</sup> וישירו בדרכי יהוה כי גדול כבוד יהוה: <sup>6</sup> כי רם יהוה ושפל יראה וגבה ממרחק יידע: <sup>7</sup> אם אלך בקרב צרה תחיני על אף איבי תשלח ידך ותושיעני ימינך: <sup>8</sup> יהוה יגמר בעדי יהוה חסדך לעולם מעשי ידיך אל תרף:

## 139

<sup>1</sup> למנצח לדוד מזמור יהוה חקרתני ותדע: <sup>2</sup> אתה ידעת שבתי וקומי בנתה לרעי מרחוק: <sup>3</sup> ארחי ורבעי זרית וכל דרכי הסכנתה: <sup>4</sup> כי אין מלה בלשוני הן יהוה ידעת כלה: <sup>5</sup> אחור וקדם צרתני ותשת עלי כפכה: <sup>6</sup> פלאיה דעת ממני נשגבה לא אוכל לה: <sup>7</sup> אנה אלך מרוחך ואנה מפניך אברח: <sup>8</sup> אם אסק שמים שם אתה ואציעה שאול הנך: <sup>9</sup> אשא כנפי שחר אשכנה באחרית ים: <sup>10</sup> גם שם ידך תנחני ותאחזני ימינך: <sup>11</sup> ואמר אך חשך יושפני ולילה אור בעדני: <sup>12</sup> גם חשך לא יחשיך ממך ולילה כיום יאיר כחשיכה כאורה: <sup>13</sup> כי אתה קנית כליתי תסכני בבטן אמי: <sup>14</sup> אודך על כי נוראות נפליתי נפלאים מעשיך ונפשי ידעת מאד: <sup>15</sup> לא נכחד עצמי ממך אשר עשיתי בסתר רקמתי בתחתיות ארץ: <sup>16</sup> גלמי ראו עיניך ועל ספרך כלם יכתבו ימים יצרו ולא אחד בהם: <sup>17</sup> ולי מה יקרו רעיק אל מה עצמו ראשיהם: <sup>18</sup> אספרם מחול ירבון הקיצתי ועודי עמך:



19 אם תקטל אלוה רשע ואנשי דמים סורו מני: 20 אשר יאמרך למזמה נשא לשוא עריך: 21 הלוא משנאיך יהוה אשנא ובתקומיך אתקוטט: 22 תכלית שנאה שנאתים לאויבים היו לי: 23 חקרני אל ודע לבבי בחנני ודע שרעפי: 24 וראה אם דרך עצב בי ונחני בדרך עולם:

## 140

1 למנצח מזמור לדוד חלצני יהוה מאדם רע מאיש חמסים תנצרני: 2 אשר חשבו רעות בלב כל יום יגורו מלחמות: 3 שננו לשונם כמו נחש חמת עכשוב תחת שפתימו סלה: 4 שמרני יהוה מידי רשע מאיש חמסים תנצרני אשר חשבו לדחות פעמי: 5 טמנו גאים פח לי וחבלים פרשו רשת ליד מעגל מקשים שתו לי סלה: 6 אמרתי ליהוה אלי אתה האזינה יהוה קול תחנוני: 7 יהוה אדני עז ישועתי סכתה לראשי ביום נשק: 8 אל תתן יהוה מאויי רשע זממו אל תפק ירומו סלה: 9 ראש מסבי עמל שפתימו יכסומו: 10 ימיטו עליהם גחלים באש יפלם במהמרות בל יקומו: 11 איש לשון בל יכון בארץ איש חמס רע יצודנו למדחפת: 12 ידעת כי יעשה יהוה דין עני משפט אבינים: 13 אך צדיקים יודו לשמך ישבו ישרים את פניך:

## 141

1 מזמור לדוד יהוה קראתיך חושה לי האזינה קולי בקראי לך: 2 תכון תפלתי קטרת לפניך משאת כפי מנחת ערב: 3 שיתה יהוה שמרה לפי נצרה על דל שפתי: 4 אל תט לבי לדבר רע להתעולל עללות ברשע

את אישים פעלי און ובל אלחם במנעמיהם: <sup>5</sup> יהלמני צדיק חסד ויוכיחני שמן ראש אל יני ראשי כי עוד ותפלתי ברעותיהם: <sup>6</sup> נשמטו בידי סלע שפטיהם ושמעו אמרי כי נעמו: <sup>7</sup> כמו פלח ובקע בארץ נפזרו עצמינו לפי שאול: <sup>8</sup> כי אליך יהוה אדני עיני בכה חסיתי אל תער נפשי: <sup>9</sup> שמרני מידי פח יקשו לי ומקשות פעלי און: <sup>10</sup> יפלו במכמריו רשעים יחד אנכי עד אעבור:

## 142

<sup>1</sup> משכיל לדוד בהיותו במערה תפלה קולי אל יהוה אזעק קולי אל יהוה אתחנן: <sup>2</sup> אשפך לפניו שיחי צרתי לפניו אניד: <sup>3</sup> בהתעטף עלי רוחי ואתה ידעת נתיבתי בארח זו אהלך טמנו פח לי: <sup>4</sup> הביט ימין וראה ואין לי מכיר אבד מנוס ממני אין דורש לנפשי: <sup>5</sup> זעקתי אליך יהוה אמרתי אתה מחסי חלקי בארץ החיים: <sup>6</sup> הקשיבה אל רנתי כי דלותי מאד הצילני מרדפי כי אמצו ממני: <sup>7</sup> הוציאה ממסגר נפשי להודות את שמך בי יכתרו צדיקים כי תגמל עלי:

## 143

<sup>1</sup> מזמור לדוד יהוה שמע תפלתי האזינה אל תחנוני באמנתך ענני בצדקתך: <sup>2</sup> ואל תבוא במשפט את עבדך כי לא יצדק לפניך כל חי: <sup>3</sup> כי רדף אויב נפשי דכא לארץ חיתי הושיבני במחשכים כמתי עולם: <sup>4</sup> ותתעטף עלי רוחי בתוכי ישתומם לבי: <sup>5</sup> זכרתי ימים מקדם הניתי בכל פעלך במעשה יריך אשוחח: <sup>6</sup> פרשתי ידי

אליך נפשי כארץ עיפה לך סלה: 7 מהר ענני יהוה  
 כלתה רוחי אל תסתר פניך ממני ונמשלתי עם ירדי  
 בור: 8 השמיעני בבקר חסדך כי בך בטחתי הודיעני  
 דרך זו אלך כי אליך נשאתי נפשי: 9 הצילני מאיבי יהוה  
 אליך כסתי: 10 למדני לעשות רצונך כי אתה אלוהי  
 רוחך טובה תנחני בארץ מישור: 11 למען שמך יהוה  
 תחניני בצדקתך תוציא מצרה נפשי: 12 ובחסדך תצמיח  
 איבי והאבדת כל צררי נפשי כי אני עבדך:

## 144

1 לדוד ברוך יהוה צורי המלמד ידי לקרב אצבעותי  
 למלחמה: 2 חסדי ומצודתי משגבי ומפלטי לי מגני ובו  
 חסיתי הרודד עמי תחתי: 3 יהוה מה אדם ותדעהו בן  
 אנוש ותחשבהו: 4 אדם להבל דמה ימיו כצל עובר:  
 5 יהוה הט שמוך ותרד גע בהרים ויעשנו: 6 ברוך  
 ברק ותפיצם שלח הציף ותהמם: 7 שלח ידיך ממרום  
 פצני והצילני ממים רבים מיד בני נכר: 8 אשר פיהם  
 דבר שוא וימינם ימין שקר: 9 אלהים שיר חדש אשירה  
 לך בנבל עשור אזמרה לך: 10 הנותן תשועה למלכים  
 הפוצה את דוד עבדו מחרב רעה: 11 פצני והצילני מיד  
 בני נכר אשר פיהם דבר שוא וימינם ימין שקר: 12 אשר  
 בנינו כנטעים מגדלים בנעוריהם בנותינו כזוית מחטבות  
 תבנית היכל: 13 מזוינו מלאים מפיקים מזן אל זן צאוננו  
 מאליפות מרבבות בחוצותינו: 14 אלופינו מסבלים אין  
 פרץ ואין יוצאת ואין צוחה ברחבתינו: 15 אשרי העם  
 שככה לו אשרי העם שיהוה אלהיו:

## 145

1 תהלה לדוד ארוממך אלוהי המלך ואברכה שמך לעולם ועד: 2 בכל יום אברכך ואהללה שמך לעולם ועד: 3 גדול יהוה ומהלל מאד ולגדלתו אין חקר: 4 דור לדור ישבח מעשיך וגבורתיך יגידו: 5 הדר כבוד הודך ודברי נפלאותיך אשיחה: 6 ועוזו נוראתיך יאמרו וגדולתיך אספרנה: 7 זכר רב טובך יביעו וצדקתך ירננו: 8 חנון ורחום יהוה ארך אפים וגדל חסד: 9 טוב יהוה לכל ורחמיו על כל מעשיו: 10 יודך יהוה כל מעשיך וחסידיך יברכוכה: 11 כבוד מלכותך יאמרו וגבורתך ידברו: 12 להודיע לבני האדם גבורתו וכבוד הדר מלכותו: 13 מלכותך מלכות כל עלמים וממשלתך בכל דור ודור: 14 סומך יהוה לכל הנפלים וזוקף לכל הכפופים: 15 עיני כל אליך ישברו ואתה נותן להם את אכלם בעתו: 16 פותח את ידך ומשביע לכל חי רצון: 17 צדיק יהוה בכל דרכיו וחסיד בכל מעשיו: 18 קרוב יהוה לכל קראיו לכל אשר יקראהו באמת: 19 רצון יראיו יעשה ואת שועתם ישמע ויושיעם: 20 שומר יהוה את כל אהביו ואת כל הרשעים ישמיד: 21 תהלת יהוה ידבר פי ויברך כל בשר שם קדשו לעולם ועד:

## 146

1 הללו יה הללי נפשי את יהוה: 2 אהללה יהוה בחיי אזמרה לאלהי בעודי: 3 אל תבטחו בנדיבים בבן אדם שאין לו תשועה: 4 תצא רוחו ישב לאדמתו ביום ההוא אבדו עשתנתיו: 5 אשרי שאל יעקב בעזרו שברו על

יהוה אלהיו: <sup>6</sup> עשה שמים וארץ את הים ואת כל אשר  
 בם השמר אמת לעולם: <sup>7</sup> עשה משפט לעשוקים נתן  
 לחם לרעבים יהוה מתיר אסורים: <sup>8</sup> יהוה פקח עורים  
 יהוה זקף כפופים יהוה אהב צדיקים: <sup>9</sup> יהוה שמר את  
 גרים יתום ואלמנה יעודד ודרך רשעים יעות: <sup>10</sup> ימלך  
 יהוה לעולם אלהיך ציון לדר ודר הללו יה:

## 147

<sup>1</sup> הללו יה כי טוב זמרה אלהינו כי נעים נאווה  
 תהלה: <sup>2</sup> בונה ירושלם יהוה נדחי ישראל יכנס: <sup>3</sup> הרפא  
 לשבורי לב ומחבש לעצבותם: <sup>4</sup> מונה מספך לכוכבים  
 לכלם שמות יקרא: <sup>5</sup> גדול אדונינו ורב כח לתבונתו אין  
 מספר: <sup>6</sup> מעודד ענוים יהוה משפיל רשעים עדי ארץ:  
<sup>7</sup> ענו ליהוה בתודה זמרו לאלהינו בכנור: <sup>8</sup> המכסה  
 שמים בעבים המכין לארץ מטר המצמיח הרים חציר:  
<sup>9</sup> נותן לבהמה לחמה לבני ערב אשר יקראו: <sup>10</sup> לא  
 בגבורת הסוס יחפץ לא בשוקי האיש ירצה: <sup>11</sup> רוצה  
 יהוה את יראיו את המיחלים לחסדו: <sup>12</sup> שבחי ירושלם  
 את יהוה הללי אלהיך ציון: <sup>13</sup> כי חזק בריחי שעריך  
 ברך בניך בקרבך: <sup>14</sup> השם גבולך שלום חלב חטים  
 ישביעך: <sup>15</sup> השלח אמרתו ארץ עד מהרה ירוץ דברו:  
<sup>16</sup> הנתן שלג כצמר כפור כאפר יפזר: <sup>17</sup> משליך קרחו  
 כפתים לפני קרתו מי יעמד: <sup>18</sup> ישלח דברו וימסם ישב  
 רוחו יזלו מים: <sup>19</sup> מגיד דברו ליעקב חקיו ומשפטיו  
 לישראל: <sup>20</sup> לא עשה כן לכל גוי ומשפטים בל ידעום  
 הללו יה:

## 148

1 הללו יה הללו את יהוה מן השמים הללוהו במרומים: 2 הללוהו כל מלאכיו הללוהו כל צבאו: 3 הללוהו שמש וירח הללוהו כל כוכבי אור: 4 הללוהו שמי השמים והמים אשר מעל השמים: 5 יהללו את שם יהוה כי הוא צוה ונבראו: 6 ויעמידם לעד לעולם חק נתן ולא יעבור: 7 הללו את יהוה מן הארץ תנינים וכל תהמות: 8 אש וברד שלג וקיטור רוח סערה עשה דברו: 9 החרים וכל גבעות עץ פריי וכל ארזים: 10 החיה וכל בהמה רמש וצפור כנף: 11 מלכי ארץ וכל לאמים שרים וכל שפטי ארץ: 12 בחורים וגם בתולות זקנים עם נערים: 13 יהללו את שם יהוה כי נשגב שמו לבדו הודו על ארץ ושמים: 14 וירם קרן לעמו תהלה לכל חסידיו לבני ישראל עם קרבו הללו יה:

## 149

1 הללו יה שירו ליהוה שיר חדש תהלתו בקהל חסידים: 2 ישמח ישראל בעשיו בני ציון יגילו במלכם: 3 יהללו שמו במחול בתף וכנור יזמרו לו: 4 כי רוצה יהוה בעמו יפאר ענוים בישועה: 5 יעלזו חסידים בכבוד ירננו על משכבותם: 6 רוממות אל בגרונם וחרב פיפיות בידם: 7 לעשות נקמה בגוים תוכחת בל אמים: 8 לאסר מלכיהם בזקים ונכבדיהם בכבלי ברזל: 9 לעשות בהם משפט כתוב הדר הוא לכל חסידיו הללו יה:

## 150

1 הללו יה הללו אל בקדשו הללוהו ברקיע עזו:

2 הללוהו בגבורתיו הללוהו כרב גדלו: 3 הללוהו  
בתקע שופר הללוהו בנבל וכנור: 4 הללוהו בתוף  
ומחול הללוהו במנים ועוגב: 5 הללוהו בצלצלי שמע  
הללוהו בצלצלי תרועה: 6 כל הנשמה תהלל יה הללו  
יה:

civ

מודרני עברי ד תנ

**The Holy Bible in Modern Hebrew**

Public Domain

Language: עברית (Hebrew)

2022-06-14

---

PDF generated using Haiola and XeLaTeX on 11 Nov 2022 from source files dated 15 Jun 2022

53d9715c-3509-54f2-9e87-2cb0afdfb800